

**NATIONAL ASSEMBLY OF
SEYCHELLES**

Tuesday 18th April, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou zofisyé Lasanble. Bonzour nou piblik ki swiv nou, e byenveni pou nou travay sa semenn. Nou a konmans avek prezantasyon dokiman. Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble Nasyonale e tou dimoun ki a lekout. Bann Papye ki pe ganny prezante bomaten i,

*Report on the visit to the
Seychelles National Youth Council-
February 2023 by the Media, Youth,
Sports and Culture Committee*

*Annual Report for the Year
2022 by the Media, Youth, Sports
and Culture Committee*

*Report on the 62nd Session of
the OACPS Parliamentary Assembly
and the ACP-EU Joint Parliamentary
Assembly and the ACP-EU Joint
Parliamentary Assembly
Intersessional Meetings – Brussels-
Belgium 25th February to 2nd March,
2023. Mersi Mr Speaker.*

MR SPEAKER

Mersi Madanm Clerk. Se tou. Mon krwar nou a fer loner *Chairman* Komite Medya ki'n soumet bann rapor, pou li parey labitid, fer en pti

prezantasyon lo son rapor. Onorab Wavel Woodcock.

HON WAVEL WOODCOCK

Mersi Mr Speaker. Bonzour Mr Speaker, tou Manm e tou dimoun a lekout, espesyalman zabitan Grand Anse Praslin. Mr Speaker, koman *Chairman MYSCC*, Komite pour Medya Lazenés Sport ek Kiltir, mon annan gran plezir pou prezant 2 rapor ozordi bomaten.

Premyerman, Rapor *Visit* Familyarizasyon avek *meeting* kot *Headquarters Seychelles National Youth Council, SNYC*. Bi sa *visit* sete pou ganny plis lenformasyon lo lofis *SNYC*, *update* lo bann diferan program lazenés, *SNYC*, pou konpran plan, vizyon *SNYC* pour le fitir. E pou ganny plis lenformasyon lo rol bann *youth workers*. Ozordi zot ganny apele *Program Officers*, zot responsabilite, e *status* bann *Youth Bureaus*.

Nou'n osi diskit lo re alokasyon *Youth Bureaus* lo Praslin ek La Digue ki i pa *conducive*. I annan mank lespas. E osi lo *Youth Bureau* Praslin ki bezwen *relocate*, akoz an se moman i pe *operate* dan en *building* ki apartir en parti politik.

Nou'n osi diskit lo *Youth Bureau* li menm. Servis ki pe ganny ofer, bann fasilite. Servis ki zot pe ofer bann zenn dan lakominote. E osi angaz plis bann zenn o nivo distrik, e rezyonal. E parey nou'n vwar, apre sa langazman nou'n war ki *Youth Bureau* Anse Royale in reouver.

Nou'n diskit lo nouvo *format* Lasanble Lazenés, kot bann Manm ozordi i ganny elekte. E permet mwan Mr Speaker, pou profit sa lokazyon pou felisit Saïd Lesperance, premye Speaker Lasanble Lazenés ki sorti lo Praslin.

E si mon pa tronpe i pli zenn Speaker dan listwar SNA, selman 14an.

Nou'n osi diskrit lo *training, building staff capacity*. Bann *opportunities* pou *further studies* pou bann *staff*. Nou'n osi diskrit lo bann defi ki *SNYC* pe fer fas avek. Sirtou sipor pou bann *Program Officers* an term resours. Finansman pou bann zenn antreprenner atraver bann *rent*.

E dezyennman Mr Speaker, permet mon pou briyevman prezant rapor pour Komite *MYSOC* pou lannen 2022. *MYSOC* in vremen aktiv an 2022 kot plizyer *visit e meeting* in ganny organize. Nou komite ti amann nou *term of reference* pou enkli Sekter *Sport*. Pou annan plis *oversight* lo sa sekter. Lanfaz ti ganny sirtou mete lo renovasyon bann fasilite sportif.

MYSOC in rankontre avek plizyer antite dan sa 4 sekter; Medya, Lazenés, *Sport* ek *Kiltir*. Nou'n zwenn avek *SBC, Seychelles Media Commission*. Nou ti osi annan en *high level delegation visit*, kot ansanm avek Minis Finans e Minis Spor pou *visit* bann fasilite sportif. E ozordi plizyer sa bann fasilite i anba renovasyon.

Finalman Mr Speaker, nou'n *visit* Liniversite Sesel, kot nou ti *meet* avek *Dean* Liniversite Sesel, *UNISEY*. Kot nou ti diskrit bann program *UNISEY* e bann konseps ki sa liniversite pe fer fas avek. Plizyer sa bann konseps ozordi pe ganny adrese. Nou'n *visit* osi Anse Royale *Youth Hostel* kot lanfaz sete lo amelyorasyon, akomodasyon e lanvironnman bann etidyan ki sorti lo Praslin avek La Digue.

Mr Speaker, Rapor lo tou sa bann *visit* ti ganny prezante avek sa Lasanble lannen pase. E tou detay i

dan sa bann rapor ki manm piblik i kapab ganny akse avek ozordi. Avek sa 2 mo Mr Speaker, mon prezant sa 2 rapor avek ou. Mersi bokou.

MR SPEAKER

Mersi Onorab, e remersiman osi pou bann Manm Komite. E, pou zot langazman e zot travay i ganny apresye. Bon nou a prosede avek kestyon, e nou ava demann Madanm Raporter pou apel Minis. Nou pou pran bann kestyon dan lord en pe ki *suit* delegasyon bann zofisye. E, nou pe konmans avek kestyon nimerò 30. Madanm Raporter i ava apel Minis e zofisye ki nesesser.

Bonzour Minis Marie-Celine Zialor, Minis pour Lazenés, Spor e Lafanmir. E avek li, bonzour osi Mr Clive Roucou, *Principal Secretary* pour Lafanmir dan sa Minister. Byenveni dan Lasanble pour kestyon. Nou komans avek kestyon limero 30 ki dan non Onorab Gervais Henrie. Onorab, ou annan laparol.

HON GERVAIS HENRIE

Mersi Mr Speaker. Bonzour tou dimoun, sirtou bann dimoun Mont Buxton. Mr Speaker, kestyon nimerò 30 i lir koumsa: "Eski Minis pour Lafanmir i kapab dir nou Lasanble ki progre son Minister in fer dan son plan pou ankouraz kreasyon bann biznes lafanmir e proze korporativ pour bann dimoun aze e dezabilite, parmi lezot program ki son Minister pe anvizaze met an plas? Mersi.

MR SPEAKER

Mersi Onorab. Minis, nou a pas lo repons.

MINISTER **ZIALOR**

MARIE-CELINE

Mersi Mr Speaker. Bonzour Mr Speaker avek ou lekip. Bonzour tou bann Manm Onorab, e bonzour tou dimoun ki a lekout. Mr Speaker, sa i en proze ki ti ganny konsevwar an 2021, ansanm avek Minister Lantreprenarya Lenvestisman Biznes, e osi Minister Gouvernman Lokal. E ti annan osi sipor plizyer lezot Minister.

E parey nou tou nou okouran, 2021 ti en lannen tre difisil, swivan pandemik COVID-19. E sa proze pa'n fer gran progre signifikan, akoz priyorite ti sanze dapre bann bezwen pou 2021, e pou 2022. Departman Lafanmir in vwar li pe bezwen konsantre lo bann lezot servis, parey *counselling*.

E la mon ti ava kontan fer sorti Mr Speaker, ki i en servis ki i ankor annan bokou demann, e Departman Lafanmir in preski depas son abilite pou li kapab fer fas. Sirtou bann problem nou pe fer fas avek, se lasante mantal dan pei, parmi bann fanmir. E sa i enn rezon akoz nou'n bezwen met sa program en pti kou lo *shelf* sa 2 lannen.

E Departman Lafanmir osi in bezwen angaz dan bann lezot *projet*, tel ki, ansanm avek Departman Sosyal, pou nou fer nouvo Lalwa *Home Care*, e pou etabli sa, sa lannen. E bann *projet* lenfrastruktir, espesyalman lakaz bann dimoun aze.

Se la, an 2023, Mr Speaker, ki nou'n mazin pou nou tir sa proze lo *shelf*, e nou'n deza fer en *meeting* avek Departman Tourizm pou vwar posibilite demar avek enn de Proze *Cultural Tourism*, vi ki tourizm i ankor reste pilye nou lekonomi. E nou pe mazin swazir 2 group pou konmans avek, bann zenn. E osi proze parey Onorab in demann dan

kestyon, pou korperativ bann dimoun aze.

Nou bi selman, nou pou konmans fasilite sa *projet* pou li kapab demare, e apre nou pe depan lo kominote e lezot fasilite pou kapab met lanmen ansanm pou nou kapab omwen sa lannen, demars *projet*. Mersi Mr Speaker.

MR SPEAKER

Mersi Minis. Siplemanter, Onorab Henrie.

HON GERVAIS HENRIE

Mersi Mr Speaker. Premye siplemanter se, sertenman laliny Bidze. Eski okenn par, ouswa atraver ou Minister, ouswa bann lezot Minister ki ou pou mazin kolabor avek, zot ava annan en laliny Bidze pou soutenir sa proze? Sa i premye.

E, dezyenm, plito en propozisyon; eski Minis i ava konsider travay avek swa, plito bann lorganizasyon non-gouvernmantal ki'n deza etabli e ki kapab konmans en proze parey ki nou pe koze? Mon pe mazin par egzanp dan distrik Baie Lazare i annan bokou bann kominote fermye dan Val Dan Dor ki'n deza regroupe konman kek lasosyasyon ki zot deza annan en konmansman.

E ouswa, en pti kominote pou fer proze pilot. Mon pe mazin par egzanp La Digue avek Linyon Group Trwazyenm-az lo sa zil, i ava bokou pli fasil pou nou vwar en legzanp tanzib. E si zot kapab konsider pou mazin dan sa direksyon. Mersi.

MR SPEAKER

Mersi Onorab. Minis ou repons silvouple?

MINISTER **MARIE-CELINE**
ZIALOR

Mersi Mr Speaker. Wi, mersi bokou Onorab pou ou propozisyon. Definitivman, konsidere. E nou deza pe fer li dan sa laliny ki ou'n mansyonnen. Nou leksperyans letan nou ti'n mazine 2020, 2021, nou pa ti konnen ki degre lefe COVID pou fer pou nou kapab al dan sa...Fer dan diferan partner. Nou, nou febles, nou bann defi ansanm avek Departman Tourizm nou'n vwar.

En keksoz ki nou pa'n abitye fer Sesel, si nou zis kit li avek bann lezot group, e nou pa fasilite, nou pa donn lanmen, en koudmen pou redi, i swa, i al tre dousman, ouswa i pa bouz preski ditou.

Akoz i pa en laspe sa zafer biznes fanmir ki en pe dan kiltir Seselwa. E vwala aköz nou pe pran en pti pe letan, pou nou kapab rode lafason ki mannyer. E definitivman sa propozisyon i marse.

Me selman, fodre i annan en dimoun ki redir. En dimoun ki parey en sanpyon ki pe pouse pou fer li avanse. E letan bann diferan departman sakenn i annan son priyorite, parfwa i annan en pe difikilte pou ganny resours imen pou kapab redir. Me selman, definitivman.

E la bann dimoun ki pe tann nou ki ti ava swete pran kontak avek Departman Lafanmir, ouswa Lantreprenarya, ouswa Devlopman Kominoter, pou vin sa dimoun ki redir, ki pouse. E nou, nou a donn tou sa sipor posib.

Ou premye kestyon kot i konsern Bidze. Bidze spesifik pou sa proze, non. I napa. Aköz parey nou ti pe dir, i pa'n vin dan priyorite. Me selman, bann diferan... Parey mon konnen *Local Government* i annan bann bout Bidze pou *Community Life*, ki i tonm

en pe anba la pou bann *Animator Scheme*.

E osi tou lo kote bann *projet*, nou'n konsidere pou dir sa lannen nou ava kapab regarde ki mannyer nou fer. Be selman Bidze i pa pou gro, aköz sa nou pe zis fasilite li. I pou en biznes finalman pou sa bann fanmir li. So, fasiliteyon i pou fer plito lo sa kote lozistik, lo kote ede avek par egzant, lo devlop kapasite bann dimoun ki pou al ladan. E fer en pti pe travay lo sa kote lemosyon, sosyal, siko sosyal avek bann dimoun.

Akoz nou tou nou konnen, letan i konsern biznes fanmir parfwa se bann pti largiman ensidswit. Me ki mannyer nou fer bann dimoun travay en pe plis ansanm. Sa i plito nou pe mazine pou nou kapab...Nou pe mazin sa lannen nou ava kapab zis demar li. Me selman nou pe ekspekte nou ava sirprann ki i a demar ase vit, ase for tou. Mersi Mr Speaker.

MR SPEAKER

Mersi Minis. Nou a pran siplemanter lezot Manm. Mon a komans avek Onorab Georges Romain.

HON GEORGES ROMAIN

Mersi Mr Speaker. Bonzour Mr Speaker. Minis, bonzour ek ou *panel*. Bonzour tou koleg Onorab e tou dimoun a lekout. Minis anvi ki kestyon i pe tous bann dimoun aze. Parey nou konnen dan bann *home* konmela, mazorite bann dimoun nou dir i aze. E i annan bann *home* ki annan bann dimoun ki annan bann talan, ki fer *craft*.

Mon konnen La Retraite nou annan enn nou dimoun dan en *wheelchair*, ki fer bann keksoz *craft*. Eski zot annan bann fason lankourazman oubyen plan, ki zot

pou ankouraz sa bann dimoun, kekfwa sa osi a kapab donn zot en pti reveni, si ou annan okenn plan lo la? Mersi Mr Speaker.

MR SPEAKER

Mersi Onorab. Minis, ou repons.

MINISTER MARIE-CELINE ZIALOR

Wi, Mr Speaker, kekfwa pou sa bann detay, avek ou permisyon, mon ti a kontan PS Roucou i ava kapab donn detay. Mersi.

MR SPEAKER

Mersi. Wi, PS Roucou ou annan laparol.

PS CLIVE ROUCOU

Mersi Mr Speaker. Bonzour Mr Speaker, bonzour tou Manm Onorab. Mersi Onorab pou ou kestyon. Wi Onorab, *in fact* pour Departman Lafanmir nou annan en *program unit* ki nou fek met li an mars. La i *fully fledged in fact*.

Nou'n deza pran konsyans ki nou annan en kantite nou bann dimoun aze, e dimoun avek dezabilite ki par egzanp, parey ou konnen La Retraite nou annan enn ki *very good* avek son bann *craft*. Nou annan en lot dimoun ankor ki *very good* ek son *craft* ankor.

Tousala i dan nou *unit* program. Nou'n deza met li koman enn lo nou plandaksyon pou nou enkorpor *or* met zot ansanm pou travay lo zot bann *craft*. *And even* fer sa pti laranzman ki zot kapab vann sa. *So*, plan nou *program unit* anba *Quality of Life*, in deza pe travay lo sa plan, pou ki mannyer nou kapab ganny tou sa bann dimoun ki annan sa bann *skills specific*. Travay lo en keksoz, epi aranz sa bout ki nou kapab fer zot met an vant zot keksoz. Mersi.

MR SPEAKER

Mersi PS. Kestyon Onorab Naddy Zialor.

HON NADDY ZIALOR

Mersi Mr Speaker. Bonzour Minis, bonzour PS, e bonzour tou dimoun ki a lekout. Minis baze lo ou larepons, petet ki ou'n donn nou. E la mon pe mazin spesifikman avek program dan loptik petet pou regarde ki mannyer nou kapab fer sir nou pe tous tou dimoun. Mon pe mazine an kolaborasyon avek Minister *Local Government*, dan ki fason nou kapab tous bann dimoun ki pe viv avek en dezabilite, sirtou lo zil.

Par egzanp la mon mazin Praslin. Ki mannyer nou kapab travay ansanm pou... swa mon pa konnen si ou Minister i deza annan en program an plas pou konmans inisyé serten *empowerment* pou bann group dimoun ki pa kapab antre dan lanplwa me, ki nou kapab donn zot sa zouti apropiye, pou zot kapab, petet konmans zot prop pti biznes. Byensir la i ava en moman pou konmans en landrwa. Mersi Minis. Mersi Mr Speaker.

MR SPEAKER

Mersi Onorab. Minis ou pas laparol avek PS? PS.

PS CLIVE ROUCOU

Mersi Mr Speaker. Mersi Onorab pou ou kestyon. Onorab, ou'n met li byen e *in fact* sa travay in fini ganny inisyé avek mwan, avek mon koleg PS from *Local Government*, PS Perine. Ki *even last week we had* sa konversasyon, pou gete ki mannyer nou kapab tonm an mars avek bann program spesifik.

E annan sa *capacity building* lo nivo distrik, pou nou bann

dimoun aze e nou bann dimoun ki pe viv avek en dezabilite, pou war le meyer lo *the way forward*. Tou sa bann kestyon, tou sa bann keksoz i fini an mars, e nou pe met li an mars la pou le moman. Mersi.

MR SPEAKER

Wi, Onorab. Si oule klarifikasyon.

HON NADDY ZIALOR

Zis en *follow up*. Eski zot annan en, petet en dele letan ki zot pe mazinen kan sa bann program pou konmans inisye?

MR SPEAKER

Mersi. Wi, PS?

PS CLIVE ROUCOU

Meeting nou'n konmans ganny fer, be selman nou napa en *timeframe exact* pou nou dir kan i pou finalize, oubyen kan lenplimantasyon pou *take place*. Me selman, tousala i and diskisyon, e nou war sa lalimyer *at the end of the tunnel*. *Thank you*.

MR SPEAKER

Thank you. Minis i le azoute?

MINISTER MARIE-CELINE ZIALOR

Wi, mersi Mr Speaker. Zis pou azout en pti bout, atraver ou Mr Speaker, pou Onorab. Pou ou kapab anmenn sa bann kalite *projet*, akoz sa i *projet* ki tonm anba program. I *projet*. Ler ou annan aktivite, ou annan levennman, i 1 zour, 2 zour fer. *Projet* pou ou kapab fer sir ki son lavi i pa mor an nesan, parey nou dir an Kreol, I bezwen annan tou bann partner.

Nou pa kapab nou, nou departman nou Minister fer keksoz nou tousel. I bezwen annan tou sa bann dimoun ki vini. E letan ou pe

fer avek en kantite dimoun, i pran en pti pe plis letan. E par ler ou ale vini. E par ler i annan dimoun i annan son lezot lokipasyon, e ou bezwen annan en pe pasyans pou ou kapab ale, prezan konmans re *remind* zot pou nou, pou annan en pe keksoz ki pou fer.

E apre nou'n vwar osi tou, bann analiz pandan sa 2an, en pe bann keksoz ki'n ganny fer en pti pe vitman. E par ler i pa soutenab, akoz nou fer en pti pe vitman, e nou pa pran en pti pe letan pou nou met en pti pe fondasyon en pti pe pli for pou li kapab tenir. E apre nou pa'n devlop kapasite ase, nou bann dimoun pou kapab fer sa.

E osi tou, nou pou ganny pa mal defi avek PS pou nou kapab fer dimoun oule travay avek kanmarad. Pou nou fer dimoun abitye travay avek kanmarad, e pou zot annan bann dezakor. Agree pou dezagree, ensidswit, pou zot bouze. Se pou sa rezon akoz, Mr Speaker. Par ler nou vwar bann *projet* sirtou, i pran en pti pe letan. Be selman sa lannen nou'n met lanfaz mwens lo levennman avek aktivite, me en pti pe plis lo *projet*. Mersi.

MR SPEAKER

Mersi Minis. Kestyon Onorab Egbert Aglae.

HON EGBERT AGLAE

Mersi Mr Speaker. Bonzour Minis ek PS, e tou Manm Onorab, e tou dimoun a lekout. Minis, mon premye kestyon. Mon konpran poudir ou'n koz lo COVID. Mon krwar nou'n sirmont lefe COVID ozordi dan en fason. Mon ti a kontan petet demann ou, anvi ki Gouvernman li i sa fasiliter, e ou Minister ki sipoze pe *spearhead* demars pou sa bann *projet* kapab materyalize.

Baze lo sa Minis, petet, si ou kapab dir nou konkretman petet, ki egzaktman konmsi, kot i konsern parey en *roadmap* pou sa bann *projet* kapab materyalize ki enkorpor son konponan finansyel, ki bann plan ki'n ganny etale i kapab materyalize dan bann distrik sirtou?

Dezyenmman Minis, i annan bann sant ki ti ganny prononse, kot i konsern pour akey nou bann Trwazyenm-az ek dezabilite. Parey Grand Anse Praslin i enn. I annan lo Mahe, mon pa tro sir si Anse Royale. Ki zistans nou ete avek sa bann proze? Akoz lenfrastruktir i enn bann rezon akoz bokou *projet* pa *kick-start*. So eski nou pe met sa bann plan an mars? Mersi.

MR SPEAKER

Mersi Onorab. Minis, repons *please*.

MINISTER MARIE-CELINE ZIALOR

Mersi Mr Speaker. Be, zisteman Mr Speaker. Rezon prensipal ki mon'n donner pou ki nou'n fer bann *projet*, i ki napa *projet* ki pa'n ganny fer ditou li. I demann avek priyorite apre *COVID* kot lafanmir ti *counselling* bann dimoun, e nou ankor pe fer. E sa kantite lefe ki sa *COVID* in anmennen. Sirtou in fer monte bann problem sosyal en kantite. E nou'n bezwen fer fas avek sa, e desantraliz en pe. E nou ankor pe desantralize, e nou ankor.

E lanmen tou lede in plen li, me selman nou konpran nou bezwen fer bann program prevansyon. Nou bezwen nou bann *projet* ki nou a pe koz lo la, i *projet Qualité de Vie*, ki i pa'n ganny fer li avan, ki prezan ki i ape ganny demare pou ganny fer. *Roadmap* se pou met sa bann fondasyon plas

avek bann lezot partner sa lannen pou demare. Vwala nou target pou sa lannen pou *roadmap*.

Lo sa ki kote lenfrastruktir, mon konnen apre *PS* avek ou permisyon Mr Speaker, i ava...Petet enn de bann ki ou'n mansyonnen, i a dir kot nou'n arive. Si letan nou ti vini, Mr Speaker, ti'n deza konmanse ouswa ti dan en bon leta, i pa ti a pran nou sa kantite letan. Nou pe pran en kantite lenformasyon. E an plis, letan lo kote lenfrastruktir, zot pou tann mwan koz lo la ozordi. Nou avek bann enzenyer, ouswa avek bann dimoun ki pe vin regarde, i pe pran en pti pe plis letan, egzaktman akoz nou pov dan *maintenance*. Vreman pov dan *maintenance*.

E letan ou pov dan *maintenance*, vwala ki arive. E resours, larzan ki nou annan, Bidze nou bezwen travay avek. E nou, nou pa dekouraze selman. Nou reste angaze pou nou kapab fer pli byen. Mersi Mr Speaker. Petet kekfwa *PS* i a donn lenformasyon enn de lenfrastruktir *troisième-âge*.

MR SPEAKER

PS, ou a elabore.

PS CLIVE ROUCOU

Mersi Mr Speaker. Mersi Onorab pou ou kestyon. Onorab an term lenfrastruktir ki ou'n mansyonnen. Premyerman mon kapab dir Lasanble ki lenfrastruktir ki nou'n planifye spesifikman, par egzanp pour *troisième-âge*, sa *Maison Troisième-âge* - 2 semenn pase nou'n dan en diskisyon ki son lenplimantasyon i la. Later in fini ganny *allocate*. Bidze in fini ganny *allocate*. Se zis pou prosedir pou li konmanse.

An term pou bann dezabilite, pou le moman nou pe servi biro

distrik pou fer bann program, bann aktivite pou nou bann dimoun ki pe viv avek dezabilite.

Be an term lenfrastruktir spesifikman, par egzanp pou VTC ki pou dan *core of the* devlopman pou bann dimoun ki pe viv avek dezabilite, i osi kontra in fini ganny sinyen. Ki tre byento, *by probably next week*, kontrakter i pou'n mont lo *site* pou konmanse. Sa i pou en benefis pou nou bann dimoun avek dezabilite, e nou bann *troisième-âge*. Mersi.

MR SPEAKER

Mersi. Mon a pran dernyen kestyon. E sa...Ou annan klarifikasyon Onorab, mon war ou pe lev lanmen?

PS CLIVE ROUCOU

Anr, pou Praslin, nou annan en devlopman pou *troisième-âge*, me selman mon konnen i annan *swap* avek later ki pe arive. Sa pa ankor byen finalize, me selman i osi tou i en keksoz ki dan plan nou Minister. Mersi.

MR SPEAKER

Mersi. Dernyen kestyon pou Onorab Rocky Uranie.

HON ROCKY URANIE

Mersi Mr Speaker. Bonzour Minis ek ou delegasyon. En bonzour spesyal pou tou zabitan Zil Pros. An vi ki nou pe koz dezabilite e avek program. Eski zot annan en komite lo nivo distrik oubyen rezyonal ki aport sipor e soutyen pou sa group dimoun kapab devlop bann program dapre zot spesifisite? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Si mon'n konpran kestyon byen. Non napa en dimoun an partikilye dan Minister ki *allocate*, ki al dan distrik ki fer sa. Me par kont, *Local Government* mon konnen in organize, e mon, mon konnen mon'n deza ganny envite pou mon al asiste bann *meeting* Trwazyenm-az ki fer, zot elekte... Sa bann dimoun zot elekte zot menm atraver distrik. Zot bann klib ki zot annan.

E i annan osi tou i annan bann *NGO*, ouswa bann endividi ki da lasosyete zot dedye letan. E nou, parey taler Onorab Henrie in propoze, nou travay avek sa bann dimoun, e avek sa bann *Chairperson* sa bann klib pou le moman. Mersi Mr Speaker.

MR SPEAKER

Mersi. Wi, Onorab Uranie. Dernyen pwen?

HON ROCKY URANIE

Wi, mersi Minis. Mon konpran lo kote Trwazyenm-az, akoz dan mon distrik osi mon ti la lo fon batay pou ed zot kree sa komite. Zot apel sa 55+. Zot pa oule ou dir zot trwazyenm-az, zot dir zot 55+.

Me mwan, mon pe koz plito lo bann dimoun avek dezabilite. Eski zot annan dimoun, zot annan komite o nivo distrik oubyen rezyonal ki vin ed zot, siport zot pou kapab devlop program dapre zot spesifisite kot zot distrik, zot sorti. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker, mon pa konnen si *PS* i ava oule donn plis detay. Me selman pou le moman i ankor organize lo kote Nasyonal. Mon pa krwar in desann dan nivo pou al lo distrik, lo rezyonal. E rezon prensipal se ki, nou ankor pe vwar, i annan en kantite lorganizasyon ki'n anrezistre, ki pe deservi kominote dezabilite.

E pou anmenn zot ansanm pou nou kapab ansanm fer en pe keksoz, vwar ki posib, aköz resours i limite, nou pa kapab gaspiy resours. E nou ankor pe fer sa, an menm tan ki Departman Lafanmir osi dan son seksyon kot dezabilite, ki li zot pe fer serten program.

Nou pa ankor ganny li pou nou kapab vin byen ansanm, si an ka i annan bann program ki pou ganny desantralize. Pou lo kote dezabilite i pa ankor ganny fer, selman kekfw *PS* i annan plis lenformasyon. Mersi Mr Speaker.

MR SPEAKER

PS, ou annan keksoz pou azoute?

PS CLIVE ROUCOU

Mersi Onorab pou ou pwen demand. Wi, parey Minis in dir, i ankor lo en nivo Nasyonal. Me par kont nou divizyon ki responsab pou dimoun pe viv avek dezabilite. Nou travay tre pros avek bann lasosyasyon spesifik, Aveg, Sourd, e lezot form of dezabilite.

So, laplipar tou nou bann dimoun ki viv avek en dezabilite, zot asosye avek sa bann lasosyasyon. So, la kot pwen kot i dekoule *from* lasosyasyon, e i vin kot nou sant ki responsab pou dimoun avek dezabilite. E nou travay tre pros avek tou, tou bann lasosyasyon bann dimoun ki viv avek dezabilite. So, nou program, e nou servis, e nou enteraksyon i vin avek

lasosyasyon, e nou *unit*. Mersi Mr Speaker.

MR SPEAKER

Mersi *PS*. Bon a se pwen nou kapab dir mersi *PS* Roucou, e nou a swet li bon depar e bonn kontinyasyon. Madanm raporter, ou ava apel delegasyon pou kestyon nimeron 29 silvouple.

(PS ROUCOU WAS EXCUSED FROM THE HOUSE)

MR SPEAKER

Bonzour e byenveni Mr Ralph Jean-Louis, *Principal Secretary* pour Lazenes e Spor. E Mr Albert Duncan, *CEO Seychelles National Youth Council*. Mersi pou zot prezans. Kestyon nimeron 29 i dan non Onorab Richard Labrosse. Onorab ou kestyon *please*?

HON RICHARD LABROSSE

Mersi Mr Speaker. Bonzour Mr Speaker, bonzour Minis ek ou delegasyon. Bonzour tou bann Manm Lasanble, tou bann *staff* isi ek bann ki pe ekoute. E tou bann dimoun ki pe ekoute dan lakour.

Mr Speaker, kestyon nimeron 29 i al konm swivan; “Eski Minis pour Lazenes i kapab enform Lasanble si okenn revizyon ouswa diskisyon in ganny fer pour revwar *National Youth Policy* pou li reflekte lemonn ozordi? Mersi.

MR SPEAKER

Mersi, Onorab. Minis, ou a adres kestyon?

MINISTER MARIE-CELINE ZIALOR

Mersi Mr Speaker. Dernyen edisyon Nasyonal *Youth Policy* i date an 2018. E Polisi i sipoze ganny reviz tou le 5an, pou ki byensir i reste

relevant. Alors larepons Mr Speaker, i wi, *National Youth Policy* i aktyelman dan prosedir revizyon. E i en demars ki Gouvernman pe pran tre, tre serye.

Akoz nou pa kapab zis fer demars koze lo ki fason bann zenn i fitir pei, me nou bezwen elev nivo tou bann proze, tou bann program, tou bann aktivite. E dan sa ka, Polisi ki pou definir prensip, e pou donn gidans lo stratezi lazenes pei. E mon tre kontan pou vwar ki lafason ki nou pe fer bann program ek aktivite pou bann zenn, pe bokou amelyore. E i pe vin lo en pli o nivo.

Zis parey Mr Speaker, eleksyon ki *SNYC* in fer pou nouvo Lasanble Lazenés. E mon apresye osi bokou la fason ki nou bann zenn ki fer byen, pe ganny akeyir *State House* deplizanpli. E se dan sa menm vibrasyon, dan sa menm loptik, Mr Speaker, ki travay devlopman sa nouvo Polisi pe ganny antreprann. Mersi.

MR SPEAKER

Mersi. Onorab Labrosse, ou siplemanter.

HON RICHARD LABROSSE

Wi, mersi Mr Speaker. Dabor avan mon demann mon siplemanter, Mr Speaker, mon rekonnet nouvo *CEO SNYC*. Felisitasyon dan ou nouvo pozisyon. Mr Speaker, pou... Mersi Minis pou larepons.

Minis, eski ou ti kapab enform Lasanble osi si dan sa bann revizyon ki ou pe fer, si ou pe enkli osi bann lezot sekter ki ganny afileye avek lazenes? Sa mon pe mazin osi bann *NGOs* e osi bann lezot *partners* ki egziste.

E osi dan sa nouvo Polisi ki ou pe fer, ankor en fwa si osi zot pe mazin al lo laliny konsiltasyon, par

egzanp, al dan distrik pou rankontre zenn pou zot osi kapab met zot *input* ladan? Mersi Mr Speaker.

MR SPEAKER

Mersi, Onorab. Minis, ou repons.

MINISTER MARIE-CELINE ZIALOR

Mersi Mr Speaker. Mon ti a kontan avek ou permisyon, pas laparol avek *PS Jean-Louis*, ki pe fer sa bann demars pou li donn bann detay. Mersi.

MR SPEAKER

Byen. *PS*, Laparol pou ou.

PS RALPH JEAN-LOUIS

Mersi Mr Speaker. Bonzour Mr Speaker. Bonzour tou Onorab. Mersi pou ou kestyon Onorab. Definitivman konsiltasyon pou zwe en gran rol dan revi Polisi Lazenés. E deza nou'n konmans bann demars, pou nou enkli bann zenn profesyonnel ki deza travay dan Gouvernman. Kot pou nou kapab *involve* zot dan bann kestyonner.

Parey nou pou apel li en *monthly survey*, pou nou ganny zot *input* pou nou kapab fer sa revi. Akoz dan lepase ki nou'n fer se, nou'n plito esper lo bann *meeting* ki nou'n kriy zot pou zot *attend* an servan televizyon, me i pa'n toultan *successful*.

La nou pe sey fer li dan en lot fason, e nou pe travay tre pros avek *SNYC* pou nou devlop kapasite bann dimoun osi, pou zot kapab fer sa revi. E parey nou *schedule* ki nou'n anvoy kot *Cabinet*, nou sipoze prezant sa rapor avek bann rekomandasyon *to Cabinet* an Oktob an 2023. So nou *timeframe* i devan nou la pou nou *meet*. Mersi.

MR SPEAKER

Mersi. Mersi PS. Bon nou a konmans avek kestyon siplemanter lezot Manm. Onorab Woodcock?

HON WAVEL WOODCOCK

Mersi Mr Speaker. Bonzour Minis, CEO, PS. Mon kestyon i baze lo sa *Youth Policy* 2018 a 2023. Si ou kapab donn nou en pti detay lo, si i annan serten amannman ki zot anvizaze fer lo sa *Youth Policy* ki egziste aprezan?

E mon dezyenm kestyon i tonm anba *objective* dan sa Polisi. Kot... *Objective number 1*, se pou “*provide support to all youth and motivate them to take part in initiative programmes and activities for individual community and national development*”.

Mon konnen a ler aktyel la, dan lepase lafason ki nou ti ganny fer se, atraver bann *Youth Bureau* ki lamazorite in fermen. E la ozordi pa reste bokou. Annefe, zot fek reouver Anse Royale, e byento pou ouver enn Grand Anse, Praslin, e La Digue osi i annan enn - pou zot angaz zenn dan lakominote, ki en pti pe zot plan?

Eski zot pe *move away from* annan sa bann *Youth Bureau* dan diferan distrik? Ki zot plan, ki zot stratezi pour angaz plis bann zenn, pou devlopman bann zenn e pou ganny partisipasyon bann zenn plis o nivo kominoter sirtou? Mersi.

MR SPEAKER

Mersi, Onorab. Minis, ou repons?

MINISTER MARIE-CELINE ZIALOR

Mersi Mr Speaker. Mon krwar pou lo kote amannman Polisi, vi ki nou pe al fer enn nouvo, mon pa vwar rezon pou nou amande, *unless*

kekfwa petet PS i annan lenformasyon.

Lo sa dezyenm kestyon, mon ti a swete ki CEO Duncan, son premye fwa dan Lasanble, i ganny sans adres sa kestyon. Mersi Mr Speaker. Mersi, CEO. Laparol.

CEO ALBERT DUNCAN

Bonzour Mr Speaker. Bonzour tou Manm Onorab. Bonzour manm piblik ki pe swiv. Pou reponn sa dezyenm kestyon Onorab; ki nou pe fer *basically* pou re angaz zenn? Premye keksoz mon krwar i enportan pou nou konpran, kwa ki zenn pe rode an se moman.

E pou *comment* lo sa pwen *Youth Service Bureau*; wi, nou...Enn nou bi se pou desantralize, pou anmenn servis dan kominote. E mon war bann *Youth Service Bureau* i en fason kle pou nou fer sa. Be selman pa pou fer li dan menm fason ki ti pe ganny fer avan, kot i ti annan, i ti vreman bann *basic services*, parey *printing, photocopy, internet*.

Ki nou anvi fer, se ki fer sa bann *Youth Service Bureau* vin en *hub, ok?* Kot nou pe ofer diferan servis ki *align* avek sa ki zenn pe rode. So, par egzanp, si mon pou donn ou legzanp Anse Royale avan ler nou'n re ouver, nou fer en kantite langazman, en kantite *survey* dan sa rezyon, pou gete ki zenn pe rode. E osi gete ki bann *real issues* ki zenn pe fer fas avek.

So, pou donn ou serten legzanp, parey nou konnen *youth unemployment* i en *issue*. So, dan sa *Youth Service Bureau* nou fer sir nou pe fer bann sesyon lo CV, lo bann *skills* ler ou al en *interview*. Ok. Nou annan bann sesyon avek, par egzanp lo *youth health, ok*. So, ou pe fer sa landrwa, sa bann *Youth*

Service Bureau vin pli aktiv, vin pli vibran.

E osi travay fortman avek nou bann lezot *anchor organizations*, parey Minister Ledikasyon, parey NAC, parey Lasante. So, sa pou reponn dezyenm kestyon. Nou pe revwar lafason ki nou pe travay, pou re angaz zenn pou vreman angaz zot dan sa ki zot, zot anvi, sa ki zot bezwen. Mersi Mr Speaker.

MR SPEAKER

Mersi. *PS*, ou ti annan keksoz pou azoute lo premye kestyon? Minis in sizere mon krwar ki kekfwa ou kapab.

PS RALPH JEAN-LOUIS

Mersi Mr Speaker. Parey Minis in dir, nou pa pou al dan bann amannman akoz nou pe refer li ann antye, alor i pou napa nesesite pou fer amannman. E nou pe reekrir li. So, parey nou'n dir. Nou pou revwar en lot *Youth Policy* pou 2024. Mersi Mr Speaker.

MR SPEAKER

Mersi *PS*. Kestyon Onorab Samynadin.

HON KELLY SAMYNADIN

Mersi Mr Speaker. Bonzour Minis, *PS*, *CEO*, e tou dimoun a lekout. Mon kestyon i sitye anba seksyon *Situational Analysis and Challenges* dan sa *current policy*. E sirtou anba seksyon *Education and Training*, ki mon santi i en size ase pertinan. I annan sa 2 pwen, “*raising performance and providing quality education*”, apre “*incorporating values and life skills education for parents and guardians within the broader education system*”.

Mon kestyon i, eski anba sa nouvo Polisi ki pou ganny entrodwi,

eski sa 2 pwen i ankor relevan? E answit, ki kalite program ki zot pe mazin met an plas pou kapab *partner* avek Minister Ledikasyon dan zot demars pou amelyor sityasyon disiplinen dan lekol, ensi ki re-angazman bann paran anver ledikasyon zot zanfan? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pou pas laparol avek *PS* pou li reponn sa premye bout. Me selman lo kote ledikasyon, Minister Ledikasyon, dan nouvo Polisi, laliny kot nou pe ale letan nou pe koz zenn, nou pou bezwen pe regarde ki Lalwa i dir, ki definisyon e ... *way to* sa i 18an ziska 30an. E 18an kekfwa mon mazin pos-segonder la.

Tou sa ki annan pou fer avek sa ki par anba 18an, i pou Konsey Nasyonal Zanfan, *NCC*, ki i ava pran e i zis a pe fer bann *parenting* parey pe dir ladan. Kot i avan... Akoz avan toultan zenn ti zis marmay lekol. Me nou annan en group zenn Sesel, 18an ziske 30an ki mon krwar zot pa angaz preski ditou bann zenn profesyonnel. Ou a dakor avek mwan, mon krwar, Onorab, atraver Mr Speaker.

E nou bezwen sa Polisi, e tou bann larestan keksoz ki nou fer. Vwala dan mon larepons ki mon ti dir elev nivo. Nou bezwen al ver nou bann zenn profesyonnel. Annou pa bly sa kours lapopilasyon ki zot pe donn lanmen debourye dan pei, pe fer pei marse. E sak fwa nou nosyon zenn, nou krwar se marmay lekol.

Sa bann marmay lekol se bann zanfan, e nou moto “Les zanfan reste zanfan”. E bann aktivite zenn 18an, sa nou ava

kapab pran zot, bann zanfan, zenn zanfan, en pti pe pli vye zanfan. Me selman nou anvi sanz en pti git sa direktiv ki annan. Me selman mon ti a kontan ki *PS* i reponn ou premye kestyon. Mersi.

MR SPEAKER

Mersi. Wi, *PS*. Ou kapab pran laparol.

PS RALPH JEAN-LOUIS

Mersi Mr Speaker. Mersi Onorab pou ou kestyon. Wi, ledikasyon ek *training* i ankor relevan parmi bann zenn. E nou'n menm fer en *mid-term review* lo sa *Youth Policy*. E sa in sorti for ki ledikasyon ek *training* i ankor enportan, parey lanplwa, lasante. So, wi. E dan konsiltasyon ki nou pou fer ek bann zenn, i pou ed nou pou nou kapab desid nou bann *priority areas* pour 2024 a 2028. Mersi, Mr Speaker.

MR SPEAKER

Mersi *PS*. Kestyon Onorab Gabriel.

HON CONRAD GABRIEL

Mersi Mr Speaker. Bonzour tou dimoun a lekout. *Welcome* Minis ek ou delegasyon. An ekoutan deba, Minis, zot in dir nou ki *SNYA* pou travay tre pros avek *SNYC*. So, nou konnen poudir *SNYC* i annan bann *core values*;- *compassion*, rezilyans, *professionalism*, *responsibility*, *teamwork*. *In going forward*, eski ou pa santi petet pou annan serten mont lo lipye kanmarad lo sa nivo, akoz nou pe devlop nouvo Polisi la?

E *en d'autres mots*, napa naryen nouvo ki zot pou aktyelman, i zis en kontinyen, en baz ki'n la, se formel li. E zot pe mazin desantraliz sa bann servis osi? Eski lo kote kapasite resours imen, zot annan sifizaman *personnel* ankadre pou anmas tou sa bann zenn? Akoz

Minis, nou pe koz enn i fitir nou demen. I annan en bon pe travay mon rekonnèt ki bezwen ganny fer. Zis, eski, ed nou en pti pe konpran ki, zot resours imen pou kapab permet zot ariv sa bi? Mersi

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pa konnen si mon'n byen konpran premye kestyon Onorab, Mr Speaker. Mon pa konpran sa kestyon ki pe demann mwan lo mont lipye - mont lo lipye kanmarad. Mon pa vwar sa mwan. Non. *Unless* i petet kekfwa fer en pti pe pli kler pou mon konpran.

E son lot komanter. I pa'n tro en kestyon, mon'n mazine en komanter ki pe dir pa pou sanze, i pou reste parey en kontinyasyon. Nou, nou totalman dezagree avek sa, akoz mon krwar nou pe vwar pandan sa 2an la, nou pa'n fer keksoz parey. En pe keksoz in reste, wi. Me selman en kantite...

E vwala akoz nou a pe petet parfwa ganny en bon pe kritik osi tou, akoz nou anvi transformen, e lev nivo, e fer *SNYC* vin en Konsey ki profesyonelize. Kot ou annan sa bann kapasite ki i pe dir, apre osi sa bann desantralizasyon. Me selman parey mon'n koz lo la, en kours zenn, 18an an montan, ki dapre mwan pa'n ganny tous preski ditou.

E nouvo fason fer osi, se ki, rode oli nou bann zenn dirizan. Dirizan mon pe dir pa zis dirizan politik. Bann dirizan, bann en enflyanser dan diferan sekter. E donn zot *platform*, e donn zot vizibilite. E fer ki nou fer kiltir kot sa bann zenn dirizan se zot ki vin

anmenn sa bann transformasyon ki bezwen dan pei. Akoz mwan, mon pa krwar zot fitir demen.

Mwan, mon krwar senserman, Mr Speaker, zenn se bann fitir ozordi. E se ozordi ki nou bezwen donn zot sa *platform*, parey nou a pe dir. Vwala akoz nou a pe pran en pe letan, met sa bann fondasyon. Met li byen, e pa fer li nou tousel Gouvernman, me dir avek zot. E nou pe al konmans fer sa bann kanpanya pou nou rode. *Local Government* pe deza pe fer. Idantifye lekel zot ki aktiv dan nou bann kominote, pou nou kapab donn sa bann vizibilite.

Annou donn sa bann keksoz pozitiv dan pei, en sans. Se sa ki nou pe vin avek, ki mwan mon vwar li i konpletman diferan konpare avek, petet zis fer en kantite aktivite dan nivo distrik. Sirtou avek bann zanfan lekol.

E kot nou les en gran bout nou bann zenn vreman prodiktiv, inovativ, kreativ, dan pei, deryer. E sa i bann keksoz nouvo. Me selman, Mr Speaker, avek ou permisyon, mon ti a kontan pas laparol avek CEO Duncan pou koz lo kapasite SNYC pou fer tousala. Mersi.

MR SPEAKER

Mersi. CEO?

CEO ALBERT DUNCAN

Mersi Mr Speaker. Mersi Onorab pou ou kestyon. Definitivman mon krwar dan nenport *challenge* ler ou pe travay ek en *demography* parey zenes, sa kantite zenn ki nou annan, si ou mazin poursantaz popilasyon. Wi, i en *challenge*.

Me selman mon krwar avek nou stratezi se pou pa travay an *silo*. Me selman pou travay avek nou bann, parey mon'n dir, bann *anchor organisations*, avek bann

fasilitater, avek *civil society*. Ki stratezi ki nou pe vin avek se pou fer sir tou dimoun i lo menm paz, tou dimoun pou travay ansanm.

So, parey... Mon ava donn ou en legzanp zisteman parey pou retourn lo sa legzanp nou YSB Anse Royale. Ler nou pou fer bann laklas pou ed zenn avek *homework*, avek zot *studies*, i pa SNYC ki pou anvoy enn son *Program Officer*, akoz nou napa son *expertise*. So, i la kot nou travay ansanm avek Minister Ledikasyon.

Ler nou pe fer travay par egzanp, lo lar, mannyer pou ekrir en sanson, lanmizik, *videography*, *photography*, se la ki nou *action* nou MOU e NAC ki *provide* nou avek sa *expertise*.

So, pou reponn ou kestyon, nou tousel SNYC definitivman, non. Me selman sirtou parey nou konnen zenes i *cross-cutting*. I *cross-cutting* over en ta sekte, en ta lorganizasyon, en ta Minister, enkli *civil society*. So, si nou stratezi i marse pou met tousala ansanm, mon krwar nou kapab fer li. Mersi.

MR SPEAKER

Mersi CEO. Mon annan Onorab Aglae ek Onorab Esparon ki'n lev lanmen. Nou a termin ek sa 2. Onorab Aglae, ou kestyon?

HON EGBERT AGLAE

Mersi Mr Speaker. Minis mon ti a kontan petet demann ou si zot in fer en evalyasyon avek sa *existing policy* ki dayer son lavi i sipoze fini sa lannen. Anvi ki zis lan apre nesans sa Polisi, nou'n al dan COVID, napa gran zafer ki'n gannyen. Eski zot in fer evalyasyon pou vwar kwa ki bon ladan, ki zot kapab enkorpor li?

Akoz, sa Polisi li menm, i dekouk dan bann diferan afilyasyon

ki Sesel i annan avek bann Lorganizasyon Enternasyonal, kot in kapab ki ou'n war sa Polisi in kapab ne. Par egzanp, nou annan nou bann afilyasyon avek *Commonwealth*, *African Youth Charter*. Nou annan bann *SDGs* ki ale ziska 2030.

So, dan en kote Minis, eski ou pe mazin *scrap* tousala, vin avek ou prop Polisi san pran kont sa ki sel langazman ki Sesel i annan avek sa bann lorganizasyon? Se sa ki nou'n ariv la ozordi. Sa mon ti a kontan konnen.

E dezyenmman Minis, fodre osi nou konpran ki *the Youth Policy* pa pou zis *SNYC*. I pou Sesel, i pou bann diferan kours sosyoekonomik, ki zenn i entegre ladan. So, mon ti a kontan osi zot pran kont tousala pou fer ki nou pa zis pe get *SNYC* avek *Youth Policy*. *It's more than that*. I Sesel li menm. Mersi.

MR SPEAKER

Mersi Onorab. Minis, repons.

MINISTER MARIE-CELINE ZIALOR

Mersi Mr Speaker. Mr Speaker, mon ti a kontan atraver ou, petet pou *remind* Onorab sa bann lorganizasyon ki'n mansyonnen. *Commonwealth*, *AU*, *UN*, ensidswit, o kontrer la prezan ki nou angaze, pli bokou ki lepase avek sa bann lorganizasyon. Letan nou'n vini, o kontrer ou a krwar zot in rod nou en pti pe plis.

E sa ki pas kot mon lofis, ki pas kot Minister, i enkrwayab lakantite partisipasyon Sesel. Swa vertyel, swa prezansyel, ki nou kontinyen angaze. E nou tre, trez azour avek zot bann programasyon e bann stratezi ki dayer zot osi zot pe sanze.

Dapre pos-*COVID*, ki en kantite diskisyon i ganny fer dan sa bann *meeting*, pos-*COVID* ki mannyer keksoz i ganny fer. Savedir nou reste dan sa vye loptik, *pre-COVID* ki pa relevan, i pa pou bon pou nou bann zenn ki nou a pe koz lo la ozordi. E enkli pour Sesel tou. Me mon ti ava kontan petet kekfwa lo kote evalyasyon e bann larestan detay, pas laparol avek *PS*, pou li kapab reponn. Me selman bann abilite pou nou fer Polisi, e nou pe al pli lwen ki sa ankor.

Nou pe al rod, ansanm avek *SNYC*. I annan - petet kekfwa si *CEO* i kapab eksplike apre - bann demars pli lwen ankor ki nou pe fer avek sa Polisi lo kote mezir son lenpak. Akoz i pa enportan ki zis ou *achieve* en lalis aktivite, fer, fer, fer.

Me lenpak, ki lenpak? Lenpak fodre dan 10an, dan 15an, nou demografi sosyal nou bann zenn, nou bann fanmir, nou pei, i bokou pli amelyore avek sa bann Polisi ki nou a pe fer ozordi. Mersi Mr Speaker. Petet mon ti a kontan pas laparol avek *PS*, epi *CEO*. Mersi.

MR SPEAKER

Mersi Minis. *PS*, ou a pran laparol.

PS RALPH JEAN-LOUIS

Mersi Mr Speaker. Mersi Onorab pou ou kestyon. *Au faite*, parey mon ti dir. Pour premye fwa nou'n fer en revi - en *mid-term review*, e dan bann kestyonner ki nou'n pas ek bann zenn, kot zot in donn zot bann larepons lo *Youth Policy*.

E bann gran keksoz ki'n sorti se bokou zot, zot le plis lenformasyon lo sa *Youth Policy*. Zot pa konn ase lo la. E sa i pe montre nou ki pou sa lot la, nou bezwen sansibiliz zot bokou pli mye, e ouver laport pou plis zenn ganny akse avek *Youth Policy*.

I annan en lot keksoz ki ou'n koz lo la Onorab, lo bann korperasyon avek lo nivo enternasyonal. *Au faite* yer ti annan en *meeting* pour *Youth for Commonwealth*, e nou pe mazin anvoy en zenn pou sa konferans ki pe fer an *Nigeria, Abuja*. E konmansman *May*, nou annan en seri bann zenn ki'n ale lannen pase pou diferan. *United Nations, Youth Empowerment, Youth for Peace, Commonwealth Youth Forum, African Union*, pou nonm detrwa.

E osi nou annan 2 zenn ki lafen *May*, zot pou *attend African Union Sports, Ministers*. Zot osi zot pou akonpany nou. So, nou pe donn zot osi bann loportinite pour ganny ekspeze ek bann aktivite, pou zot zwenn bann lesanz ki pou ogmant zot kapasite. Mersi Mr Speaker.

MR SPEAKER

Mersi. *CEO*, ou tour prezan.

CEO ALBERT DUNCAN

Mersi Mr Speaker. Mersi Onorab pou ou kestyon. Zis pou *add on* lo sa ki Minis in dir, en keksoz ki nou'n idantifye, ki nou anvi *improve* lo la, e devlop kapasite ladan se ki lafason ki nou mezir *social impact*. E sa i atraver tou nou bann program, nou servis ki nou fer. Nou pe travay lo bann fason, bann mekanizm, bann *tools* ki nou kapab enplimante, pou nou kapab zisteman mezir nou *social impact* pou nou konpran kwa ki pe marse, kwa ki pa marse.

E pou nou aziste sa ki pa pe marse pou fer li pli efikas. E sa mon krwar i pou ed nou dan lenplimantasyon nouvo *Youth Policy*, akoz i pou fer sa *policy* en *policy* ki mon kapab dir i *organic*, i *live*, akoz nou pou kapab mezire. An

menm tan nou pe enplimante, war kot i pe al mal, idantifye bann nouvo *trends*. Zisteman parey sa Polisi avan i pa ti fer provizyon pou bann keksoz parey pandemik *COVID*.

So, ler bann keksoz i arive, i enportan ki ou kapab *agile policy wise* pou kapab amann keksoz, aziste sa semen ki ou ladan, e mezir lenpak, e zistifye sa ki ou pe fer. So, sa i en keksoz kle ki nou pe travay lo la pou nou bann *staff* pou zot kapab devlop sa kapasite, pou zot kapab *measure social impact* atraver louvraz program servis ki nou pe ofer. Mersi.

MR SPEAKER

Mersi *CEO*. Kestyon Onorab Esparon?

HON REGINA ESPARON

Mersi Mr Speaker. Bonzour Minis ek ou delegasyon. Mon ti ava anvi demann Minis, kwa ki pe ganny fer pou ankouraz plis sa partenarya avek Gouvernman Lokal? Sirtou an sa ki konsern *Animators Scheme*. Pou *reach out to* bann zenn dan kominote e fer zot vin pli angaze, e pli entegre lo baz kominoter pou kapab dekouver zot abilite dan diferan domenn? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Bann demars avek Gouvernman Lokal i lo en progres vreman byen. Sirtou sa lannen, in progres... Nou'n fer en pe semen lannen pase. E sa lannen in demar vreman byen. E mon kapab dir ek ou demars nou'n fer nou de Minis Hoareau, en kantite. E nou ti fer *meeting* nou menm lannen pase.

Sirtou pou vakans Desanm, kot nou ti'n anmenn nou en kantite bann animater dan bann diferan distrik, pou zot kapab vini pou konnen i annan sa *Scheme*, pou eksplike. E *DJ Clarisse*, vreman fantastik travay ki pe fer avek zot. E nou'n nobou kapab mete, pa zis lo kote *sports*, lo kote pou nou. Me selman osi avek bann larestan ladan, ensidswit, rekreasyonnel pou bann demars ki pou fer. Me selman nou konnen poudir i pa ase.

E la ki nou pe fer, nou lofis i a pe travay avek *Registrar*. Nou a pe rod tou sa bann lorganizasyon ki'n anrezistre, ki pe fer en keksoz dan sa loptik. Sirtou kot nou Minister nou pe fer sa. E nou pou al fer la byento en sesyon kot rankont avek zot, ansanm avek. Sa ki nou fer, sa i anba program *First Lady* ki fer anba nou lofis.

Lo kote... i apel "*Hug in a mug*". Kot i zwenn bann dimoun ki'n retrete, tou le lannen. E bann ki ankor annan en kouraz, en lafors, e regarde. Zot annan letan tou ki zot kapab fer sa bann, donn lanmen. I annan... Lakantite ki nou'n zwenn lannen pase, lamazorite i dir ek ou, zot pa pou al pran en program, en *projet* pou zot ansarz.

Me selman, si bezwen zot pou zot kapab vin donn en koudmen, zot ava kapab. La nou pou al rod sa bann ki annan bann diferan lorganizasyon, ki fer dan nivo kominoter, pou nou zwenn ansanm avek zot, ansanm avek *Local Government*. I en demars ansanm, e ki byen boner sa lannen, *CEO Duncan* in ale ankor kot zot, pou nou kapab reviv nou bann langazman ki nou annan avek *Local Government*, pou zisteman kapab vwar sa.

E parey taler mon ti'n dir dan mon kestyon pli boner avek Onorab Henrie Mr Speaker, nou'n aprann en pe lesan sa 2an. Se ki avek nou bann dimoun bann keksoz ki, pa labitid, nou pa abitye. Nou bezwen atrap en pti pe lanmen. Nou bezwen fer sa parkour ansanm avek zot, parfwa ansanm. E parfwa serten *projet* ti sitan annan, i annan ki ganny kit deryer, ki ganny bliye. Nou bezwen tanzantan vin revwar, fer *feedback*, e pou donn lankourazman, pou lo kote desantralizasyon pou sa bann.

Sa bann demars mon kapab dir pou dir i pe ale, i pe al tre byen. E i annan pa mal. La mon vwar pa mal bann klib rekreasyonnel, ki pe fer sirtou apre ler lekol. Me lo sa kote 18an +, sa se sa ki *CEO Duncan* pe koz lo la, kot nou bezwen met en pti pe plis zefor pou nou osi tou annan pou sa group laz bann program. Mersi Mr Speaker.

MR SPEAKER

Mersi Minis. Bon nou a termin la lo sa enn kestyon. E mon krwar se moman nou dir orevwar Mr Albert Duncan, *CEO*. E mon swet li bon *courage* e bonn kontinyasyon.

(THE CEO WAS EXCUSED FROM THE HOUSE)

MR SPEAKER

E madanm raporter nou ava apel bann zofisye pou larestan kestyon ki prensipalman lo *sport*.

Bonzour e byenveni Mr Marc Arissol, *CEO National Sport Council*, e Ms Gyra Nibourette, Direkter Zeneral pour *Strategy and Human Resources* sa Minister, ki'n zwenn nou pou kestyon. Nou pas lo kestyon numero 31, ki dan non Onorab Rocky Uranie. Onorab?

HON ROCKY URANIE

Mersi Mr Speaker. Byenveni ankor enn fwa nouvo delegasyon. En bonzour spesyal ankor tou koleg Onorab, e byensir bann *sportsmen* e zabitan Zil Pros ki a lekout.

“Eski Minis i kapab eksplik nou Lasanble ki plan ou Minister kot i konsern renovasyon laplenn sportif e *Sport Complex* La Digue an zeneral, an vi ki i annan bokou konplent sorti kot bann *sportsmen* sirtou bann zwer foutbol, bann siporter e piblik an zeneral?” Mersi.

MR SPEAKER

Mersi Onorab. Minis ou repons?

MINISTER MARIE-CELINE ZIALOR

Mersi Mr Speaker. Mr Speaker, plan nou Minister kot i konsern renovasyon bann lenfrastruktir sportif lo La Digue, se pou remet zot lo sa standar kot zot merite. Parey nou'n fer, zisteman avek twatir Stad *L'Union*.

Kot i konsern laplenn foutbol *L'Union*, nou'n fini donn *lease* Federasyon Foutbol pou zot kapab prezan aranz laplenn. E se zot ki a pe fer demars pou remet laplenn lo standar, ki *FIFA* i demande, pou ki bann *match* i kapab rezwe lo sa laplenn.

Mr Speaker, konplent wi, mon pa pou war li drol ki i annan bokou konplent. Sa bann lenfrastruktir in avarye. E letan mon ti vin *visit* pou premye fwa, bann lenfrastruktir *sport* lo La Digue, akonpanyen par Onorab Rocky Uranie, zis apre ki mon ti'n rantre dan lofis, mwan osi, mon osi mon ti partaz sa bann menm santiman.

E se pou sa rezon Mr Speaker, ki nou'n fer tou pou aranz sa twatir. E nou a pe fer prosedir pou aranz dormitwar. E anmezir ki

nou travay avek Federasyon Foutbol, pou nou osi aranz laplenn, e lezot lenfrastruktir ankor lo La Digue. Mersi Mr Speaker.

MR SPEAKER

Mersi Minis. Ou siplemanter Onorab Uranie?

HON ROCKY URANIE

Mersi Minis pou ou larepons. Minis, eski kan ki Federasyon pe mazin konmans aranz sa laplenn, akoz nou vwar ki bann zwer, e menm dan Dimans nou war *cricket* osi vin ganny zwe lo sa laplenn? Vi ki zwer i ankor pe servi lo sa laplenn pou *train*, e tou *game* bezwen al zwe Praslin.

Mon pe rode konmsi ki zot pe mete an plas, pou ki menm *training* i aret ganny fer lo sa laplenn? Eski sa konversasyon in ganny fer? E kote sa bann tim pou *train* ler laplenn i konmans aranze, pou zot kapab kontinyen zwe zot *game*? Oubyen si pou annan en *stop* an zeneral, kot i konsern foutbol lo Zil Pros? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker, e mon a demann Ms Nibourette ki annan sa bann detay ki Onorab pe demande, pou reponn. Mersi.

MR SPEAKER

Mersi. Wi, *Madam*?

DG GYRA NIBOURETTE

Bonzour Mr Speaker. Bonzour bann Onorab. Mersi Onorab pou ou kestyon. *With regards to* kan ki laplenn pou fini aranze. Sa ki nou'n ganny enformen avek Federasyon

Foutbol, *by* Septanm laplenn i sipoze in fini aranze. Me selman parey ou pe dir, i pou annan en letan kot letan i pou fermen, ki person pa pou ganny akse pou zot kapab vin lo sa laplenn letan i konmans fer renovasyon. Mersi.

MR SPEAKER

Wi, klarifikasyon Onorab.

HON ROCKY URANIE

Mersi. Eski, si ou pe dir *by* Septanm, savedir mazin konmans i pou ouver? Me, eski la nou pe dir foutbol pou *stop*? Konversasyon pou'n ganny fer avek sa bann tim pou zot *stop*? Ansanm avek Federasyon Foutbol konmsi - zot pou sorti dan *league*? Kwa, konmsi eksplik en pti gin pou bann dimoun laba deor konpran egzaktaman kwa ki pou al ganny arive ler sa travay i konmanse. Mersi.

MR SPEAKER

Mersi. Wi, Ms Nibourette, ou kapab elabore si i posib?

DG GYRA NIBOURETTE

Foutbol pou le moman pe zwe Praslin. Bann tim ti pe servi laplenn *L'Union* petet pou fer en pe *training*. So, si i pou annan... Pou nou kapab aranze, nou pou bezwen annan en peryod letan, akoz foutbol son sezon pe al fermen la, *anyway*. So, i pou annan sa peryod letan kot letan laplenn pou fermen, ki Federasyon Foutbol li i pou pran sa letan pou li kapab aranz laplenn. Mersi.

MR SPEAKER

Mersi. Kestyon Onorab Woodcock.

HON WAVEL WOODCOCK

Mersi Mr Speaker. Mr Speaker, mon kestyon mon pe demann li osi

dan mon kapasite koman *Chairman* Komite pour Medya, Lazenés, *Sport* e Kiltir. Le 16 Oktob 2021, nou ti fer *visit* sa *Sports Complex* La Digue, ki parey Minis ti dir, ti dan en kondisyon vreman deplorab. Apre *visit* nou ti annan en *meeting* avek ansyen *CEO NSC*, Mr Larue, kot serten komikman ti ganny fer pour en alokasyon bidzeter pou fer en travay renovasyon lo sa fasilite, enkli laplenn, *court tennis*, eksetera.

E dapre Bidze 2022, en total R3.5milyon ti pou ganny bidzete pou en peryod 2an, e ti annan en alokasyon bidzeter R1.75milyon pour 2022.

Me ziska prezan, sel travay ki'n ganny fer se sa sanzman twatir lo graden. E pou sa lannen osi, i annan en lot alokasyon R1.75milyon pour renovasyon lo sa *sports complex*. E nou Komite ankore fek fer *visit* La Digue le 4 Mars 2023, e napa nouvo travay renovasyon ki'n komanse.

Mon, mon kestyon en pti pe. Ki bann retar e defi ki zot pe gannyen pou fer renovasyon lo sa *sports complex*? E osi dan le fitir pou met an plas bann lezot fasilite neserer. Akoz? Ti annan en plan konpreansiv ki Gouvernman avan ti annan pou sa *sports complex* an zeneral, ki pa'n materyalize.

E mon kestyon osi, se apard sa R3.5milyon, *local financing* pou zis sa *sports complex*, eski zot annan lezot sours finansman pou met an plas lezot fasilite ki zabitan La Digue in demande pou plizyer lannen, pou Linyon sa *sports complex*? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. I annan en kestyon ki pe vini lo lenfrastriktir an zeneral. Apre Mr Speaker, kot i annan bann keksoz ki mon pa oule repete, kot nou pou fer sorti an zeneral, bann defi ki nou gannyen, avek met bann lenfrastriktir lo son nivo ki i ete. Me pou spesifikman akoz sa kestyon i pou La Digue lo bann detay, bann defi avek bann *challenge*.

E vwala akoz Ms Nibourette, akoz in bezwen *step in*, pou li vin donn en koudmen avek sa lenfrastriktir, an term mankman kapasite ki nou annan kot NSC. E mon ava fer li eksplik en pti pe kekfwala lo kote La Digue, e pou sa Bidze, kwa ki nou pe ganny difikilte avek e kwa osi ki'n nobou kapab ganny fer. Mersi.

MR SPEAKER

Mersi Minis pou sa. Kestyon siplemanter pou Onorab Gervais Henrie. *Sorry*, ou pou demann Ms Nibourette pou adrese? Wi, ekskize. *Madam* ou kapab kontinyen.

(Off-Mic)

MR SPEAKER

Ono-Onorab, ou'n fini demann ou bann kestyon.

HON ROCKY URANIE

(Off-Mic)

Mr Speaker. *PS* in eksplik nou *off-mic*. Nou pa'n konpran ki i pe dir. Nou ti a kontan i dir nou *on-mic* pou nou tande. Mr Speaker, i ti *off-mic*.

MR SPEAKER

Sorry. Be *PS* eski ou repons ti *off-mic*?

HON ROCKY URANIE

(Off-Mic)

Wi, ti *off-mic*.

PS RALPH JEAN-LOUIS

Mersi Mr Speaker, wi mon ti pe eksplik li en keksoz, akoz mon, mon konn en pe sa proze La Digue. I annan 2 faz avek Federasyon Foutbol ki nou pe travay lo la. Premye faz se *replanting of grass*. Zot pou tir sa *topsoil*. Zot le refer li, akoz sa zerb in ganny bage li menm, en? En rezon akoz, se akoz i ganny servi tro bokou. *Training, match*. So, sa premye faz, *ok*?

E osi *purchase of new goal posts*. E *substitutes bench*, avek lalimyer. Sa i ki Federasyon Foutbol pe anvizaze fer. Me i pa vedir ki tousala pou ganny fer Septanm. Septanm laplenn pou pare pou servi, *ok*. Pou *match*, *ok*?

Dezyenm faz, zot anvi fer en *cover* lot kote *opposite grandstand*, avek 2 lofis. Sa bann diferan travay ki Federasyon Foutbol i anvi fer. Mersi.

HON ROCKY URANIE

Non, non. *PS*, petet en sizesyon, vi ki annan sa bout deryer laplenn kot ti kapab fer *training ground* ...

MR SPEAKER

Onorab.

HON ROCKY URANIE

...be netway la pou kapab fer.

MR SPEAKER

Onorab, be eskize, eskize. Eskize, ou'n demann ou kestyon orizinal, ou'n demann ou siplemanter. Les *PS* termin avek son repons, e nou a bezwen pas lo lot Manm. *PS* ou'n fini avek sa repons, oubyen nou a pas laparol avek Ms Nibourette? Mersi.

DG GYRA NIBOURETTE

Mersi Onorab pou ou kestyon. *With regards to renovation* La Digue. Lannen pase larzan ki ti annan i ti larzan pou nou kapab fer... Pou rekouver sa 2 *grandstand* ki vir bout anba. Larzan pou sa lannen i sipoze pou aranz dormitwar.

Lannen pase nou'n fer tou prosedir, e *SIA in tender* pou nou kapab ganny en kontrakter, pou li kapab fer *renovation* dormitwar. Malerezman, *the lowest bid was higher* sa ki *SIA in vin* avek. So, nou'n bezwen kennsel sa enn *tender*, retourn kot *POU*, pou nou kapab demande pou fer en *selective bidding* ki nou'n ganny *approval*.

E *this is where we are now*. *SIA* pe fer *selective bidding*, pou nou kapab ganny en kontrakter pou nou kapab antreprann renovasyon pou dormitwar La Digue. An menm tan, lannen pase mon ti al fer *visit* an Out 2022, kot nou ti war en pe bann leta bann lenfrastriktir. E nou'n konmans en travay avek *SIA* pou nou annan en plan ki mannyer nou pou aranze.

Be sa nou bezwen faz li, akoz Bidze ki nou annan i pa pou permet nou, pou nou fer tou sa ki nou anvi fer dan 2023. So, i pou annan proze la, parey dormitwar i dan proze 2023. Sa *court, multipurpose court* ti annan en diskisyon ki, vi ki i annan 2 *court* La Digue, fer enn vin pou *volleyball*, enn pou vin pou *basketball*. E nou oule *fence* li, aranz son *surface*.

E menm sa bout deryer kot *tennis court*, i osi i dan plan pou nou aranze. Me selman nou bezwen esper Bidze pou kapab fini finaliz tou nou bann plan ki nou annan. Sanmenm sa rezon ki nou'n faz tou bann renovasyon ki nou annan lo La Digue. Mersi.

MR SPEAKER

Mersi Madanm pou sa bann detay. Kestyon Onorab Gervais Henrie.

HON GERVAIS HENRIE

Mersi Mr Speaker. Ankor enn fwa bonzour tou dimoun. Premyerman Mr Speaker, dan son larepons ki fek donner, *PS in dir* ki laplenn, zerb in ganny bage. E zisteman mon krwar i annan nesesite pou etidye, fer en *training ground* o bor, so, ki zwer i pa *train* lo menm laplenn ki i zwe. Si i annan sa posibilite, ou ava dir nou. Mon premye kestyon.

Mon dezyenm kestyon, mon ti ava demann *panel* pou petet donn nou en konsey. Nou ki la anndan, e an menm tan dimoun ki pe ekoute. Mon'n al *visit* fasilite sportif La Digue mwan pase mwan, ansanm avek Komite Medya. E leta ki mon'n vwar sa fasilite ladan i kas mon leker. Parski *taxpayers* Seselwa, ouswa *wherever* Gouvernman in ganny larzan pou fer, in investi dan en lenfrastriktir ki en aki Nasyonan.

Mon pe dir donn nou en konsey, akoz dan kominote i annan bann dirizan. I annan *DA*, i annan *MNA*, i annan en *manager* ki ansarz sa fasilite. Nou, nou pa kapab inyor nou responsabilite, les sa bann fasilite degrengole anba nou, apre dernyen moman vin taye, vin ki pou fer? Kan pou ganny larzan? Ki *timeline*? Ki nou dwatet pe fer?

Akoz La Digue i annan tou la. *Court tennis*, laplenn, konmsi ki mwan, mon zalou dan distrik Mont Buxton napa. E laba i annan, zot les an rin. E pa zis La Digue, i annan lezot distrik osi tou mon war menm zafer. So, mon anvi zot donn nou, konmsi, ki nou merit fer? Ankouraz nou, dir nou en keksoz, koman *community leader*, *what is our responsibility to ensure* ki sa bann lenfrastriktir pa al an rin,

akoz i en keksoz ki *taxpayers* Seselwa in envesti ladan? Mersi.

MR SPEAKER

Mersi Onorab. Minis. Ou adrese?

MINISTER MARIE-CELINE ZIALOR

Mersi Mr Speaker. Mon krwar Onorab son kestasyon in fini montre ki kantite louvraz nou'n vin zwenn. Sa i zis en bout sa. Sa i zis lenfrastriktir, zis en bout. Mon pou pas parol apre, Mr Speaker, avek ou permisyon, avek *CEO*. Nouvo *CEO*, *NSC*. I osi son premye fwa dan Lasanble, pou li kapab eksplik en pti git, e son bann defi. Si i eksplik tou, nou pa pou sorti la konmela.

Me selman nou problem se kapasite sa. Ou pou fer dimoun pran son responsabilite, e letan i napa kapasite fer, sa kantite letan ki nou pa'n devlop... Par egzanp, napa *Property Manager*. Napa en fason bann dimoun ki konn fer *maintenance* landrwa, ki konn travay avek en plan. Vwala.

Kot lofis, nou'n fer depi lannen pase. Lofis Minis in bezwen fer *job enlargement* pou Ms Nibourette travay avek *SIA*, pou nou kapab ede. Sa bann ki ou vwar pe fer la, se gras a bann ki nou'n pouse pou nou kapab sey met en lanmen lo la pou organize. E in telman bokou.

Ou konnen Mr Speaker, si nou ti vin zwenn en pe in ganny fer. Nou ti vin zwenn konmsi lanmwatye, en bout. Be nou'n vin zwenn tou koumsa. E vwala nou bann defi. E par lo la pa zis sa. Avek larestan. Parey la ou a pe donn en legzanp, ou a pe demann avek *PS*, eski pa ti a bon fer *training ground* apre ki normalman i... Taler mon pou koz lo la. Ki nou merit... Nou

pa'n fer sa bann keksoz koumsa. Nou pa'n evolye ek letan.

Nou'n les *sports* koumsanmenm. Nou'n les koumsanmenm. E prezan letan ou pe konmans koumsa la, e vwala ki nou, nou defi, akoz nou ganny bokou kritik. Nou ganny bokou mekontantman, nou konpran nou pa ankoler. Nou konpran, akoz letan ou dan fondasyon ou bezwen desann, anmezir ou fouye ou war en inondasyon. Ou fouy ankor en kou, ou fouy ankor en kou pou ou fer sa for la, pou nou kapab met lo la. Nou, nou bezwen fer pli mye. Nou pa kapab zis kritike. Nou bezwen fer pli mye ki sa ki nou'n vin zwenn. E taler nou pou donn detay sa bann larestan lenfrastriktir avek ki nou pe vin zwenn.

La Digue i parey li. I pou wi, popiler pou nou taye fer bann pti keksoz, me plito nou ganny kritike nou fer keksoz byen. E par ler letan nou'n krwar nou'n konpran ki mannyer pou fer, nou ganny bann enzenyer, nou ganny bann dimoun ki'n dir ek nou, non, atrap en pti kou. Zot bezwen vin regard ankor en pti kou sa. E par ler lanmenm ler ki Bidze i fini akoz kou i kontinyen monte. I kontinyen monte akoz ou vwar sa kantite keksoz ki nou bezwen fer fas avek, ki'n nou'n erite.

Me selman ou'n dir mon donn dimoun lespwar. Mon pou pas laparol avek *CEO* pou donn en bon pti pe lespwar. E ki nou'n nobou kapab pe konmans aranz en pe keksoz. E i pa fini la, lenfrastriktir i pa zis Gouvernman. Bann Federasyon Lasosyasyon osi, e laba osi i mank kapasite, akoz en senp... Fer krwar annou koz en pti gin lo kekfwa si nou met *track*, nou bezwen rode ki kalite nou pou mete.

Eski bann letan, lo la - Lorganizasyon Enternasyonal Atletik, pour rekonnèt si en rikord ouswa en kalifikasyon i ganny fer. Napa kapasite, e ou bezwen al bokou pli lwen, al rod led, sipor, lezot landrwa teknik ki nou pa'n fer akòz nou anvi fer sa bann louvraz teknik.

E SIA, tou lazournen CEO Jitesh i dir nou, mazin letan Sesel, nou letan i so par ler, sa bann *contraction*, *retraction* i fer ki nou, petet i pa *last* sa kantite letan. Annou mazin byen kalite materyo nou servi. Annou kalkil kalite baz nou mete. Annou kalkil osi avan ler nou fer sa bann plan, toultan Minister Bill i dir ek nou, maksimiz later, landrwa. Nou napa bokou later nou Sesel. E i sa bann...

Akòz zot osi zot annan zot bann nouvo lapros ki nou bezwen nou osi aziste avek, e larestan ki fer ki i pe fer nou pran. Me selman ou kapab garanti, garanti, sa kantite travay ki sa lekip... Nou a pe travay en kantite pou nou kapab... E enkli pli o lofis. E nou ganny bokou sipor, led, avek Prezidan, akòz anler si i pa mele, keksoz pa bouze pou nou kapab fer keksoz avanse.

Nou garanti poudir sa lannen ki la, nou pe met en bon pe dan bann lenfrastruktir, azour. E nou pe met osi tou kapasite, e bann kriter osi avek *results based*, avek regard performans pour *accountability*, pou bann dimoun ki parey ou pe dir, ki sipoze. Be selman avan ler ou fer li *accountable*, ou bezwen fer sir i kapab, sa ki ou pe demann li pou li fer, i kapab fer, in ganny montre. Akòz sa osi tou nou pa kapab.

E par ler, ou konpran. Oule sey rode ou. Ou bezwen pran en dimoun ki annan en bon latitud, e nou dir vini nou ava montre ou ki manner pou fer. Nou ava travay

ansanm, e ou pa kapab tro *tough* lo li, akòz ou senpleman nou pa'n devlope.

Me avek ledikasyon nou'n konmans fer koze pou nou bann zenn profesyonnel ki anvi pran en karyer dan zesyon *sport*. Pa zis atlet, *coach*, zesyon, pou nou kapab al fer sa bann *training* neseler.

E CEO mon konnen in fini konmans koz avek Liniversite Sesel, avek TGMI, pou li konmans fer bann *course*. Mon'n en pti pe long Mr Speaker, eskize. Me selman i neseler pou nou eksplike. E mon ti ava kontan osi ki CEO petet i donn en pti pe plis detay lo sa ki mon'n dir. Mersi.

MR SPEAKER

Mersi Minis. CEO, ou kapab kontinyen?

CEO MARC ARISSOL

Mersi Mr Speaker. Bonzour Mr Speaker. Bonzour tou bann Manm Onorab ki prezan, e tou bann ki pe ekout nou. Petet Onorab Henrie, mon'n touse par ler ou dir mon ki manner ou'n santi, parske letan mon ti met sa soulye mon osi, *this is what* mon ti santi.

Mon ti trakase, parske mon'n demann mon lekor, *what has happened in the past?* Mon pa pe vin fer *blame game* mwan, pa mon lentansyon. Me selman sa ki mon'n demann mon lekor, akòz i en manman *task* devan mwan. Kot mon konmanse, kot mon fini?

Me selman i annan lespwar, akòz nou bezwen prioritize. E se sanmenm sa, petet ou'n demann en kestyon ki *powerful*, e mon kontan ou'n demann sa kestyon ki nou, konman Manm Lasanble nou kapab fer. E bomaten mon pe demann zot konman Manm

Lasanble, annou travay avek mwan, *ok?*

Sport, napa naryen politik ladan. *Sport* i pou nou pei, *sport* i pou Sesel. Annou travay avek mon, donn mon zot sipor lo nivo bidzeter, aköz nou annan en pe travay nou pe fer, parey Minis in dir pli boner. Nou pe seye pou nou profesyonaliz *sport*.

I annan bann *talk* ki nou pe al fer pou nou ganny plis bann dimoun profesyonnel. Prezidan in fer sa mansyon lo sa meday Olenpik. Tousala nou bezwen *beef up* nou kapasite pou nou kapab delivre sa nivo sportif Sesel alaoter.

E nou pe demann osi...I annan en kantite travay osi nou pe bouz ver *result based*, aköz nou pa oule ki *taxpayers money*... Parey ou'n dir sa mo, ki *taxpayers money* i ganny mal servi. Nou anvi ki *taxpayers money* i ganny servi byen. E menm si nou konnen poudir *sport* i en *risk*, i vremen riske, me nou anvi ki nou annan bann sistenm resers, *sport science* ki a gid nou lo ki mannyer pou nou envestir. *Ok*.

Lo nou bann lenfrastruktir osi, nou pe...La mon apresye en kantite Ms Nibourette i la pe ed nou. Nou napa en Direkter Proze pou le moman. So, nou pe rode. Petet nou riske al an deor. Mon'n ganny en dimoun ki'n apros mwan. So, tre byento nou a kapab ganny en dimoun. E sa dimoun ava kapab la pou *monitor* tou bann proze lenfrastruktir, e nou ava annan osi en *maintenance plan*, ki a fer sir ki nou a kapab kit nou bann lenfrastruktir alaoter. I pa ava ariv kot in ete ozordi, aköz mon asir ou si ti annan bon *maintenance*, *alright*, nou pa ti pou ariv kot nou ete ozordi.

Yer nou'n soke avek en dimoun ki'n vini pou vin en teknisyen, ki dir nou tou le 15an nou sipoze re tir sa *tartan track* e remet en nouvo *base*. Me nou nou'n ariv 30an e prezan la nou bezwen al kas li. So, i pou tard nou louvraz en pti pe plis tousala.

So, i enportan-i enportan ki parey mon pe dir, ler nou ava annan ase kapasite an term lenfrastruktir, nou a kapab mentenir nou bann lenfrastruktir alaoter pou nou bann atlet kapab servi. Mersi bokou Mr Speaker.

MR SPEAKER

Mersi. Mersi *CEO*. Nou pou termin avek sa 2 Manm ki'n lev lanmen deza. Onorab Gabriel e apre Onorab Larue. Onorab Gabriel ou kestyon.

HON CONRAD GABRIEL

Mersi Mr Speaker. Ankor enn fwa *welcome* nouvo *panel*. Mr Speaker, atraver ou mon osi mon form parti sa group *MYS*CC, kot dernyerman nou ti fer en pti *visit* Praslin, La Digue. Parey Onorab Henrie in sey dir, i osi i en pti pe konsernen. Mon osi mon'n vremen konsernen, be solman an realite nou la pou nou vin fer dibyen. Parey *CEO* in dir, pa vin *zwe blame game*. Nou'n zwenn en keksoz la, annou travay lo la, annou fer nou *best*.

Be solman Minis, mon ti a kontan dir ou mon ti zwenn en fiy, en fiy en pe vremen determine -. Elsie Ernesta. *Sorry*, i pa'n dir mwan nonm son non, me selman i en dimoun ki pe travay *Sport Complex* La Digue. *CEO* mon krwar ou'n zwenn li. I annan serten keksoz ki ou bezwen *take up* pou sa fiy. Mon vwar i vremen determinen, i anvi al devan. I ankor en zenn fiy. I anvi La Digue i devlope. Mon ti a kontan zot donn li sa sipor total,

akož si zot pa tyonbo li, i pou ale, *hopefully*.

Dezyenm keksoz Minis, mon'n tann fiy la in dir. *Sorry*, Madanm, in dir kot *very soon* foutbol pe al fini sezon pou zot kapab *repair* sa laplenn. Solman foutbol i pa fini. Petet i pou annan bann lezot konpetisyon lo nivo Lafrik or enternasyonal ki bann dimoun pou partisip ladan. Mwan, mon ti a kontan konnen egzaktman, ki eski i annan en landrwa ki'n determinen, ki'n *earmarked* pou sa bann *sportsmen* kontinyen *training*, malgre sezon foutbol i fermen? Mersi.

MR SPEAKER

Mersi. Mersi Onorab pou ou komantr ki'n... I annan... Sa dernyen keştyon mon krwar in deza ganny adrese, me selman si *panel* i kapab zis klarifye pou nou kapab pas lo lot keştyon.

MINISTER MARIE-CELINE ZIALOR

Mersi Mr Speaker. Lo sa komantr ki Onorab in fer konsernan travayer. En travayer. Nou, nou donn garanti tou nou travayer, tou nou travayer dan *sports*, *NSC*, kot departman. Tou nou pran konsiderasyon. Tou dimoun i ganny pran konsiderasyon, zot bann laspirasyon, e lafason ki mannyer ki nou ankadre zot, e donn kapasite sirtou pou zot kapab deservi pli byen domenn ki zot ladan.

Dezyenm keştyon mon krwar *PS* taler, ouswa Ms Nibourette in eksplik en pti git, ki bann alternativ ki Federasyon Foutbol... E Federasyon Foutbol mon bezwen fer kler ki se bann Federasyon ki pran sa responsabilite zot, pou zot rod alternativ. E zot... Foutbol i koz byen avek nou.

Zot tanzantan an diskisyon avek nou pou rod alternativ, e zot fer byen sa pou zot kapab vwar alternativ pou zot bann, swa *league* ouswa bann *training* ganny fer. Si pa Sesel, me selman aletranze, pou bann konpetisyon ki pe vini. E mon mazine zot annan tou bann detay bann alternativ. Mersi, Mr Speaker.

MR SPEAKER

Mersi Minis. Keştyon Onorab Flory Larue.

HON FLORY LARUE

Mersi Mr Speaker. Bonzour Minis ek ou delegasyon. Bonzour tou dimoun dan lakour. Mr Speaker, mon ti a kontan demann Minis, anvi ki sa *complex* ti ouver an '96, la i fer 27an depi ler i ann egzistans, e Minis Finans dan Gouvernman *LDS* an Zen, 2022 in *join* nou Minister pou donn nou sa sipor, pou regard tou bann lenfrastriktir pou kapab remet *sport* azour.

E R1.75milyon in ganny mete pour sa *Complex La Digue*, eski ou kapab dir nou si sa i enkli osi demarkasyon sa propriyete sa *complex*, akož dapre nou konpran i annan serten *issue* avek son demarkasyon, ki kapab osi ede pou fer li vin pli meyer pou *sportsmen* si i annan en bon demarkasyon? Mersi.

MR SPEAKER

Mersi. Minis, repons?

MINISTER MARIE-CELINE ZIALOR

Mersi Mr Speaker. Sa bann detay Ms Nibourette i ava donn li. Mersi Mr Speaker.

MR SPEAKER

Yes, Ms Nibourette.

DG GYRA NIBOURETTE

Mersi Onorab pou ou kestyon. *With regards to* demarkasyon, wi dapre Lagreman ki Federasyon Foutbol in gannyen, se ki i bezwen fer sa *survey*, aköz ki mannyer later i ete pou li kapab kit sa lespas pou annan sa *right-of-way* pou bann dimoun ki reste bor Kolibri la, bor laba deryer. I bezwen annan en lespas pou zot aköz i lo menm propriyete. So, nou pou bezwen fer en *survey* Federasyon Foutbol pou zot kapab tir sa bout later avek. Mersi.

MR SPEAKER

Wi, siplemanter. Terminen Onorab Larue.

HON FLORY LARUE

Mersi Mr Speaker. Mr Speaker mon ti a kontan demande si letan sa demarkasyon i ganny fer, si sa sizesyon ki Onorab Henrie in fer kot en lespas i kapab ganny demarke, kot bann zwer i kapab fer *training*, aköz en fwa ki nouvo laplenn i vin an plas, dapre mon konpran *training* pa pou ganny fer lo laplenn, me zis *games* ki pou ganny zwe lo laplenn. Eski i annan lespas pou en *training ground*? Mersi.

MR SPEAKER

Mersi. Ms Nibourette i ava adrese.

DG GYRA NIBOURETTE

Mersi Onorab pou ou kestyon. Kot pou fer sa demarkasyon, i zis pou semen transpor avek piblik. Me selman dan kote li menm, i annan en bout later ki pou NSC, ki nou pe mazin pou servi sa pou *turn* li into sa *training ground* pou nou bann tim. I annan en bout par kote. Mersi.

MR SPEAKER

Mersi Madanm. Avek sa, nou a terminen pou sa kestyon. E osi i a le moman pou nou pran en poz. E nou a rebran kestyon 11er. Mersi.

(BREAK)

MR SPEAKER

Nou rebran. Nou'n ariv lo kestyon nimerò 32 dan non Onorab Richard Labrosse. Onorab?

HON RICHARD LABROSSE

Mersi Mr Speaker. Ankor enn fwa bonzour tou dimoun, tou -nouvo delegasyon Minis. Mon rekonnèt nouvo *CEO NSC*, Mr Arissol. Mon dir ou felisitasyon e byensir avek lagras Bondye nou priye ou a kapab akonplir avek tou sa bann defi ki ou'n vin zwenn dan sa Konsey.

Mr Speaker kestyon 32 i al *comme* swivan:-

Eski Minis pour *Sport* i kapab enform Lasanble si i annan okenn rekonpans spesyal pour bann atlet otreman kapab zis parey *sport award* pour bann atlet ki kapab?

MR SPEAKER

Mersi Onorab. Minis repons silvouple.

MINISTER MARIE-CELINE ZIALOR

Mersi Mr Speaker. Mr Speaker nou bann atlet ki al reprezant Sesel dan bann konpetisyon mazer i annan *Scheme* kot NSC pour bann rekonpans. Byensir dapre mwayen bidzeter.

E nou pa fer okenn diskriminasyon. Lannen pase letan nou bann zenn atlet ti fer sitan byen dan konpetisyon *CJSOI* zot a rapel, zot tou, zot tou, enkli bann atlet anti-spor zot ti ganny rekonpanse. E dan seremoni ki nou'n fek fer la semenn pase Mr Speaker, nou'n osi

rekonnet nou bann atlet anti-spor parey tou lezot atlet. Mersi Mr Speaker.

MR SPEAKER

Mersi. Siplemanter Onorab Labrosse.

HON RICHARD LABROSSE

Mersi Minis pour ou repons. Minis mon'n note osi ki ou'n dir ki i annan en *Scheme* kot *NSC* pour tou atlet. E la vi ki mon kestyon i pe baze lo bann ki otreman kapab.

Kekfwa detayman enn pti pe an bref si ou ti kapab donn bann detay lo sa *Scheme* kote sa bann atlet ki nou'n mansyonnen la zot antre ladan? E dezyenmman Minis lo kote osi bann lantrener ki prodwi zot, ki antrenn zot, zot osi ki bor zot antre oubyen eski i annan okenn *Scheme* zot osi ki antre ladan? Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon pa konnen si mon'n sezi byen dezyenm kestyon. Eski Onorab Mr Speaker i pe demande si sa bann lantrener osi i ganny rekonpanse pour zot atlet ki fer byen. *Ok*. So i pe sakouy latet savedir, wi.

Mon pour pran sa enn dezyenm avan. Bann lantrener si antrenn Nasyonal i ganny peye, i ganny peye pour li kapab delivre son travay e *Scheme* pour lemoman i pour atlet. I pour atlet ki zot pour lemoman kekfwa zot pa profesyonnel zot pa pe ganny peye e sa i en lankourazman pou –

Nou rekonnet, nou konnen poudir zot, zot tou zot sikse ki zot fer i enkli pa zis lantrener. I enkli

en gran group dimoun deryer zot, nou pa kapab rekonpans zot tou. Me selman mon mazinez zot rekonpans i vin atraver sa bon rezilta ki montre ki zot metod ki zot in servi in mars byen.

Me pour sa atlet li menm li ki'n ale ki'n perform, sa in toultan kiltir ki nou rekonpanse. Lo lakantite rekonpans parey mon dir, pour premye kestyon Mr Speaker i depan lo Bidze. Nou pa kapab par egzanp dir tel sonm pour Zwe de Zil, tel sonm pou - i toultan depann lo – selman sa *Scheme* i dir ou rekonpanse, i dir sa ki ganny lor mon pa konnen ki serten poursantaz ek sa ki ganny *silver* ensidswit.

Me selman mon pas laparol avek petet *CEO NSC*, ki ava donn enn pti pe plis. Zis poudir ki nou napa en sonm defini toultan, i pour toultan depan lo Bidze ki nou annan. Mersi Mr Speaker.

MR SPEAKER

Mersi Minis. *CEO*?

CEO MARC ARISSOL

Mersi Mr Speaker. Mersi Onorab pour ou kestyon. Onorab pour lemoman la nou pou, nou pa ankor travay vreman lo en nouvo *Scheme* la pour Zwe de Zil, ki pe vini. Me mon kapab donn ou - aköz rezon ki nou pa ankor travay lo la se aköz nou bezwen regard Bidze avan.

Aköz nou osi pe al fer nou *Donors Forum* soon. So plis ki nou ganny *sponsorship*, prezan nou a kapab *top up*, *ok*? Me zis pour donn ou enn pti revu an 2019 dernyen Zwe de Zil avek en meday lor, en atlet i ganny li R40mil e ti annan en *sponsor* ki ti ed nou pou fer li vin R50mil, *ok*? Me selman nou, nou *quota* ti 40mil. Avek en meday bronz *sorry - silver*, nou ti donn zot

R25mil e avek en meday bronz ou ti ganny ou R12mil, *ok?* Mersi bokou Mr Speaker.

MR SPEAKER

Mersi. Onorab Naddy Zialor ou kestyon?

HON NADDY ZIALOR

Mersi Mr Speaker. Bonzour Minis, bonzour tou dimoun lo *panel*. An premye lye mon ti a kontan swet bon kouraz Tim *Special Olympic* ki pe al an *Germany* byento. Mon asire Sesel nou tou, nou pe esper zot e nou pour kontinyen donn zot sa lankourazman. Minis baze lo larepons ki ou'n donn Lasanble bomaten.

Parey ou konnen sa group dimoun i en group ki ase annan bokou demann. Demann en term *training*, i pran bokou preparasyon, e parey ou'n dir i annan bokou dimoun ki *behind the curtain* e pe donn sipor. An term *NSC*, an term *NSC* dan bann preparasyon *training* e bann *technical support*, eski *NSC* pe donn sipor o maksimonm sa group dimoun?

E eski zot osi par lefe ki ou'n dir napa diskriminasyon, eski zot osi zot benefisy e avek nenport ki benefis ki annan a dispozisyon bann diferan klib e lasosyasyon? E petet an menm tan la i ava en loportinite pour donn nou enn pti avangou *what is the way forward* letan i ariv an sa ki konsern *Special Olympics* Sesel. Mersi.

MR SPEAKER

Mersi Onorab. Minis ou repons.

MINISTER MARIE-CELINE ZIALOR

Mersi Mr Speaker. Definitivman *Special Olympics* i lo nou radar e depi lannen pase nou - mwan

personnelman mon pe rod zot aköz letan nou ti fer sa nou demars avek *Cyprus* sirtou - aköz zour Prezidan *Special Olympic* sorti *Cyprus* e i ti vin Sesel lannen pase. Nou ti pe fer sa bann demars pour nou reviv pour nou revwar, redinamiz *special Olympics*.

Zesyon lantrennman, devlopman tou bann disiplin, tou bann diferan regroupman sportif i tonm anba parasol sa bann lasosyasyon avek bann Federasyon.

E taler avan poz mon pe koz lo bann defi ki nou gannyen avek kapasite pour kapab annan e depi lannen pase nou a pe fer demars pour nou kapab raprose *NSC* pli pre avek bann dimoun ki lo Komite, ki ansarz zesyon *Special Olympics* Sesel, i enn pti pe dorman i pa telman aktiv parey nou ti a swete i ete pour nou kapab fer.

E pour nou met nenport ki konpetisyon lo nou radar, nou bezwen ganny sa bann antreyen avek sa bann dimoun e ganny zot Bidze, ganny zot program. Pa zis pour sa lannen, konpetisyon pour 5an, pour 10an ki nou demann zot souvan e malerezman, malerezman Mr Speaker nou bezwen tay deryer pour nou kapab ganny sa bann program.

E lo kote pour nou kapab donn sipor sa bann group atlet ki pe ale, mon pour kapab dir, mwan personnelman mon'n bezwen fer enn pti pe tay deryer pour dir ek zot raprose, vini nou kapab regarde e *CEO* taler i ava dir egzaktman ki mannyer in siport zot.

Nou annan fason nou ava kapab siport zot, menm si zot pa ti ankor demann nou;- menm si nou pa ti'n met zot dan nou Bidze, nou ti'n dir non nou bann atlet anti-spor nou bezwen get zot e nou'n fer sa demars nou menm nou sa enn

nou'n al rode sa. Sa enn nou'n al rode nou menm nou pour nou kapab vwar ansanm e nou pe fer bann demars avek Komite enternasyonal *Special Olympics* pour nou kapab fer ki Sesel i pli aktiv, akoz i annan sipor, i annan sipor kapasite finansyel lo nivo enternasyonal. Fodre nou Lasosyasyon Federasyon isi i for e i annan kapasite pour nou kapab fer sa bann lantreprena.

Me selman nou, nou avek zot nou atrap zot lanmen pour zot kapab arive lo sa nivo pour nou kapab fer li. E letan zwe pour deroule i pour annan bann *meeting* ki nou pour fer pour nou kapab fer sir ki Olenpik Spesyal i for.

E mon rapel en lepok ti vreman for sa Sesel e nou ti annan bann zoli rezilta pour nou bann atlet. E mon ti a kontan Mr Speaker pas laparol avek *CEO* Arissol pour li koz lo spesifikman sa ki Onorab in demann lo bann sipor led ki nou'n donn zot pour sa enn la. Mersi.

MR SPEAKER

Mersi Minis. *CEO* wi.

CEO MARC ARISSOL

Mersi Mr Speaker. Mr Speaker lo kote anti-spor parey tou bann diferan Federasyon ki pe al Zwe de Zil la bann disiplin zot osi zot in ganny zot Bidze e nou pou siport zot dan nenport ki fason ki zot vin kot *NSC*, pour nou kapab fer sir ki zot osi zot pa ganny kit deryer. Mersi.

MR SPEAKER

Mersi. *PS*.

CEO MARC ARISSOL

Pour azoute – (Eskiz mwan Mr Speaker) pour azoute osi nou'n fek *sponsor* zot 10 tiket pour zot al dan sa konpetisyon enternasyonal

Germany, ki pe vini. So sa osi bann fason sipor. Me selman enn pti lapel ki mon ti fer avek sa Komite se pour fer sir zot notifie nou, zot travay avek nou kot nou *NSC* ki nou kapab met serten keksoz dan Bidze, ki i a garanti ki nou a kapab siport zot pli meyer. *Ok?* Mersi bokou Mr Speaker.

MR SPEAKER

Thank you. Nou a termin avek kestyon Onorab Wallace Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis avek ou *panel*. Bonzour tou Manm Onorab. Mr Speaker dan menm laliny sa kestyon ler nou pe koz lo sipor pour bann atlet otreman kapab, eski Minis i kapab dir nou si par egzanp *Scheme* Rekonpans pour bann atlet an zeneral. Eski nou pe koz menm kalite rekonpans par egzanp pour en meday lor, si en atlet ki pa atlet normal, ki pa annan dezabilite i ganny en meday lor par egzanp, eski en atlet otreman kapab i osi i lo menm nivo rekonpans?

Apre letan Minis pe koz lo par egzanp i depan lo Bidze, pour nou kapab determin lo ki sipor - ki rekonpans ki en atlet i gannyen. Eski Minis i kapab dir nou si zot annan bann fon spesyal. E la mon pe mazin par egzanp sa aktivite ki ti fer *State House* an sa ki konsern *raise funds* pour serten aktivite.

Akoz mon'n vwar - e menm Onorab Deputy Speaker ti'n fer *posting* lo *Facebook* ti dir sa fon, sa aktivite pour *cater* pour bann atlet, pour bann aktivite parey Zwe de Zil, Zwe Lafrik.

So si Minis ti kapab konfirman si eski sa aktivite ki ti fer *State House*, i pour *raise funds* osi pour sport? Si Minis i kapab

konfirm sa akoz mon pe - nou'n vwar sa dan domenn piblik e nou pe *enquire*.

Dernyen Mr Speaker, si Minis i kapab dir nou an term *Sportsman of the Year* sa lannen ki'n arive si i annan okenn sanzman? Mersi bokou.

MR SPEAKER

Mersi. Onorab Henrie ou le ...

HON GERVAIS HENRIE

Wi akoz Onorab in mansyonn mon non.

MR SPEAKER

Wi.

HON GERVAIS HENRIE

I made a mistake on my posting. E mon ti korize lo mon wall. Sa ti en zafer lo mon wall, mon zafer prive, mon ti'n fer en fot konsernan sa zwe. Larzan ti pou al pour Lenstiti Lar e mon'n fer en koreksyon, mon'n edit mon post. So pour dimoun ki pe vey sa zaksyon, ti'n merit vwar. Mersi.

MR SPEAKER

Mersi. Onorab annou pa tro *rely on* lo sa ki pase dan medya. Minis, Minis ou kapab donn repons.

MINISTER MARIE-CELINE ZIALOR

Mersi Mr Speaker e mersi Onorab Henrie pour klarifye sa. Nou ti a kontan nou si en pe fon ti ava vin kot nou. Pour premye kestyon lo kote lakantite, lo kote legalite ki rekonpans bann atlet anti-spor avek bann lezot atlet?

CJSOI in montre nou, ti napa - mon ti dir dan mon larepons mon'n dir Mr Speaker napa diskriminasyon. I pour depan lo ki nivo sa konpetisyon i ete, Zwe de Zil

i en nivo *Commonwealth* i en lot nivo, Olenpik i en lot nivo, i baze lo la. Lo kote *special fund* mon ava les *CEO* eksplike i annan demars ki i a pe fer pour ganny enn pti pe plis *fund*.

Lo sa trwazyenm pwen Mr Speaker *Sportsman of the Year*, nou'n eksplike, vi ki bann Federasyon Lasosyasyon lannen pase ti dir zot pa ankor pare nou pa kapab, i ti pour *unfair* - pa zis, pour nou donn en kouronn meyer atlet zonn, meyer atlet fanm dan sa bann sirkonstans kot i annan bann disiplin ki pa'n ganny sans avek restriksyon pour spor kontak ensidswit, ki ti ankor anfors en pe letan lannen pase. Pa'n posibil.

Me selman ki nou dir annou kantmenm sa, donn en seremoni rekonesan ki nou'n fer semenn pase, i pa ranplas *Sportsman of the Year* li. I zis en keksoz ki nou'n anvi fer parey nou ti fer seremoni pour rekonpans, pour nou kapab felisit nou bann atlet *CJSOI*; parey nou ti fer pour bann ansyen atlet lannen pase.

Tanzantan nou pe fer sa bann levennman pour nou rekonnnet - Nou bezwen anmenn en kiltir avek nou lasosyete, avek nou pep, pour annan rekonesan, pour nou rekonnnet. Akoz en kantite fwa, en kantite dibyen i ganny fer ouswa dimoun i fer keksoz byen, kot nou pa rekonnnet, nou pa dir mersi nou, nou sirtou dan spor nou'n komans fer sa en pe pour nou, pour nou - tanzantan nou fer kot nou anmenn bann dimoun e nou annan en rekonesan.

E semenn pase i ti pour nou rekonnnet sa bann atlet ki malgre *COVID*, malgre difikilte, e sa zot Lasosyasyon Federasyon ki'n swazir zot ti'n kontinyen. Zot kontinyen e zot in montre serten

bann kriter bann Lasosyasyon Federasyon ansanm avek NSC in set ki pour nou kapab fer relansman osi spor konpetitiv, apre pandemik spor. Sa ki nou ti pe selebre semenn pase i pa ranplase.

Tou keksoz i al byen, mon pa vwar rezon akoz sa lannen i en lannen kot sports in bouz en pe, e akoz la i annan en Zwe de Zil tou ki nou pa kapab annan en Kouronnman Meyer Atlet Zonm ek Fanm pour lannen 2023.

Mersi Mr Speaker selman mon a ti a kontan ou permisyon pas laparol avek CEO, pour koz lo sa *special fund*.

MR SPEAKER

CEO ou adrese.

CEO MARC ARISSOL

Mersi bokou Mr Speaker. Onorab *in terms of special fund* nou pe osi travay lo nou *Donors Forum*. E sa *Donors Forum* i pa pour zis pour Zwe de Zil, nou pe osi target *the Road to Paris*, pour Olenpik, *the Road* pour *Los Angeles*.

E nou pe fer li kot nou le ganny tou nou bann diferan *sponsors*, kot nou edik zot ki sa larzan pour ganny servi. Parfwa si nou pa konnen kot sa larzan pe ale nou pa anvi donner. So nou edik zot e la nou pour demann zot pour zot fer en kontribisyon.

Nou pe osi travay lo en kont spesyal labank, en pe parey *COVID Fund* ti annan parey tro lontan. So i pour menm parey. E li ava azir konmsi en *Contingency Fund* ki letan petet nou pa'n prepar prevwar serten keksoz, i a kapab siport nou bann atlet dan sa fason.

E sa i ava osi ed pour *Special Olympic* parey, *ok?* E petet mon ava lans lapel osi pour avek zot tou bann *MNAs*, pour ankouraz

kominote biznes Sesel pour *reach out* anver nou *Donors Forum* ki pe vini tre byento. Mersi bokou Mr Speaker.

MR SPEAKER

Mersi CEO. Kestyon, wi kestyon nimer 33 ek 35 i lo menm size e nou'n dakor pour pran tou lede ansanm. Me nou a pas nimer 34avan apre lo 33 ek 35 i lo *sports infrastructure*, mon krwar zot a ganny letan pour kapab egzamin sa. Onorab Georges Romain, kestyon 34.

HON GEORGES ROMAIN

Mersi Mr Speaker. Mr Speaker mon kestyon i lir koumsa: - An vi ki Zwe de Zil pou fer sa lannen, eski Minis i kapab dir avek nou Lasanble.

a) Ki kalite preparasyon pe ganny met an plas, par egzanz *training camps*, pou nou bann atlet fer lantrennman?

b) Konbyen pou kout pei pou preparasyon pour sa zwe?

c) Konbyen pou kout pei pou partisip dan sa zwe? Mersi Mr Speaker.

MR SPEAKER

Mersi Minis ou repons.

MINISTER MARIE-CELINE ZIALOR

Mersi Mr Speaker. Mr Speaker pour premye kestyon. Preparasyon bann atlet pour nenport ki zwe i ganny determinen, ganny prepare, e organize par bann diferan Lasosyasyon ek Federasyon Sportif respektif.

Zot bezwen soumet zot bann plan avek NSC pour konsiderasyon e bann diskisyon i ganny fer. Kalite preparasyon i varye dapre bann diferan disiplin e NSC ansanm avek medya, in met an plas program

pour nou konnen bann preparasyon sak bann disiplin en pe parey ki nou ti fer avek *CJSOI*.

E nou'n lans osi en *website* semenn pase, pour donn plis lenformasyon lo sa bann preparasyon. E mon konnen aköz mon'n vwar i annan bann program pare egzanp ki'n fini ase lo *SBC* pour serten disiplin e lezot i ava swiv.

Nou pe osi fer program, pour donn en pe plis lenformasyon lo nou seksyon Spor O Nivo son program, e pour eksplike ki mannyer bann keksoz i ganny deroule enkli bann preparasyon ki mannyer i ganny deroule.

Nou plan se pour annan plis metod preparasyon ki modern, e ki lo standar enternasyonal e ki sirtou swiv prensip syantifik. E pli gran preparasyon Mr Speaker ki mon anvi koz lo la se disiplin. Sa i nou pli gran preparasyon ki nou'n vwar bezwen letan nou pe swiv pros, ki mannyer bann preparasyon pe ale.

E la letan mon pe koz disiplin Mr Speaker mon pa pe koz lo kourtwazi, dir mersi, dir silvouple e dir bonzour, mon a pe koz lo latitud, mon a pe koz lo bann konportman, mon a pe koz lo bann devouman personnel ki pa zis atlet komans depi nou, la ki lo zot sa latib e i desann i al kot tou bann ankadrer kominote sportif an antye e i en kiltir ki nou bezwen amelyore lo ki konsern sa.

E mon ti a kontan fer sorti, rezilta ki nou'n gannyen avek *CJSOI* lannen pase en kantite e avek menm lekip Foutbol Nasyonal, en kantite se aköz disiplin. I pa neserman - mon konnen i annan bokou bann konplent ki'n vini aköz ou pa swazir tel atlet, tel atlet dan bann preparasyon. Me nou bezwen pran disiplin premye an term

preparasyon. Sa i premye ki al avek son devlopman emosyonnel e osi sirtou en bon pe preparasyon diferan sa lannen.

Met bokou, bokou lanfaz lo preparasyon mantal. E mwan letan enn de konpetisyon dernyenrer ki mon'n ganny sans vwar, mon vwar mankman preparasyon mantal. E nou bann atlet Seselwa zot annan bokou talan, bokou abilite selman zot per, per vitman, per enn pti pe vitman.

E nou konnen nou popilasyon i ptipti ler nou al bann gran, gran lasal ki annan 20mil dimoun, 40mil dimoun i pa fasil. E bann preparasyon sa in enn pti pe plis lo nou radar.

E nou pe kont bokou lo sipor tou dimoun ki form parti lakominote sportif Mr Speaker pour ede pour elev sa nivo disiplin ki mon a pe koz lo la. E met - pa zis, devlopman e preparasyon fizik, lo en standar enternasyonal - annou anmenn nou disiplin lo en nivo enternasyonal.

Mon krwar nou tou nou konnen bann atlet ki o nivo, ki profesyonnel i bann atlet, ki ganny met anba *microscope* plis dan lemond. E dek koman en senp pti komanter, *even* en komanter deplase zot ganny pini e si nou anvi nou bezwen le tou lede. Si nou anvi ki nou bann atlet zot nivo i annan en formil ki mars avek - e en pe lo sa kote preparasyon, nou lo nou kote nou met lanfaz lo la. Me lo laspe teknik, sa i avek sa bann *expert* dan zot bann diferan disiplin. Mersi Mr Speaker.

MR SPEAKER

Mersi. Minis bann lezot.

MINISTER
ZIALOR

MARIE-CELINE

Non, wi, wi, wi...

MR SPEAKER

Size kestyon lekel ki pou adrese?

MINISTER MARIE-CELINE ZIALOR

I ankor annan de kestyon. Non-Mr Speaker mon pa ankor fini. Mersi.

MR SPEAKER

Ok.

MINISTER MARIE-CELINE ZIALOR

Eskize. Pour dezyenm konbyen pour kout pei pour preparasyon sa zwe? Bidze ki NSC in gannyen Mr Speaker avek Minister Finans, pour preparasyon i tonm lo en lavalier R16.5milyon.

Me nou osi pe ganny sipor avek enn de bann pei ki pe ede avek preparasyon, ki an deor i tonm an deor sa Bidze. E nou pe lans lapel avek tou lorganizasyon e biznes parey CEO in fer, ki i ti ava swete pour zot siport lekip Sesel pour kontakte NSC e fer sa o pli vit posibil pour nou deryer *Team Seychelles*.

Trwazyenm konbyen pour kout pei pour partisip dan zwe prezan? Mr Speaker pour partisipasyon i pour kout nou apepre R20.4milyon. E mon ti ava avek sa profit lokazyon pour demann pep Seselwa, annou siport tim Sesel. Parey mon konnen zot kapab fer li. Nou dir zot mersi bokou, pour bokou sipor ki zot ti donn nou bann zenn lekip *CJSOI*.

E manrmay ti fer mirak, manrmay ti triple sa bann meday lor! E mon konnen poudir Zwe de Zil Seselwa nou fer byen sa bann mirak nou. Mon krwar nou kapab fer plis ankor e mon krwar poudir, nou kapab Mr Speaker, nou pep

deryer nou lekip Zwe de Zil. Mersi bokou.

MR SPEAKER

Mersi. Onorab Romain ou annan siplemanter?

HON GEORGES ROMAIN

Mersi Mr Speaker. Minis mersi pour ou larepons. Minis ler mon get lo kote sif, si mon'n byen fer mon kalkil i tonm apepre R37milyon an total pour Zwe de Zil. E sa i bokou larzan e mon kontan ki nou Gouvernman pe *invest* dan nou zenn, dan nou bann atlet al partisipe akoz i nou devwar pour nou fer li. E mwan mon donn zot tou lankourazman.

Me selman mon kestyon Minis, sa i en problem ki toultan nou'n rankontre dan lepase. Nou bann atlet byensir zot pe travay, eski zot pe gannyen *release* dan zot landrwa travay pour zot fer zot *training*? Akoz zot *training* i vremen enportan. Mon ti a kontan Minis si ou ti kapab dir nou si zot pe ganny sa bann *release* - si zot a pe mars - si sa i ok?

Mon dezyenm kestyon Minis an vi ki nou okouran ki Federasyon Naze napa en Federasyon Naze pour lemoman. E nou konnen ki naze toultan i fer byen, dan Zwe de Zil e nou annan bann *top, top* atlet lo kote naze. E alors mon pe demann Minis eski nou pou annan atlet lo kote naze dan Zwe de Zil? Mersi Mr Speaker.

MR SPEAKER

Mersi Onorab. Minis repons.

MINISTER MARIE-CELINE ZIALOR

Mersi Mr Speaker. Sa premye kestyon CEO i ava eksplik bann detay lo bann laranzman ki pe - nou

a pe fasilite pou nou kapab fer. Lo kote naze i pou osi reponn akòz mon konnen depi ler in vini in pran sa men i a pe reorganiz sa lasosyasyon.

Me letan nou ti al *CJSOI* si Onorab i rapel Mr Speaker, ti preski menm avek naze, nou, nou fer sir e plizyer fwa mon'n vin dir dan Lasanble mon donn ankor nou langazman si i annan problem ek Lasosyasyon Federasyon, nou fer tou nou mye ki atlet zot pa ganny pini; ki atlet i kapab kontinyen e nou'n vwar sa kantite meday ki naze ti anmennen dan *CJSOI*, ti menm sityasyon ki nou ti ladan.

Me nou ti *step in*, e i annan en kantite travay lannen pase ki nou'n fer, pou nou kapab fer sir ki nou bann atlet i kapab partisip dan zot bann disiplin respektif ki i annan dan zwe. Mersi. Mon ti a kontan pas laparol avek *CEO*.

MR SPEAKER

Tre byen *CEO*.

CEO MARC ARISSOL

Mersi Mr Speaker. Mersi Onorab pou kestyon. Onorab lo kote *release* pou bann diferan atlet, normalman se Federasyon ki ekri *NSC* pou request zot *release*. E *as soon* ki sa i ariv kot nou, nou fer le neser. So i pa devret vin en *issue ok? Unless* si i annan en *issue* spesifik la nou sey rod fason pou nou *tackle* li. Lo kote naze, parey zot konnen Lasosyasyon Naze in ganny *struck-off* depi lannen pase sa, e nou nou'n pran responsabilite pou nou vin *caretaker*.

E ki nou'n fer, nou'n zwenn, nou ti'n kapab pran sa desizyon entern. Me nou'n decide pou nou konsilte avek bann diferan klib naze, akòz mon *believe* dan

konsiltasyon parske zot ki lo teren, zot ki pe *deal* avek.

Mon pa kapab pran en desizyon ki pou enpakte lo zot, me solman mwan ki pran. So mon anvi konsilte zot, ti en pe difisil avek pou sa konsiltasyon pa ti tro fasil, nou'n fer detrwa *meeting*, detrwa *meeting*.

Me solman finalman nou'n nobou elekte en *head coach* e nou *head coach* pou Tim Nasyonal se Mr Barnsley Albert e son asistan Robert Suzette. E nou'n osi prezan fer *meeting*, nou'n *take the lead*, zot in pran *the lead* ansanm avek nou pou fer *meeting* avek tou bann *coach*.

Akòz parey ou konnen bann sak klib, i annan zot bann *coach* osi pou nou kapab *set the scene*, lekspektasyon ki nou pe annan pou sa Zwe de Zil ki pe vini. So sa i enn pti pe sityasyon lo kote naze, nou pou partisipe e nou pou al dan Zwe de Zil pou sa lannen. Mersi Mr Speaker.

MR SPEAKER

Mersi. Klarifikasyon Onorab? Ou a terminen?

HON GEORGES ROMAIN

Mersi Mr Speaker. Mersi *CEO*. Zis enn pti leklersisman mon kestyon lo kote *release*. Mon konpran sa prosedir ki zot bezwen *go through*. Mon anvi zis en konfirmasyon avek ou *CEO*, oubyen atraver Minis.

Si i annan se problem re *lease* kekfwa zot pa ankor tann nanryen pou lemoman. Si i annan en problem *release* pou lemoman? Mersi Mr Speaker.

MR SPEAKER

Thank you. CEO? Minis?

CEO MARC ARISSOL

Mersi Mr Speaker. Parey mon krwar *CEO* in dir, nou pa ankor gannye bann ka spesifik devan nou. Me selman nou bezwen fer vwar i en negosyasyon sa. Si lo kote Gouvernman i pli fasil pour nou negosye. Ler i lo kote sa atlet i en travayer prive dan biznes prive, la i en lot negosyasyon ki nou pe fer.

Me selman mon ti ava kontan petet kekfwal al enn pti pe pli lwen Mr Speaker si ou permet par egzant mon konnen lo kote - mon konnen nou pe koz *Zwe de Zil*, me lo kote par egzant *Beach Soccer 2025*, akoz *Sesel* bezwen annan en lekip.

Federasyon Foutbol in fini komans angaz ladan pour anploy tou sa bann zwer, zot pour en baz profesyonnel pour 2an, 2an edmi ki pour pe fer sa la. E avek bann *high level* ki nou ankor pe deside regarde, byensir i pour depan lo sa *Donors Forum* lo Bidze ki mannyer nou kapab fer sa bann tel negosyasyon avek petet bann - anmezir vini. Pour montre zis pour montre poudir nou, nou pe mazin li e nou pe komans mazin enn de bann solisyon ki mannyer nou kapab bouz lo sa kote semi profesyonnel, profesyonnel avek bann atlet o nivo. Mersi Mr Speaker.

MR SPEAKER

Mersi. Kestyon Onorab Philip Arissol.

HON PHILIP ARISSOL

Mersi Mr Speaker. Bonzour *panel*. Bonzour tou dimoun. Minis mon kestyon i koumsa. Eski Minis i kapab dir Lasanble si tou Federasyon ou lasosyasyon in fini apwent zot bann lantrener ki pou travay avek bann L ekip Nasyonal pour sa zwe?

Eski tou bann eksper etranze ki sipoze ede pour travay avek nou bann lekip in ariv dan pei? Si non-kwa ki pe met retar? Epi dernyerman eski Minis i satisfelafason ki vwar lantrennman pe ale pour preparasyon bann atlet pour sa zwe? Mersi.

MR SPEAKER

Mersi Minis.

MINISTER MARIE-CELINE ZIALOR

Mersi Mr Speaker mon ti ava demann *CEO* pour reponn sa de premye kestyon. Apre mwan mon ava pran lo kote si nou satisfelantrennman. Mon premye kestyon i lo kote Federasyon sirtou, in donn zot plan e si zot bann *expert* ki sipoze vin dan pei i la. E la - e lo kote osi, si tou bann *coaches* in fini ganny apwente. Mersi.

MR SPEAKER

Mersi *CEO*.

CEO MARC ARISSOL

Mersi Mr Speaker. Mersi Onorab pour ou kestyon. Ziska la tou bann Federasyon, nou'n ganny enn pti pe lager avek Federasyon parske depi lannen pase nou'n dir zot *submit* zot plan travay.

E sa in met nou enn pti pe retar lo kote Bidze. Be selman la nou'n nabou fini, tou Federasyon in *submit*. E kote zot bann *coach*, lekel ki *head coach*. Sa i ankor pe ganny finalize, *ok* i pa en keksoz, nou pe ekspekte ki *the next coming weeks* la tou keksoz i ava finalize *pertaining to that one*.

Nou pe dekouraze ki nou ganny bann *coach* enternasyonal, parey zot konnen i annan en kou adisyonnellozistik ki vin avek, ki nou pe sey ankouraze ki nou annan

nou bann *coach* lokal *as much as possible*.

Me dan le sans kot nou napa *ok* - Federasyon i fer sa rekomandasyon e nou pou asiste. *Ok*. Mersi bokou Mr Speaker.

MR SPEAKER

Mersi *CEO*. Minis ou pou rebran?

MINISTER MARIE-CELINE ZIALOR

Wi mersi Mr Speaker. Lo kote satisfaksyon, mwan mon krwar poudir letan lannen pase - aköz mwan personelman ler mon ti zwenn avek tim *high level* kot *NSC* depi lannen pase, depi Out pour nou kapab mazin *Zwe de Zil* sa lannen, pour nou kapab anvoy bann *request* kot bann Federasyon Lasosyasyon pou demann zot ki plan? Aköz nou ti pe al dan *Bidze* pou antre pour met *Bidze* ladan.

Ou demann mwan si mon satisfè? Non, mon pa satisfè me selman mon konbran. Mon konbran sa bann mankman kapasite;- mon konbran aköz i annan bann Federasyon Lasosyasyon ki ganny difikilte pour zot kapab *meet* sa bann *deadline*, demann.

E vwala letan prezan nouvo *CEO* in vini e lafason osi ki mannyer nou'n swazir *CEO* letan Kontra enn ti pe fini pour vini, se ki zisteman en stratezi. *CEO* Arissol i en dimoun ki pa'n dan *sports* i napa en listwar person. *Sport* i annan dimoun ki annan en kantite *history* ek kanmarad e nou ankor, i ava dir ou pas letan pour nou tir konfli, fer lape, ou komans par sa avan ler Mr Speaker ou al pour ou annan en plan travay syantifik, ki ou anvi anmennen ater. E avan ler ou ganny etranze, nou bezwen met lord

dan Lakour kot nou avan ler kot nou al rod tousala.

E mon satisfaksyon i varye enn pti git, depandan lo bann Federasyon Lasosyasyon i annan ki'n fer bokou progre, i annan ki ankor an retar me nou pa dekouraze. E nou konbran, e nou pare pour nou pran sa latas. En lepa par en lepa, enn par enn, nou pran pour nou kapab pour nou kapab met a zour.

E apre nou bezwen donn bann dimoun en labitid ki zot ti napa, en kalite kiltir profesyonnel kot nou - sirtou nou de nou sorti dan domenn ledikasyon, pour nou fer en pe ledikasyon, pour nou edike pour nou vwar.

Aköz par ler i annan bann dimoun zot pa neserman pe anvi donn ou en lenfirmite zot, i zis zot pa konnen, zot pa konbran e aköz levolisyon *sports* mannyer in arive dan lemonn nou nou'n ganny kit deryer, nou'n ganny kit deryer kantite.

La prezan ki nou pe komans rebran pour nou kapab anmenn sa ver zot e nou zwenn zot lanmwatye semen, nou bezwen tanzantan retournen al regard sa bann ki pa ankor vin ek nou, pour nou al rod zot enn pti pe.

E i vre i met enn pti pe retar nou ti ava anvi ki e i pa'n ede sirtou apre avek aktivite sportif ki'n bezwen ganny restriksyon. Me selman nou reste konvenki e sirtou mwan donn mwan lespwar sa rezilta *CJSOI*, avek ki pa ti nou ti pe *train* en pe tro tar, tou sa bann difikilte, nou bann dimoun zot kapasite, zot leker ler zot al reprezant Sesel i bat vreman for.

E sa ki nou'n eksperyans *Maurice* avek nou bann zenn atlet, la adilt nou pe ekspekte ki nou sirmont, nou sirmont tousala e nou

fer, e prosen Zwe de Zil ler nou pe koz lo preparasyon. Nou kapab koz lo en lot nivo, en nivo pli syantifik lo tousala.

E mon pa konnen kekfwa petet Mr Speaker osi pas laparol avek *PS*, akoz departman osi i fer kantite demars lo sa bann led teknik enternasyonal ki la, nou'n ganny bokou avek *La Reunion* par egzanp, atraver Lanbasad Franse.

Me i annan osi, bann larestan osi tou, bann led avek zefor ki nou'n gannyen so i balanse, i annan en pe landrwa wi kou nou annan satisfaksyon e sirtou bann sipor led nou gannyen ek *Foreign Affair* akoz bann dimoun in pare zot, zot pe esper nou e nou, nou bezwen fer sir nou osi tou, nou bezwen etal sa fondasyon pour prosenn 40an 50an ki vini.

Nou pa kapab fer zis pour la, pour la i - nou bezwen fer en pe bann keksoz la pour la. Me nou bezwen osi mazin osi sa bann fondasyon lafason fer anmezir nou pe ale avek nou bann dimoun.

Me selman nou apresye bann dimoun ki zwenn nou lanmwatye semen e bann progre osi, ki mon vwar nou pe komans fer dan sa sirkonstans.

Kekfwa si ou permet Mr Speaker *PS* i a donn enn pti pe lenformasyon lo sa bann, lo sa bann demars.

MR SPEAKER

Ok. Wi *PS* ou kapab pran laparol. Be annou fer li bref silvouple.

PS RALPH JEAN-LOUIS

Mersi Mr Speaker. Lo konsernan bann led teknik, i annan bann *request* ki vini e ankor parey *CEO* i dir ou toultan bezwen refer avek sa Federasyon ki kalite lasistans i bezwen.

Si i le sa dimoun vin isi ki kalite lasistans e nou bezwen an konsiltasyon avek zot pour zot dir ki vremen zot anvi. Me i annan bann loportinite ki'n prezante e ki la i dan *pipeline*, e i kapab arive ase dan limedya. So i annan enn de sa bann ki'n le teknik ki'n prezant son lekor pour nou bann atlet. Mersi.

MR SPEAKER

Mersi *PS*. Mon a termin avek kestyon Onorab Cosgrow.

HON WALLACE COSGROW

Mersi Mr Speaker. Mr Speaker mon ti a kontan demann Minis. Eski i annan okenn atlet. Sirtou *high level* ki pe *train* pour Zwe de Zil ouswa bann lezot *games* enkli Olenpik. Ki ozordi pe pey okenn eleman zot *training* zot menm?

Mon pe fer sa demann akoz ti annan *interview* ki Prezidan ti fer avek *TéléSesel* e i to refer lo en atlet spesifik Sharry Dodin, ki ler mon pe fer serten resers, mon vwar an 2022 zot ti ganny en *scholarship*, li avek ankor 5 lezot atlet *high level*. Ti ganny en *scholarship* avek *Olympic Solidarity Fund*.

E mon pe zis gete si zot pe pey zot menm, ouswa si annan kontribisyon ki pe fer ouswa si *the scholarship* i *cater* pour *the whole* preparasyon of sa bann atlet e sirtou sa enn an partikilye? Mersi.

MR SPEAKER

Mersi Onorab. Minis repons.

MINISTER MARIE-CELINE ZIALOR

Mersi Mr Speaker. Lo sa ka spesifik nou ava regarde *CEO* lenformasyon ki i annan. Me selman mwan mon konnen ki i annan bann atlet dan lepase ki zot in - zot anvi akoz i annan bann kriter, ouswa dapre

parey mon pe dir dapre mwayen bidzeter ki si zot santi zot paran ouswa zot menm zot kapab, zot fer zot bann demars. En kantite fwa zot vini apre pour nou siplemante en pe.

Me annan dan lepase, i annan bann dimoun ki'n santi lo li menm, i anvi parey nenport ki dimoun ki anvi al pran en langazman personnel lo li menm i annan bann atlet ki fer sa. I annan ki fer ki pa dir nou nanryen tou. Lo sa kote msye Dodin mon a regarde si *CEO* i annan sa lenformasyon. Mersi.

MR SPEAKER

Mersi. *CEO*?

CEO MARC ARISSOL

Mersi bokou Mr Speaker. Mersi Onorab. Wi, Mr Sharry Dodin i lo nou program *high level*. Me solman, petet mon pour fer, mon a kapab rod en pe plis lenformasyon lo la. Akoz spesifikman la mon napa avek mwan. Mon kapab fer ou gannyen pli tar lo bann lezot lenformasyon. Mersi bokou Mr Speaker.

MR SPEAKER

Mersi *CEO*. Bon nou a bouz lo nou de kestyon ki reste, nimerò 33 i dan non onorab Georges Romain. Mon a les li poz son kestyon e apre Onorab Wavel Woodcock son kestyon e Minis i a fer larepons. Onorab Romain.

HON GEORGES ROMAIN

Mersi Mr Speaker. Mr Speaker mon kestyon:-

An vi ki bokou nou bann fasilite sportif pe al anba renovasyon, eski Minis i kapab dir avek Lasanble konbyen sa pou kout pei an 2023 e si i kapab donn detay

lo kou sa bann renovasyon lo Mahe, Praslin ek La Digue? Mersi Mr Speaker.

MR SPEAKER

Mersi Onorab Woodcock ou kapab poz ou kestyon.

HON WAVEL WOODCOCK

Mersi Mr Speaker. Eski Minis i kapab enform Lasanble ki bann travay renovasyon ki *NSC* in antreprann lo bann diferan fasilite sportif lo Mahe, Praslin ek La Digue, e ki bann lezot fasilite ki zot pou fer renovasyon lo la sa lannen?

MR SPEAKER

Tre byen donk sa de kestyon i lo renovasyon bann fasilite e kou. Onorab. Mersi bann Onorab. Minis ou repons silvouple.

MINISTER MARIE-CELINE ZIALOR

Mersi Mr Speaker. Mr Speaker lo kot i konsern bann renovasyon ki nou apel sa dan *PSIP* proze kapital nou annan:-

Travay renovasyon, demolisyon travay lo *Sport Complex* Anse Royale e sa i kout R691mil.

Nou annan konstruksyon, *tennis* avek *court handball* ankor Anse Royale *Complex*. Sa i kout R2.2milyon.

Nou annan bann renovasyon travay ki ankor pe kontinyen *Palais de Sport* dezyenm faz ki pour kout R4milyon.

Nou annan pour nou *remove* pour tir sa *tartan track* Stad Linite R800mil. Nou annan renovasyon prezan pour refer sa *tartan track*, i R6.1milyon e sa i pour en *foreign grant*.

Nou pour annan sanz twatir e travay elektrik, ki bezwen ganny fer *Palais de Sport* sa i pou 1.4milyon.

Nou annan renovasyon lo *Court Tennis Roche Caiman* e sa i pour 1.2milyon ki dan Bidze Minister Finans.

E nou annan \$40mil, sa i en *foreign grant*.

Renovasyon Kapital Proze lo La Digue ki nou'n deza adrese taler Mr Speaker. I annan travay dormitwar ki'n fini fer 2.3milyon.

E travay lo re-aranz sa *roofing* lo *grandstand* 1.4milyon Bidze total tir *foreign grant* Bidze total i 20.4milyon lo Proze Kapital 2023.

Prezan pour travay *maintenance*, ki dan Bidze 2023.

Nou annan travay elektrik lo *School Meal Centre* ki pour kout nou 1.2milyon.

Travay elektrik lo *dojo* R651mil.

Travay elektrik Stad Popiler 1.9milyon.

Travay ki annan pou fer Stad Linite 167mil.

Travay *maintenance swimming pool* avek *Sail Training Scheme* R122mil

Travay renovasyon *NSC Hall* R31mil.

Travay *maintenance Palais de Sport* R13mil.

Travay lo *Victoria Gym*, R52mil e travay lo *Freedom Square* R59mil.

An tou Bidze *maintenance* i 4.3milyon pour sa bann proze, bann gran lenfrastruktir. Apre nou annan osi Mr Speaker *maintenance*, travay *maintenance* dan bann distrik e la mon annan 22 travay 22 distrik pour 2023, ki ariv an tou R416mil. Mersi Mr Speaker.

MR SPEAKER

Mersi mon a ganny siplemanter bann Manm ki'n demann kestyon. Onorab Romain ou annan siplemanter.

HON GEORGES ROMAIN

Mersi Mr Speaker. Minis mersi pour ou bann larepons. Minis mon'n tande pli boner ki *CEO* - lo kote mentenans. Mon konnen ki pour lemoman zot napa en dimoun ki akoz sa ti menm mon kestyon siplemanter ki mon ti pe al demande, an vi ki mon konnen en pe milyon pe ganny depanse - *anyway*.

Be selman pour lemoman, an vi ki sa bann travay in fini komanse, byensir i annan ki pour fini mon pa konnen si zot pour fini ganny sa dimoun. Mon ti ava kontan konnen ki zot pou fer an se moman si zot pa ankor ganny en dimoun lo kote mentenans?

Sa i vreman enportan pour nou pa les sa sityasyon ariv ankor, kot nou vwar nou bann landrwa in an rin, i pa'n vreman zoli pour gete ek nou lizye. Akoz in kout - sa i *taxpayers money*, parey toutan nou koze. E enn pti pe epi lo kote fasilite pour sekirite sa bann landrwa kot vandalizm kekfwa i kapab arive osi tou.

Mon dezyenm kestyon dernyen Mr Speaker. An vi ki nou konnen ki bokou bann lenfrastruktir sport parey nou pe koze pe anba renovasyon.

Eski Minis pe mazinen pour zwenn bann biznes prive, kot zot kapab vin ansanm pour ede, elev sa bann nivo fasilite sportif parey nou'n vwar dan lepase kot Roche Caiman sa *fitness trail*, kot *NSC* in fer byensir.

Be selman apre sa bann lekipman legzersis lo la mon krwar i bann *sponsor* ki bann dimoun in mete e mon mazinen si zot annan nide pour travay ek bann biznes rive lo menm laliny. Mersi Mr Speaker.

MR SPEAKER

Mersi. Minis ou ava adres kestyon *please*.

MINISTER MARIE-CELINE ZIALOR

Mersi Mr Speaker. Tre briyevman avan ler mon pas laparol avek *CEO*, apre avek Ms Nibourette. I en pe - mon krwar Onorab in komans koz en pe bann stratezi ki nou'n mazin, ou dernyen se sa *public private partnership* ki pour ed nou en kantite avek mentenir bann lenfrastriktir sportif, kot nou ti napa en plan an zeneral ki mannyer pou al fer sa avek mendev.

Me selman mon ti ava kontan asir li poudir nou reste angaze. E nou pa pe les sa - in bokou in *overwhelm* nou ler nou'n vini definitivman, definitivman. E nou - mon annan en lalis 22 la dan distrik ki nou'n fini aranze. I annan ankor, ou'n nonm vandaliz pa bliye ou aranze ozordi, apre detrwa semenn pase i kas ankor, apre zot dir ou pa'n aranze.

So i sa, me selman mon ti a kontan dir mersi bokou tou bann dimoun ki pe donn nou sipor, nou pe ganny pa mal bann dimoun ki pe vini ki anvi adopte bann diferan lenfrastriktir pour nou kapab fer li. So nou reste angaze pour nou vwar sityasyon, met li an men la pour nou kapab travay, pour nou fer si ki nou aranze.

Mon ti a kontan Mr Speaker pas laparol avek *CEO* pour kestyon vandaliz avek en pe lezot stratezi. Apre en pe Ms Nibourette en pe plis detay lo sa *public private partnership*.

MR SPEAKER

Tre byen. *CEO*.

CEO MARC ARISSOL

Mersi bokou Mr Speaker. Mersi bokou Onorab pour ou kestyon. Onorab nou fer en kantite fas avek bokou vandaliz, e sa i ariv o nivo distrik. E sanmenm sa ki petet nou lans en lapel avek zot bann *MNA* - petet mon pour sansibiliz enn pti pe zot bann dimoun. Petet annan de ler i pa ni menm dimoun dan zot distrik, i petet en lot dimoun ki vini i vin fer vandalizm. I annan landrwa, kot nou met lalimyer, nou ganny en kantite konplent pe deservi kantite dimoun.

Me selman enn pti kou apre ou vwar poudir nou'n depanse, lalimyer in ganny kase. E annan de ler mon pa ganny en konpran i annan sa bann konponan elektrik zot in tire, mon pe demande si zot pa'n ganny menm ganny *elecro* - ganny tape ek kouran.

Me i konsern nou akoz e sa ki trakas nou se parfwa ou vwar dan menm distrik, ou vwar ou, ou aranze apre ou bezwen rod larzan pour re-aranze. E petet en lot distrik prezan li i ganny dezavantaze. Ou konpran. So petet la mon lans lapel, la ki nou lo *national tv as well*, pour sey dir ek bann dimoun pour dir be annou servi sa bann fasilite byen.

Akoz i pour nou tou, i pour nou zanfane i annan en kantite dimoun i vin koz ek mwan i dir mwan konmsi zot en zenn zot bann en group, zot pe sey devlop zot dan zot lasante, zot pe fer sa, zot fer sa apre ler e letan ki zot gannyen se bann letan aswar.

E ler ou vini ou kas sa lalimyer, sa bann dimoun pa pe kapab e i dezavantaze la. So alor nou pe fer lans lapel avek tou bann dimoun dan bann distrik pour zot silvouple servi nou bann fasilite byen.

Lo kote sekirite ou'n mansyonn sa keस्थ्यon osi, lo nou bann *major facilities*, i *mean* konpleks par egzanp nou annan sekirite. Me parey mon pe dir zot vandaliz i ariv dan distrik petet la kot nou napa sekirite lo sa bann lenfrastriktir. Petet zot ava kapa travay ek Lapolis enn pti pe pour fer plis patrol dan zot distrik. Mersi bokou Mr Speaker.

MR SPEAKER

Mersi wi laparol pour Ms Nibourette.

DG GYRA NIBOURETTE

Mersi Mr Speaker. Mersi Onorab pour ou keस्थ्यon. *With regards to* annan *partnership* avek bann *private businesses*, wi nou annan detrwa *actually* ki'n apros nou e zot in montre lentere dan bann diferan landrwa, *area* kot zot ti a kontan ed nou.

E nou *welcome* sa en kantite, nou pe demann plis ankor kot bann dimoun biznes i vini pour zot kapab ede avek pour *maintain* sa landrwa, pour fer sir i pa tonm zis lo Gouvernman, pour li kapab re-aranz sa bann fasilite ki nou annan.

Pour lemoman nou annan nou apepre 5-6 ki'n fini konfirm - *sort of* fini konfirmen, ki nou pe fini finaliz tou bann prosedir pour zot kapab koman antreprann bann *renovation* ki a tir sa kou lo nou, ki nou pa bezwen al dan sa bann detay. Mersi.

MR SPEAKER

Mersi. Kस्थ्यon Onorab Woodcock.

HON WAVEL WOODCOCK

Mersi Mr Speaker. Minis nou'n fer plizyer *visit* ansanm dan mon kapasite koman *Chairman* Komite pour Medya Lazenés *Sport* ek Kiltir.

Menm en *high delegation visit* ansanm avek Minister Finans nou ti fer kot *Palais de Sport* e nou'n fer de *visit* pour get bann fasilite *sport* lo Praslin.

En *visit* mon ti fer avek ou, avek ansyen *CEO* e la resaman nou fek fer en *visit* ankor avek nouvo *CEO*. Wi mon vwar bokou travay renovasyon pe ganny antreprann, me selman mon vwar konsantrasyon i plito lo Mahé. Dan sa R20.4milyon, pou Bidze 2023 i konsantre lo bann fasilite lo Mahé, apard ki sa R3.7milyon ki pe ganny depanse lo *Sport Complex* La Digue.

Mon keस्थ्यon i, an vi ki nou pe dir ozordi nou pe target en meday Olenpik, me sityasyon lo Zil Pros, lo Praslin se ki nou bann fasilite sport i dan vremen move leta. In ganny bokou neglize pour plizyer lannen - parey nou tann keस्थ्यon lo *Sport Complex* La Digue i parey pour bann fasilite lo Praslin.

E mwan mon keस्थ्यon spesifikman lo detrwa sa bann fasilite li zot leta i vremen, vremen parey ou'n vwar i ase alarman. Enn i Stad Amitié, sa *track AstroTurf* ki pe arive avek sa proze? *Watersport Center* ki deza *as CEO* i okouran mon ti lyez avek li. I annan en pe fristrasyon parmi bann atlet *watersport* akoz sa sant in ganny neglize o plizyer lannen.

Annefe mon pour *welcome back Spear* ki'n fek retournen apre in sorti en tretman medikal aletranze ki pe rebran sa *Watersport Center*. E finalman kot i konsern sa fasilite *NSC*, lo li menm ki osi i pli vye ki mon paran mazinén. e zot pa konn leta ki i ladan!

E nou, nou annan diskisyon pour fer serten nouvo fasilite parey pour *judo*, laboks ek karate o bor kot vye *warehouse STC* o bor lekor

primer si nou kapab ganny enn pti pe detay lo sa bann proze. E finalman lo sa laplenn menm, i annan serten propozisyon ki nou'n diskite regardan en *indoor gymnasium* ki pour *cater for futsal, basketball, volleyball*.

Akoz nou napa en *indoor gym* epi devan i annan sa bout lans kot nou kapab devlop *beach football*. So eski sa bann keksoz i dan zot konsiderasyon pour lefitir? Eski zot pou angaz avek piblik avek bann *sportsmen* lo Praslin pour nou ganny en konversasyon avek zot? Mersi.

MR SPEAKER

Mersi. Minis, *panel* fotespere zot in kapab sezi tou sa bann pwen. Yes.

MINISTER MARIE-CELINE ZIALOR

Wi, wi Mr Speaker. Mersi bokou Mr Speaker menm i vwar i annan en kantite pour nou fer. Mon pour pas laparol avek Ms Nibourette ki annan sa bann detay lo sa bann travay en pe son progre.

Me selman pour kestyon Onorab atraver Mr Speaker, wi i dan nou plan. I dan nou plan definitivman se pour rezon aköz ki Prezidan letan i vwar sa sit. Aköz nou a pe demande, nou a pe toultan demande tap son laport, pour li ed nou. In donn en langazman in dir be annou fer sa fasilite sportif osi tou, desantralize pour nou kapab fer lo Praslin e nou bezwen kalkil resours, kalkil ki mannyer fezabilite sa i ganny fer.

E definitivman mon konnen nou'n komans angaze, Mr Speaker avek en pe kominote spor Praslin pour nou – nou pa oule nou Gouvernman konsevwar en plan nou anvi ansanm avek zot vini, pour nou regarde ki bann demann

ki bann bezwen - pa bezwen la zis ozordi. Parey mon pe dir nou pe bezwen fer plan pour prosen 40an 50an ki bann lefitir nou pou anvi fer pour nou kapab fer byen.

E la mon a lans en lapel kekfwavek bann dimoun *businessmen* Praslin ki anvi zwenn nou lo sa partenarya *feel free* pour zot zwenn nou, pour nou kapab ansanm dan lespri partenarya parey Onorab Romain in mansyonnen, pour nou kapab ganny enn pti koudmen. Me mon ti a kontan pas laparol avek Ms Nibourette pour donn bann detay. Mersi.

MR SPEAKER

Mersi. Wi DG?

DG GYRA NIBOURETTE

Mersi Mr Speaker. Mersi Onorab pour ou kestyon. Annou komans lo *watersport*. Kot *Watersport Center from the visit* ki nou'n fer ansanm avek SIA, nou pe travay lo en *concept*. Dapre sa ki zot, zot ti pe propoze, nou pe travay lo en plan malerezman Praslin i pa'n dan sa Bidze pour 2023.

Me selman dan preparasyon pour Bidze 2024 sanmenm sa ki nou'n al Praslin byen boner pour nou kapab konnen ki zot demann, pour nou kapab met li dan Bidze. So nou pe travay lo en *concept* pour *watersport* ki nou pour vin fer en lot *meeting* avek bann dimoun Praslin spesifikman pour *Watersport Center*, pour nou montre zot sa *concept*, zot a donn nou zot *input* pour nou kapab amelyor lo sa *concept*.

With regards to Stad Amitié Praslin, Federasyon Foutbol i anvi antreprann *renovation of* Stad Amitié. Me selman lo kote Gouvernman nou bezwen *sort out*

en bout *issue*, akoz sa later ki manner in ganny *subdivide*, i annan en bout sa later ki i annan en dimoun ki pe servi.

Nou pa kapab donn en *lease agreement* si i annan de *party involve*. So nou pe *sort out* pour nou kapab *subdivide* sa later, ki zis kot sa stad i ete, i ava permet nou pour nou donn sa *lease agreement* Federasyon Foutbol e prezan an retour nou a gete ki manner nou kapab fer avek sa endividi.

Trwazyenm *NSC building*; i vre sa leta ki sa *building* i ladan i pa apropiye ditou pour bann travayer. E dapre diskisyon ki nou'n fer ansanm avek Onorab avek son tim ki ti ek nou, i osi pour dan sa devlopman kot *watersport* i ete, i pour annan en lespas ki pour ganny fer pour nou kapab abrit nou bann travayer sport Grand Anse.

With *regards to* Grand Anse *Complex from visit* ankor ki nou'n fer i annan grander ki sa *building* i ete nou kapab met en kantite *sport*. Sirtou bann *sport* konba ladan.

E nou, nou pa kapab fer sa *concept* lo nou menm. Nou pe demann- nou sipoze annan en *meeting from* sa ki nou'n gannyen avek zot, *come up with a concept, go back to* Praslin, prezant avek bann diferan Federasyon ki annan bann sportif konba e zot, zot ava dir nou sa ki nou pe vin avek i pour vo lapenn.

Akoz si nou rapel byen ti annan en proze ki ti pou fer pour *judo* e nou le *combine* tousala en sel ansanm, akoz grander ki sa *building* i ete, nou pour kapab fer en kantite keksoz.

Me selman nou bezwen planifye li byen, pour nou kapab fer li antre dan nou Bidze. Mersi Mr Speaker.

MR SPEAKER

Mersi madanm pour tou sa bann detay. Bon nou pour pran siplemanter bann lezot Manm prezan. Mon annan 5 Manm ki'n lev lanmen. Mon pour pran sa 5 omwen. Me plis ki sa i pou depan lo kestyon letan. Donk nou a komans avek Onorab Michel Roucou.

HON MICHEL ROUCOU

Mersi Mr Speaker. Bonzour Minis ek ou lekip. Bonzour spesyal zabitan Mont Fleuri. Minis ou'n poudir se ki i annan R416mil ki pour ede avek renovasyon bann lenfrastruktir dan distrik.

Si ou kapab dir nou lekel sa bann distrik ki pour benefisye avek sa? E apre osi ti annan sa Komite ki ti pe pas enn pti pe dan bann distrik, pour get enn pti pe bann travay ki annan pou fer avek bann lenfrastruktir. Si ou kapab dir nou si sa in fini ganny fer *or* ki zistans i ete?

E si in fini ganny fer si ou kapab fer nou ganny en kopi sa, pour nou kapab konnen apepre konbyen pour koute an zeneral pour ou fer bann reparasyon lo bann distrik? Mersi.

MR SPEAKER

Mersi. 22 distrik petet i pour pli fasil pour Minis nonm sa 4 distrik ki pa pe benefisye. Minis?

MINISTER MARIE-CELINE ZIALOR

Mersi Mr Speaker sa bann detay mon ti a demann Ms Nibourette pour reponn. Mersi.

MR SPEAKER

Mersi. Madanm DG?

DG GYRA NIBOURETTE

Sa R416mil ki'n depans - in fini depanse *actually* sa. I bann *renovation* depi Zanvye ziska la ki NSC in antreprann pour lemoman.

Pour bann larestan distrik letan CEO ti antre dan lofis in vwar poudir Bidze *maintenance* ki nou gannyen, i pa pou permet nou pour nou kapab fer tou *maintenance* dan distrik. Me selman ki nou, nou demande se ki, nou annan sa diskisyon avek Lotorite Distrik, byen boner ki nou kapab met li dan nou Bidze pour li kapab kouver *maximum maintenance* ki nou annan.

Me i annan en diskisyon ki CEO ti fer avek SS Payet, pour gete kote nou kapab ganny *additional funds*, pour nou get bann larestan distrik pour fer sir poudir sa larzan i kapab kouver *maximum* distrik posib. Mersi.

MR SPEAKER

Wi, oule klarifikasyon Onorab?

HON MICHEL ROUCOU

Si ou kapab dir nou lekel sa 4 distrik, li menm li ki'n benefisyé? Apre osi mon anvî eksplik enn pti pe mon dezapwentman, aköz *weekend* la ti annan en aktivite lo laplenn Mont Fleuri, nou vwar poudir sa aktivite ti annan transpor ki ti'n park la.

E sa i pa ede aköz i annan bann lezot sportif ki servi e sa i vin en defayans pour zot. Mersi.

MR SPEAKER

Mersi Ms Nibourette ou pour azout keksoz?

DG GYRA NIBOURETTE

Mersi Mr Speaker. Sa ki mwan mon annan la avek mwan, mon konnen sa de distrik Praslin i pa aparet, i pa kestyon aköz zot pa'n ganny fer

maintenance. Lenformasyon i pa pe ariv kot nou. Aköz letan zot fer *maintenance* Praslin i annan bann depans ki ganny fer ki al direk kot zot.

So petet si nou kapab ganny sa bann lenformasyon, nou kapab donn nou de Onorab lo kote Praslin. Apre i annan Perseverance, ki li pa ankor annan, annan okenn *maintenance work* kot li avek – mon krwar se tou.

MR SPEAKER

Tre byen.

DG GYRA NIBOURETTE

Mersi Onorab.

MR SPEAKER

Mersi. kestyon Onorab Gervais Henrie.

HON GERVAIS HENRIE

Mersi Mr Speaker. Pa kestyon me selman lo sa lalis nou ti ava *still* kontan si zot sirkile, aköz *we really want to keep* en lizye lo sa zafer larzan mannyer i depanse. Mersi.

Mon kestyon mon'n swiv lalis ki Minis in donn nou an term bann diferan proze. Prezan mon pe get sa lalis mwan, mon pe konpar li avek *PSIP National Sport Council* dan Bidze 2023. I pa parey.

So prezan mwan mon pe zis trakase *where is the money coming from* pour nou vreman kapab fer sa bann proze? Aköz i pa larzan – Par egzanp zis pour donn en legzanp *School Meal* pa aparet dan *PSIP Bidze*. So mon anvî zot eksplik nou byen aköz nou pou – nou pe gard en lizye lo la.

Mon dezyenm kestyon taler Onorab Romain in mansyonn bann kolaborasyon. Minis taler in koz lo *building capacity* e mon krwar la i en landrwa kot nou kapab travay.

Dan tou distrik i annan bann klib sportif ki Biro *Registrar General* pe dir zot, zot bezwen anrezistre pour zot konmsi vin bann *legal entity* e ler ou anrezistre prezan ou kapab tap laport ou, pour *raise* ou *own fund*, ou deklare *everything above board* napa problem.

E ler la kot prezan zot kapab travay avek bann klib lo nivo distrik ki zot, zot adopte bann lenfrastruktir. Mont Buxton pare egzantp, nou *field* otour *court* i demann fer.

Mon'n fer en lakonpanyen fer en - donn mwan en kotasyon 250mil, mon pa anvi i servi mon *community project* 740mil, mon pa anvi i vin kot zot. Be sa de klib *basketball* si ti'n anrezistre *MBU Boys*, *MBU Rockers*, zot, zot ti kapab *raise the money*, atraver bann fon parey *SeyBrew* i donn larzan, *whatever* lezot lakonpanyen zot kapab.

So ki mannyer nou kapab *build* kapasite, sa bann klib pour zot osi travay an partenarya pour ed zot bann fasilite mentenir ki zot menm pe servi? Pa neserman nou. Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Wi mersi Mr Speaker. Definitivman mon pour komans avek dernyen pwen Onorab, pour garanti li. Se lo sa menm laliny kot nou pe ale, kot nou pe fer.

Ankor ou konnen Mr Speaker petet enn pti keksoz mon a fer - nou a fer pase. Nou a pe annan en plan ater osi, tou sa bann keksoz ki nou anvi fer si nou napa en lot kapasite, kot nou travay avek kiltir avek *ethos*, avek latitud nou bann

dimoun i fer sa de - i fasil pour mwan avek ou nou asize la Mr Speaker, demann Onorab nou koz lo tousala, nou sorti an deor sa laport nou ale pour nou angaz pour fer sa la avek larestan 20milyon keksoz ki annan pour fer.

I pran - mon tande mon konpran enn pti pe fristrasyon, i pran enn pti pe plis letan ki nou t i antisipe, akoz nou bann dimoun, nou bann dimoun nou abitye depan lo Gouvernman pour tou keksoz, tou keksoz.

E parfwa i pa zot lafot, zot pa anvi depan lo nou zot. I zis mankman kapasite pour zot ekrir enn pti proze pour zot al ver *SeyBrew*, pour al ver en landrwa. E se sa ki *CEO* i a koz lo la taler, bann diplom, bann kapasite ki nou a pe - e kantmenm ou pour koz ek zot ou pour di zot, plen dimoun in vini ek bann proze pour ede pour fer, finalman ou bezwen fer pour li.

Akoz son kapasite i pour depan telman lo ou pour ou kapab fer pour li. Letan mon pe koze lo sa zistans par dernyen kot nou pe ale ek *sport*, kekfwa zot krwar mon pe egzazere Mr Speaker. Mon pa pe egzazere. Nou realite toulezour se sa.

E par ler kot ou komanse i pran ou kekfwa detrwa mwan zis pour ou kapab ganny zot pour ou kapab komans fer sa bann demars. Me selman mon kapab garanti ki dan menm loptik, nou, nou dan menm frekans avek sa bann keksoz ki nou anvi fer, pour ede anmenn bann solisyon pour sa bann problem.

E mon pour reponn sa lot premye kestyon avan ler mon pas laparol avek *CEO* ouswa Ms Nibourette pour detay. 2000 - Bidze pour *PSIP* ou annan rezon wi. Lannen pase Finans lafason ki

manner ki'n fer Bidze *zero based* e avek *results based* bann nouvo in konfiz en pe nou bann dimoun ki'n prepar Bidze. Wi i annan keksoz koman Bidze ti'n fini pase, nou'n vwar poudir nou'n manke.

Me selman Finans akoz sa tranzisyon in annan fleksibilite. Mon kapab dir zot travay vreman pre avek nou, vreman byen pour nou kapab e la parey SS Payet in asiz avek CEO pour nou kapab vwar ki manner. Akoz i larzan pour nou fer en pe keksoz, bann ki annan la ki manner nou kapab servi en pe pli byen e larzan PSIP osi i pour annan *mid-year review* la, pour nou kapab vwar ki manner nou kapab balans keksoz en pe pour nou kapab organiz en pe nou bann lenfrastruktir.

Bann ki pa ladan, si nou santi nou kapab annan fleksibilite ki nou kapab *afford* pour nou fer, nou pou fer nou. Nou pa pour espere pour lot Bidze pour nou kapab. E se sa enn pti pe. In annan ankor mon koz lo mankman kapasite in konfiz enn pti git nou bann plan PSIP, lo sa bann bout proze e sirtou akoz nou napa *property manager*. Akoz nou napa en direkter pour bann proze. Me selman nou pa pe les sa anpes nou kantmenm sa regard ek Finans kwa ki nou kapab fer, fer sa ki nou kapab fer.

Apres regarde ki manner nou bouz avek larestan. Mersi Mr Speaker kekfwaw CEO i ava kapab eksplik enn pti pe plis bann detay. Mersi.

MR SPEAKER

Mersi Minis. CEO ou annan laparol.

CEO MARC ARISSOL

Mersi Mr Speaker. Mersi Onorab pour kestyon. An term *capacity*

building, nou konnen sa i enn nou bann *challenge* ki nou annan. Nou bezwen pour nou kapab siport byen nou bann Federasyon, nou bezwen annan kapasite anndan dan NSC. E i pa vadir ki nou napa ase, napa dimoun ki annan sa abilite, me petet nou bezwen *buff up* nou kapasite pour nou kapab siport nou bann Federasyon pli byen.

E mon'n fini an diskisyon avek TGMI pour sey regarde, nou pe target en *Diploma lo Sport Management* pour ede, e osi nou anvi ki sa i *cascade* osi dan nou bann Federasyon.

Lo kote Federasyon nou obzerve sa pti moman letan ki mwan mon la, nou bezwen *empower* zot, ok? I annan sa *issue mindset*, nou bezwen sanz enn pti pe zot *mindset* parey mon pe dir ou Minis i dir ou in en kiltir depandans lo Gouvernman. Me nou bezwen retourn sa *around*.

Zot in fer - ler mon'n zwenn ek bann Federasyon in fer mwan konpran poudir zot ti annan CSR avan. Me la zot pa pe gannyen. Me mwan mon'n ale, mon'n sey tap laport mon'n vwar poudir i annan sa ki nou apel *charity certificate* ki ozordi i *available*.

Me selman mon pa pe vwar ase - *I mean* sansibilizasyon lo la. E mon pe - Mon pour annan en diskisyon avek CEPS, akoz ou bezwen al kot CEPS pour ou ganny sa *charity certificate*. Pour li kapab eksplike oubyen pour vin fer sesyon ek Federasyon pour zot kapab ganny *empowered*.

E sa ki ou pe dir mon *welcome* sa. Akoz nou anvi ki Federasyon i debout otononm petet dan bann fason kot i *run*, pour zot ganny zot *funding as well*. E sa i pour ede. E i annan en distrik an partikilye kot mon'n asiz avek,

nou'n ganny en konversasyon, byento nou pou al laba ki'n deza pe komans fer sa.

Kot bann dimoun, bann klib - e ankor enn fwa la nou bezwen sansibiliz bann klib la ki pe ekout nou, pour zot fer sir zot anrezistre ki zot a kapab benefisyé, aköz si ou pa anrezistre ou pa pour kapab benefisyé avek sa *charity certificate*.

So zot a kapab enn pti pe pli otononm avek zot finans ler zot a ganny bann *sponsorship*. E i annan - e menm lo sa distrik ki mon pe koz lo la, bann klib pe zwenn ansanm pour *take*, pour adopte parey laplenn. Foutbol i annan zot klib, zot pour adopte pour netwaye. So, i tir en pe presyon lo nou NSC.

So sa ki nou pe sey promouvwar dan lefitir sa sipor avek lakominote ki i en zafer nou pa NSC, me nou tou. Mersi bokou Mr Speaker.

MR SPEAKER

Mersi. Kestyon Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi tou dimoun a lekout. Anse Royale in ganny touse dan bout larepons kot konmkwa nou pour benefisyé avek sa *sport complex*. Mwan ti a kontan konnen mwan mon konnen me mon bann atlet, mon ti a kontan lenformasyon i ganny donner a bann atlet Anse Royale, poudir zot aköz depi Septanm nou'n komans vreman gran diskisyon lo la.

Me ziska ozordi, zot pa ankor vwar nanryen ater ki'n arive. Eski nou bann atlet i kapab ganny enn pti lesplikasyon ki zistans depi nou'n komanse ziska la, kot nou'n arive? Eski sa plan ki nou ti'n agree lo la pour ganny fer in ganny sanze or i annan okenn lamannman lo la?

Nou'n ganny dir pour annan en bout *foreign grant* ki pour konstri sa *sort of complex*. Eski sa larzan in fini arive la, sinyatir in ganny fer pe zis espere ki nou komanse or ki zistans nou ete ek sa *foreign grant*? Mersi.

MR SPEAKER

Mersi Minis.

MINISTER MARIE-CELINE ZIALOR

Mersi Mr Speaker. Mon kapab reponn lo kote *foreign grant* e Ms Nibourette i ava reponn lo bann detay progre. *Foreign Grant* wi nou asire. Prezidan in - letan i ti al son *visit Abu Dhabi* nou ti a pe *strategize* ansanm lo bann lenfrastruktir sportif, lekel ki zisteman - aköz nou annan sitan kantite pour fer e pour depas lakantite Bidze pour nou kapab - sa in garanti avek UAE.

E zot pe zis - *chargé d'affaires*, pe zis ver nou, dan ki Ms Nibourette i ava donn lenformasyon lo la pour nou kapab bouze avek sa proze.

E selman zis petet Mr Speaker pour mwan fer sorti ki sa desantralizasyon sa *Sport Complex* Anse Royale i pa zis pour atlet Anse Royale, i pour sa rezyon sid was Mahé pour lakominote sportif pour zot pa bezwen desann anvil, sa kou transportasyon ki zot kapab ganny en landrwa pour sa la.

Mersi Mr Speaker Ms Nibourette i a donn plis detay.

MR SPEAKER

Tre byen. DG, wi?

DG GYRA NIBOURETTE

Mersi Mr Speaker. Mersi Onorab pour kestyon. *With regards to* proze Anse Royale i ankor *still on*, i ankor

parey nou ti diskite. Arsitek kot *SIA* i pe zis fini fer detrwa pti *tweaking from* dernyen *meeting* ki nou annan. E nou pour annan en *meeting* avek tou bann *stakeholders* pour re montre zot ankor the *final version before we can start*.

Premye bout ki ti annan pour fer ti sipoze fer *demolition work* Anse Royale. Lannen pase *SIA* ti *tender the tender document*. Malerezman nou pa'n kapab ganny en lakonpanyen ladan, vi ki sa dimoun i pa ti neserman pe *meet* tou bann kriter ki *SIA* pe demande.

So la nou'n refer *selective tender* ki byento nou sipoze kapab komanse avek nou *demolition work*. E dan sa proze i annan osi pour aranz kot i fer bokse, *Olympic Africa*. Akoz ladan sa *building*, nou vwar poudir konplent ki nou gannyen se ki napa *changing room*, napa ase *toilet facilities*. E pour zot kapab antre zot bezwen pas atraver en *hall*, e letan i annan bann *training* bokse ki pe fer, i difisil.

So i pour annan en *renovation work* kot pour annan en bout ki pour kase, pour nou kapab fer en laport sorti ki pa pour bezwen enteronp *training* anndan. E sa osi dan sanmenm sa proze *demolition*.

Dezyenm *with regards to* sa *stadium* - dernyen *meeting* ki nou ti annan sete avek Lanvironnman akoz parey ou okouran kot nou anvè fer sa *stadium*, nou bezwen en bout ki al dan lanmar. E nou bezwen fini annan sa diskisyon avek Lanvironnman ki nou pa pe al konstrir dan lanmar, sa ki nou pe demande se zis sa pilye pour tenir sa *stadium* deryer, ki desann dan lanmar ki sa nou ankor pe fini finalize.

Me selman yer letan nou enzenyer Sinwan ti dan pei, ti pe get Stad Linite, nou'n fer li osi al get

Anse Royale, pour li kapab gid nou lo ki mannyer nou pou fer sa *stadium* akoz i pour annan *track* osi, apard ki foutbol.

With regards to sa *mini stadium* inisyalman nou ti pe mazin zis *volleyball, basketball*, me selman avek diskisyon nou'n vwar poudir, si nou pe desantraliz sport *why not* met tou bann sport ki annan pou fer ki pe servi en *court indoor* osi tou.

So nou'n - sanmenm sa ki pour annan sa *meeting* semenn prosenn. Nou'n sey *reconfigure* li enn pti git, ki pour kapab *cater* pour tou bann larestan sport ki servi bann *indoor facility* koumsa.

Mon krwar mon'n fini egzoz tou Mr Speaker. Mersi.

MR SPEAKER

Mersi. Mersi *DG* pour ou konesans tou sa bann proze. Onorab Gabriel?

HON CONRAD GABRIEL

Mersi Mr Speaker. Minis mon'n ekout ou byen ou'n donn an detay bann renovasyon. Ou'n tous *dojo*. Mon krwar i konpri pour atlet *judo, table tennis* - mon pa konnen si i annan ankor atlet ki *train* la. Elektrisite 651mil ou'n nonmen, pour refer son elektrisite. Zis mon a met ou latansyon Minis ki son *roofing*, son *ceiling* osi i dan problem, i koul en kantite. Mon pa konnen - eski zot - i dan zot plan pour aranz sa petet? Sa i mon premye pwen.

Mon'n tann nonm *Victoria Gymnasium* i pour ganny *at least* 52mil pour fer serten travay renovasyon. Eski sa i konpri sanz son sirfas ater? Akoz nou bezwen fer remarke ki i annan bokou *injury*, pe arive espesyalman *Victoria Gymnasium*. E bann atlet ki

players, ki sipoze reprezant Sesel pe ganny *injury*.

Mon lot pwen Minis. Eski ki zistans zot ete ek *Palais De Sport*? Pour zot kapab *at least* sa bann zwer *switch from Victoria Gym* mont *Palais De Sport* pour fini en pe *training*.

Aprè mon dernyen pwen zis an pasan petet eski ...

MR SPEAKER

Pa tro bokou pwen.

HON CONRAD GABRIEL

...eski Minis ou kapab donn nou enn pti pe detay petet si ou annan. Eski *basketball* i annan okenn *training camp* ki zot pe ale? Vi ki en trwa mwan pour *Zwe de Zil*. Eski i annan okenn *training camp* pour *basketball*? Mersi.

MR SPEAKER

Mersi. Minis *panel* nou annan 4 pwen la. Eski zot kapab fer li en pe bref.

MINISTER MARIE-CELINE ZIALOR

Wi Mr Speaker mon pour pas laparol avek ou permisyon avek bann dimoun briyevman. Mon krwar i annan keksoz ki nou'n deza fini adrese. Lo konsern bann larestan renovasyon Ms Nibourette i ava donner kote ki zistans i ete. Lo kote *training camp* mon krwar mon'n fini koze mon'n adres sa. E zis petet kekfwà pour nou sanz enn pti git loptik, mon ti dir i depan lo bann, Lasosyasyon e i osi depan lo metod syantifik.

Akoz par egzàn *training camp*, wi mon krwar nou krwar nou'n abitye toultan tradisyonnelman sak fwa i annan en zwe, nou bann lekip i al *training camp* enn pti pe.

Me ou konnen *training camp* dan son term syantifik se pour *pick* - bezwen ariv en letan kot ou *pick* pour konpetisyon, *for competition*. E sa i kout bokou larzan e si ou *pick at the wrong time* ler ou al fer - sanmenm sa ou al fer konpetisyon *steam* in fini, prezan ou pe al *compete*, ou lo *empty*.

E nou bezwen ekout nou bann teknisyen, nou bann dimoun ki konn dan sa domenn ki mannyer sa i sipoze fer, pour nou servi bann resours. Nou'n dir konbyen larzan nou annan, nou napa en gran kantite pour servi li byen. Si ou pe fer kondisyonman fizik, ou pa bezwen *training camp* ou kapab fer li isi.

Sa i bann diskisyon ki NSC pe fer avek bann diferan Federasyon, lo sa ki konsern sa. E mon konnen nou annan bann lezot pei ki pare pour akeyir en pe bann *training camp*, ki PS pe fer bann demars ansanm avek, e sa anmezir sa bann program nou pe fer avek medya letan i pare, letan bann dimoun in fini sa bann diskisyon nou a ganny plis lenformasyon pour fer sa.

Mon ti a kontan pas parol petet Mr Speaker avek Ms Nibourette pour bann - sa bann enn de bann ki'n mansyonnen lo renovasyon.

MR SPEAKER

Mersi DG ou a klarifye lezot pwen.

DG GYRA NIBOURETTE

Mersi Mr Speaker. Mersi Onorab pour ou kestyon. *With regards to* sa 52mil sa in fini ganny peye sa Onorab i bann depans ki'n fini ganny fer. *With regards to Victoria Gym*, ansanm avek sa enzenyer Sinwan yer, nou ti osi pas *Victoria Gym* ansanm avek enn de bann dimoun *basketball*.

E ti annan detruwa *sample* ki sa enzyer in vin avek osi pour montre nou bann dimoun *basketball* pour sirfas. Dapre parey zot pe dir i annan bann *injury* ki arive. Me selman sa ankor nou bezwen fini diskrit avek zot akoz *at the end of the day*, se bann zwer *basketball* ki servi pour tonm lo en desizyon ki kalite sirfas pour mete. E pli vit ki nou kapab ganny sa, pli vit nou kapab met dan Bidze - akoz parey zot konnen i pa dan Bidze 2023 li.

With regards to Palais De Sport, lalimyer in fini ganny aste. Nou dan prosedir pour *tender* pour nou kapab resanz tou bann lalimyer, vi ki la twatir in fini sanze, in nepli koule.

So next ki annan pour nou fer nou annan lalimyer avek son pour nou kapab aranze. Apre nou annan *toilet ek shower* ki sa proze i deza kot *SIA*, kot i pe fini avek bann *tender documents* pour anvoy kot *Procurement*.

With regards to Dojo Judo Hall. Wi nou okouran poudir i koule, e nou bezwen ganny dimoun neser pour fer *assessment* lo la pour nou kapab ganny en *costing* pour konnen konbyen i pour koute.

E pour nou sey vwar dan Bidze *maintenance NSC* si nou pour kapab antreprann li la or si nou kapab zis fer en *patching* tanporer, ki apre nou kapab fer *major renovation*. Mersi Mr Speaker.

MR SPEAKER

Mersi DG. Minis, wi.

MINISTER MARIE-CELINE ZIALOR

Wi, Mr Speaker. Mersi bokou mon ti zis bliye petet enform Onorab atraver ou Mr Speaker ki *Palais De Sport* pe ganny servi li. *Palais de*

Sport i deza pe ganny servi pour *training* nou'n fer vitman nou mye, pour nou kapab fer sir ki i pa koule. La i zis pour fwete e bann larestan travay ki pour ganny fer.

Me selman wi i la, e tou sa bann larestan renovasyon en dernyen pti mo pour dir petet Mr Speaker, ek tou sa bann detay ki nou a pe donner mon krwar nou kapab apresye lakantite - lakantite ki annan pou fer e lakantite osi ki'n ganny antreprann, ki'n ganny fer e lakantite osi ki nou - e pa kantite kalite ki nou bezwen pe *focus* lo la.

E sirtou syantifik e teknik pour nou kapab fer li byen e nou demann nou bann kominote sportif, Lasanble Nasyonal pep Seselwa, pour kontinyen donn nou sa sipor. Nou apresye bokou zot sipor, pour ki nou kapab antreprann sa bann travay ansanm; ansanm antreprann sa bann travay kot bann dimoun i santi kot zot kapab donn nou en koudmen, pa per traverse donn nou en koudmen, pour nou ansanm remet nou bann lenfrastruktir pa ni met li kot i ti ete, pli o ankor lo en pli o nivo. Mersi Mr Speaker.

MR SPEAKER

Mersi. dernyen kestyon Onorab Larue.

HON FLORY LARUE

Mersi Mr Speaker. Mr Speaker mon ti a kontan demann Minis, lefe ki en kantite renovasyon pe ganny fer lo bann fasilite sportif.

Eski i annan en mekanizm ki ganny mete an plas, pour gard en serten nivo kalite travay ki pe ganny fer dan sa renovasyon, ki fer nou pa pour bezwen kontinyelman retourn lo en proze. E lefe ki ou'n mansyonnen ki nou pe *aim higher* ki mannyer ti ete avan, ki kalite

lenfrastruktir ki zot pe fer sir ki napa okenn problem ek bann travay renovasyon? Mersi.

MR SPEAKER

Mersi. Minis ou repons?

MINISTER MARIE-CELINE ZIALOR

Mersi Mr Speaker. Egzaktaman Mr Speaker ki Onorab in met sa pwen la. Vwala akoz par ler i pran letan. La parey Ms Nibourette eksplike lo kote *tartan track*. Nou'n bezwen rod en *expert* sa lakonpanyen ki pe fer sa *track* vini. E menm avan ler pour nou swazir pour regard *procurement* pour sa lakonpanyen, ti annan enn ki ti ganny swazir, apre nou'n bezwen retourn kot Federasyon Atletik regarde.

Eski son *license* i ganny rekonnèt par son Federasyon Enternasyonal, la. I sa kantite, ki ou bezwen pe fer e aprann avek zot an mezir ki ou ale, zot komans dir ou parey vin get sa bis antye anba la. Ler i vin get ek son lizye maler ek dezagreman ki a pe dir ek nou "manman bokou plis travay ki i ti krwar". I pran en pe plis travay. Vwala ki nou pe fer.

Me selman akote sa, ansanm avek *SIA* - mon'n koz, mon'n fer en long *meeting* avek *CEO* Jitesh pour nou kapab fer en *maintenance plan*, *along* sa. Bidze 2024-2026 preparasyon staz ek Finans nou'n komans koze pour komanse, pour nou kapab annan sa *maintenance plan* ki nou pe koz lo la e parey - apre *CEO* parey i pe dir ansanm avek *PSB* pour nou, nou pe revwar bann profesyonnel ki nou met dan *NSC*, pour ki i annan kapasite pour kapab fer sa bann travay bann *maintenance* ki pour fer.

Pour lemoman kot nou napa nou depan lo nou bann pei zanmi, ouswa depan lo bann Lanbasad ki vreman, vreman ede ek bann teknisyen ki vini. E parfwa ou bezwen esper zot vini. Plito ou espere ki parey ou a pe dir ou fer en louvraz ki parey mon pe dir, pour *next* 30,40an.

Ouswa parey i a pe dir ek ou *lifespan* en *track* i 15an. Ou bezwen respekte konnen *lifespan* en *track*. Dan prosen 15an ou bezwen refer ankor, ou bezwen met Bidze, planifye pour dan 15an pour ou kapab sanz ankor sa *track*.

Me menm zot pe dir ek ou avek klima Sesel, i riske mwens letan ki sa. E se sa bann louvraz ki nou a pe - ou konpran par ler nou pe sey fer tousala ek lanmen drwat nou pe aranze, avek lanmen gos planifye pour pli tar. Mersi Mr Speaker.

MR SPEAKER

Mersi. Wi klarifikasyon Onorab?

HON FLORY LARUE

Mersi Mr Speaker. Mr Speaker eski Minis i kapab dir nou si sa bann sez ki'n ganny fer kot *gymnasium* avek bann dibwa ki sipoze al lo *surfacing*, pour ganny tire, pour servi sa dibwa pour remet ater. E si sa i dan plan ki zot pour servi? Akoz lefe ki ti annan *mismanagement* lo sa kote avan? Mersi.

MR SPEAKER

Eski sa i posibil? Annou termin lo la silvouple. *DG?*

DG GYRA NIBOURETTE

Malerezman Mr Speaker nou pa pour kapab tir sa bann dibwa pour nou kapab met li koman sa *flooring* e nou pou bezwen rediskit - Parey mon pe dir nou ti annan sa *visit*

avek sa enzenyer *come up* avek en lot *base* ki nou pour servi pour sa *flooring* pour *basketball* kot *gymnasium*. Mersi.

MR SPEAKER

Mersi. Bon nou termin la avek sa sesyon kestyon. Mon remerisye Minis e son bann zofisye pour zot repons. E mon pour envit zot fer zot depar la. Mon pour demann Lasanble reste enn pti moman pour en dernyen *item*. Mon swet zot bon kouraz, bonn kontinyasyon.

(THE MINISTER AND HER DELEGATION WERE EXCUSED FROM THE HOUSE)

MR SPEAKER

Byen apre sa dernyen *item*, mon'n akord laparol Onorab Rocky Uranie pour fer enn pti leksplikasyon lo en size ki konsern son rol. Onorab Uranie.

HON ROCKY URANIE

Mersi Mr Speaker pour donn mwan laparol ozordi bomaten. Pour donn zabitan Zil Pros en leksplikasyon pour kwa mon pa kapab prezan dan louvertir Kordgard La Digue. En Kordgard ki mwan osi mon'n pouse pour fer sir ki nou gannyen pour bann zofisye lapolis kapab deservi nou zabitan Zil Pros.

Mon le met lo rikord ki mon pa prezan akoz ozordi mon annan kestyon pour - ti annan kestyon pour Minis *Sport* an relasyon avek *Sport Complex* La Digue e alors i pa posib pour mwan dan de landrwa an menm tan.

E la mon le lans en lapel avek Gouvernman, pour dan lefitir evite met bann aktivite lo Zil Pros sirtou sa de zour, ler i annan pou fer avek Mardi, avek Merkrede, kot nou vwar nou dan Lasanble si non nou pour

bezwen absan pour nou al get sa bann louvertir, oubyen *meeting*.

Me travay Lasanble i pran priyorite lo sa bann deroulman ki deroule dan distrik. So alors bann Digwa konpran mwan. I pa posib pour mwan la avek zot, me selman mon swete ki tou keksoz i mars byen. Nou Kordgard i a byen ganny servi. Mersi.

MR SPEAKER

Mersi. Mersi Onorab. Bon mon senpatiz avek Onorab Uranie, akoz mon konnen poudir si mwan ki ti *MNA Zil Pros*, mon ti a kontan la pour louvertir en Kordgard. Me mon - selman koman Onorab Uranie in donn mwan loportinite la, mon pour zis adres sa sityasyon enn pti pe pli, enn pti pe pli devan.

Mon krwar sa korperasyon i mars le de kote. E fodre nou koman Lasanble nou fer li marse tou le de kote. Mon okouran e mon en pe tris ki serten Manm in mank langazman avek L'Egzekitiv pour menm dan travay Komite. E mon krwar sa i regretab e bann Manm nou bezwen vey nou kote, si nou anv i sa korperasyon lo lot kote.

Lo kote L'Egzekitiv napa okenn obligasyon pour L'Egzekitiv fer en levennman ki zot bezwen fer dan en moman ki pa konvenab pour en Manm Lasanble. Si i arive sa i petet, zot in santi poudir i annan serten rezon akoz zot bezwen fer li ozordi.

Mon dernyen pwen se ki nou koman bann Manm Onorab annou pa esper zis lo dernyen moman koman koup riban, oubyen louvertir. Annou angaz nou avek bann proze ki dan kominote volonterman, koumsa nou fer sir ki nou kontinyelman soz.

Eskiz mwan, napa okenn diskisyon lo la - *that's it, that's mon*

ruling. Mon remersye zot tou. Mersi bokou. Nou aret la pour sa bomaten e nou a re pran travay 2er apre midi. Mersi.

(BREAK)

MR SPEAKER

Bonn apre midi tou Manm, nou zofisye, nou piblik. Mardi apre midi normalman nou pas lo *Bills*. Me nou napa *Bill* ozordi alor nou pou pran Mosyon direkteman.

E nou annan Mosyon devan nou, premye Mosyon i dan non Onorab Waven William. Onorab mon a donn ou laparol pou met ou Mosyon.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker Mosyon i lir konm swivan;

Sa Lasanble i felisit tou travayer dan Sekter Piblik ek tou e Prive pou zot solidarite, travay dir e perseverans a kote Gouvernman, pou sa sikse ki pei in fer dan sa kourt dele letan depi dan dernyen eleksyon.

MR SPEAKER

Mersi. Mon pou demann segonnman pou sa Mosyon. Onorab Philip Arissol? Mersi

HON PHILIP ARRISOL

Mersi Mr Speaker. Bonn apre midi Mr Speaker, bonn apre midi tou dimoun.

Mr Speaker mon segonn Mosyon Onorab William, mersi.

MR SPEAKER

Mersi. Onorab William, ou kapab adres ou Mosyon.

HON WAVEN WILLIAM

Mersi Mr Speaker. Mr Speaker avan koz lo Mosyon, mon remersye Bondye pou gidans lo sa pep e sa pei beni. Mon remersye li pou son lagras ek faver, san li dan nou lavi Mr Speaker Sesel pa ti pou reste lo semen soutenabilite koman en pti pei ek bokou defi dan sa vilaz global.

Sa Mosyon Mr Speaker pou ariv lo lord dizour Lasanble Nasyonal a sa moman, i pa en kwensidans. Sirtou par lefe ki ozordi i dernyen sesyon premye trimes, avan *recess*.

In vin o moman osi kot Lasanble in ariv lo lanmwatye son manda 5an ek Gouvernans pei. En bon moman pou Lasanble debat lo la, 12 zour avan zournen mondyal travayer i ganny selebre mondyalman.

Mr speaker koman pli vye travayer isi dan sa Lasanble nou Lenstitisyon, ou a dakor ki an rekonesan solidarite, travay dir e perseverans, travayer Seselwa i merit ganny felisite par Lasanble pou reisit pei. Latansyon sa Lasanble pou zot kontribisyon.

Mon kontan ki Gouvernman in apre pou onor son langazman ver logmantasyon saler, ki osi vin dan en bon moman ki finansyerman i a soulaz travayer e fanmir Seselwa a kote lezot mezir pou aziste zot ek kout lavi.

Mr Speaker atraver sa Mosyon mon oule met lanfaz lo 2 pwen, sa se envit tou travayer sekter gouvnmantal ouswa non-gouvnmantal. Enn pou pran en moman pou reflesir, disernen ouswa analize, konpran e pou adopte en fason fer dan travay.

Koman sitwayen, koman paran, koman travayer, koman etidyan e kolektivman koman en nasyon adopte stratezi pou batir sa

pei. Mr Speaker dan lavi i annan en moman pou tou, zonn i annan swa ant ledikasyon, lasazes, pridans, dizernman e konprezon.

En melanz e balans dan tousala, i permet li pran bann desizyon enformen, prepar li pou fer fas ek okenn evantyalite ki kapab vin devan li. Mankman dan sa balans i pou fer son lavi difisil.

Oktob 2020 Mr Speaker, en nouvo Gouvernman anba lenpak pandemik *COVID*, en lekonomi dan deloryonn e en leta mondyal ranpli ek lensertitid. Sesel koman en pti pei ki depan lo larestan lemonn, pou son sirviv ti an fas ek en gro defi pou nouvo Gouvernman. Konm dir Kreol, lakwizin ti'n anflanm e pwalon ti pe fonn.

Dirizan ek sipor lamas in tenny sa dife e pe met en pe lord dan sa lakwizin. Sa moman ti annan lafreyer Mr Speaker, ti annan lensertitid e en gro konsern dan lespri tou dimoun dan sosyete.

Anba gidans Bondye bann desizyon brav, saz, pridan, ferm, Fermal pou serten kous popilasyon ki ti bezwen ganny pran Mr Speaker. Mr Speaker ti bezwen ganny pran mon repete, menm si serten ti krwar lekontrere. Olye get sa pli gran portre lavenir Sesel dan sa vilaz global.

Kot sak pei ti pe sey konpran, sey vwar ki fason pou sirmont defi *Covid* e soutenabilite plan devlopman sosyoekonomik. Mr Speaker ti difisil i ankor annan bokou defi devan nou, prenon kont bann fanmir ki mwen eze dan sosyete ki sakenn de nou ki fer *visit* dan kominote nou zwenn detanzaot.

Mon devwar e nou devwar isi dan sa Lasanble, se pran bann desizyon aprouv bann Prozedlwa, met presyon lo Egzekitiv e pas bann

rezolisyon ki pou soulaz sa pep e edifye li pou i regard son priyorite e son responsabilite koman en sitwayen.

Mr Speaker i mon devwar osi avan *recess mid-term* e lavey Zournen Mondyal Travayer, pou felisit tou travayer Seselwa. San solidarite pep pou tenir e sibir lenpak dan diferan fason, san sa travay dir pou sorti dan sa presipis kot nou ti ete; pou tou travayer ki toulezour in leve, annan sa disiplin pou reponn lapel e delivre dan son travay, mon dir zot en gro merci Mr Speaker.

Mr Speaker san lafwa e gidans Bondye pou persevere Mr Speaker, seryezman nou pa ti pou reisi. Mr Speaker mon rekonnèt ki si atraver solidarite, travay dir e perseverans ki det pei in sorti 100poursan an 2020 pou vin 60 ekek poursan 2023, i ankourazan.

Pou apresye ki Sekter Tourizm pe fer osi byen e ki reset reveni dan sa sekter in sirprenan, i ankourazan, pou apresye ki konpare ek bokou lezot pei i devlope ki lagrandisman lekonomi Sesel dapre Fon Monneter Enternasyonal, i enkrwayab.

Pou apresye ki plis etidyan pe ganny sans al etidye dan liniversite an deor Sesel; pou apresye, konpare ek serten lezot pei ki tou travayer Sesel i garanti en saler dan Sekter Piblik lafen dimwan.

Ki nou bann sitwayen aze, nou sitwayen mwen kapab e lezot pe ganny sipor nesese kot i posib. I donn nou serten nivo konfyans pou kontinyen fer pli byen ankor Mr Speaker.

Mr Speaker mon annan gratitid anver nou kreater e anver sa pep. Menm ek bokou defi nou pe fer bout zwenn a nou diferan fason e stil lavi. Sa logmantasyon saler ki

pe vini byento, i fri zefor e travay dir tou travayer pou ki lekonomi in annan lespas fiskal pou Gouvernman donn sa logmantasyon saler Mr Speaker.

Nou zefor ansanm in fer en diferans. Napa personn ki pou fer li pou nou si pa travayer Seselwa li menm. Mr Speaker mon mesaz se koman nou pe apros sa Zournen Mondyal Travayer, ki nou tou koman travayer prive, piblik travayer zournen ouswa enformel de nouvo. Nou pran letan pou nou reflexir, pran stok e fer nou rezolisyon pou demen e lavenir Sesel, nou kominote, nou fanmir e nou menm.

Dan sa legzersis Mr Speaker, i pou enportan ki L'Egzekitiv ki pep in konfyé manda fer Polisi, Lalwa, Stratezi e Plan Devlopman Nasyonal; ki nou bann dirizan e bann teknisyen zot fer sa pep zistis, anver bann direksyon e fason fer ki zot enplimante.

Zot pou bezwen annan pli meyer stratezi kominike davans ek sa pep, pou donn li letan pou aziste li pou fer fas ek bann sanzman ki nesaser. Sa mo' enklisivite' bezwen pa zis ganny dir, me aplike Mr Speaker. bezwen osi ekoute pa zis konsilte ekoute Mr Speaker e tande ki pep pe dir.

Mr Speaker me pa donn pep bann sok ki si mantalman ou pa for, ou pou tonm dan pyez fo propagann e distorsyon lenformasyon, ki bonbard lespri partou, partou par serten group ki pe viv lo sa bann febles gouvernans.

Mon demann Legzekitiv pou aret dir ki depi lontan konversasyon in komanse, me ler ou pe apros 3 mwan, 2 mwan, aköz ou pa ogmant koz lo sanzman ki pe vini ki pou annan en lenpak signifikan lo lavi

pep parey ti leka dan bann moman COVID.

Mr Speaker aköz ek tou sa presyon e lokipasyon sa pep ki vremen okipe pe fer 2 bout zwenn pou soutenir son fanmir, zot perdi Mr Speaker, letan bann lenformasyon pa vin okouran e konstaman. Mon demande ki sa pwen Egzekitiv i pran li o serye Mr Speaker.

De lot kote Egzekitiv pou bezwen osi vin kler e fran dan bann konsiltasyon. Tou kart merit ganny tale ater, ler i annan pou fer avek lentere nasyonal ek devlopman pei. Mr Speaker ki travayer dan tou sekter i ava pli byen enformen, pou azir dan en fason pli byen kondisyonnen pou solider travay pli dir e persevere pou lavenir Sesel.

Mr Speaker dan sa konteks, i byen ki Gouvernman in pous *tax* fermye e prodikter pou pli tar, i byen ki zot in rekonsider zot lapros anver enpoz nouvo *tax* lo bann letablisman touristik pti, mwayen e gran.

Sa ki mon kapab konpran, aköz ki nou pa *take a step back* e revwar sa lapros anmas *tax* ek pti biznes, bann ki dan enformel ouswa bann ki pe fer zournen ensidswit. Mr Speaker si travayer piblik pe ganny par lao R8000mil, i pa bezwen pey *tax*, aköz alors ki sa pti biznes ki pa pe fer tou le mwan sa sonm larzan, dan profi, ki pa ni menm fer en nivo saler debaz ki pa pe vin devan pou rod lasistans finansyel, kot Lazans *Welfare* sa bann endividi tel parey peser artizanal, koudriyez, *childminders*, vander dan bazar ouswa obor semen, *food vendors*, sa dimoun ki aranz en loto kot li ki pe rann en servis sosyete, sirtou bann i pa pe fer profi Mr Speaker. Me ki pa pe al rod *welfare*, mon demann

Gouvernman pou pran serten konsiderasyon dan lavenir.

Mr Speaker mon pe demande ki Gouvernman i *take a step back*, e revwar sirtou dan sa bann moman ki annan bann difikilte. Ankouraz zot pou fer kontribisyon *Pension Fund* e Sekirite Sosyal pou zot *safety net* demen, sa i *ok* Mr Speaker.

Mon demann Gouvernman pou *speed up* lo la pou enplimant sa, me pa retir oubyen pous serten kous popilasyon par anba *minimum wage* ki pa anvi depan lo Gouvernman Mr Speaker. Akoz bokou sa bann dimoun pa anvi vin rod Lasistans *Welfare* Mr Speaker.

Sa Mr Speaker i pli gro fristrasyon la deor. Ou mank lokazyon pou ou konpran sityasyon sa bann kategori dimoun ozordi. Mr Speaker ozordi logmantasyon saler pe ganny fer dan Sekter Piblik selman - i enportan ki nou rekonnet ki se gran parti Sekter Prive ki anploy plis travayer ki'n kontribye konsiderableman anver lagrandisman lekonomi.

Mon dir sa Mr Speaker si nou rekonnet Sekter Prive ki moter lekonomi. Dan sa konteks, Gouvernman i bezwen amelyor sa eleman tre enportan konsiltasyon ek Sekter Prive dan nenport desizyon, ki annan en lenpak dan lanvironnman fer biznes Sesel.

Sirtou kot i konsern soutenabilite lonterm e ranforsisman rezilyans, biznes e performans lekonomi pei. Tou bann akter kle, pou bezwen toultan *on board* dan en fason konsistan dan pran desizyon mazer. Mon enplor Gouvernman lo la Mr Speaker.

Lot size ki mon oule tous Mr Speaker lo la, ki mon vwar i enportan, pou eksplike se sa size partaz larises ouswa met larzan dan

pos. Granmoun zot ti dir pa depans tou ler ou annan, met 2 kas dekote prenon kont letan dir.

Wi, i annan tan pou tou botan ensi ki movetan, letan i annabondans rezouir e tan difikilte konsidere. Akoz zonn pa zanmen konn son desten Mr Speaker. Ki mon anvi dir apre ki mon'n tann bokou koze lo sa size isi dan sa Lasanble, e menm dan program lopinyon - wi, pei pe fer byen ozordi, wi, nou annan en pti kas dekote Mr Speaker. Me eski i pridan pou donn tou ozordi, depans tou e fer pep krwar ki fitir pou an roz parey ozordi, menm si nou pa konn nou desten Mr Speaker?

Sa ki annan lasazes pou dir non fir anmezir lekonomi i permet, sa lespas pou nou donner, sa Gouvernman pou fer li ek en fason fer pridan, pa lavey en eleksyon me kan i posib Mr Speaker.

Parey dan lakour nou zer nou lekonomi dan en fason sarz e pridan. Bann ki fer lekotrer zot sibir le konsekans Mr Speaker. Nou tou nou konnen ler nou fer nou bann *visit* dan distrik Mr Speaker lo sa bann ka.

Ki anmenn mwan Mr Speaker lo mon dernyen pwen avan konklir, sa se konversasyon direktman ek sitwayen, paran, travayer dan Sekter Prive e Piblik, travayer enformel, travayer zournen, bann ki lo sibstans e finalman bann zanfana. Koman en Sitwayen Seselwa ki leta moral ou ete ver batir e devlopman sa pei?

Koman paran ouswa ou ki annan lentansyon fer zanfana, eski ou pe sitye ou byen dan konteks devlopman pei ozordi? Rekonnet ou rol pou ankouraz ou zanfana pou servi byen son letid pou sa meyer saler dan lasosyete demen. Pou travay pli dir pou reisi.

Ou travayer dan nenport ki sekte ou ete, eski ou osi ou pe konpran sa devwar pou travay dir pou rekolte fri ou zefor la dan kad sa stratezi *Result Based Management*. Konpare ek oparavan se performans dan travay ki pou ganny zize lo benefis adisyonnèl.

Ou zenn ki lo sibstans, eski ou pe servi lasyer e zefor travayer Seselwa byen, pou pran tretman e pou sey sorti dan sa latrap sibstans pou kontribye dan en travay?

Ou zanfan ki annan laz konnesans eski ou determinen pou aprann dir lekòl, fer ou letid, reste ou priyorite ziska ler ou antre dan en lanplwa, ouswa fri zefor skoler?

Mr Speaker avek sa 2 mo, mon ankor dir mersi tou travayer dan Sesel pou zot solidarite, zot travay dir e perseverans pou soutenabilite nou pei, fanmir e dezir personnel. Mersi *I beg to move*.

MR SPEAKER

Mersi Onorab. Onorab Philip Arissol ou anvi pran laparol an se moman? Onorab *go ahead*.

HON PHILIP ARISSOL

Mersi Mr Speaker. Ankor enn fwa bonn apre midi Mr Speaker. Bonn apre midi tou dimoun ki pe ekoute.

Mr Speaker i enportan pou rekonnèt rol, enportan ki tou travayer Sekter Prive e Sekter Piblik i zwe dan devlopman nenport ki pei. Depi eleksyon 2020 Sesel in fer progre dan diferan domenn, tel ki dan Lasante, Lasante Piblik, Proteksyon Lanvironnman, Ledikasyon, Tourizm sa i enn de legzanp e tou sa in ariv avek partisipasyon travayer dan Sekter Prive e osi dan Sekter Piblik.

Travayer Sekter Prive i responsab pou zener krwasans ekonomik atraver inovasyon,

lantreprenarya e kreasyon lanplwa. Travayer Sekter Piblik, zot, zot responsab donn sitwayen servis esansyel ki enportan pou byennet tou sitwayen.

Sa i enkli swen lasante ledikasyon, lenfrastruktir e sekirite. Mr Speaker nou tou nou konnen ki parfwa pa tou keksoz ki al dapre plan ouswa lafason ki nou ti a swete. Me sa bann dimoun i travay, i travayer, zot osi zot imen, alors i kapab annan fot.

Travay Sekter Prive i kontribye dan devlopman pei par kre lanplwa i zener larises pou pei, i responsab pou devlopman pou devlop nouvo prodwir e servis ki satisfè bezwen konsonmater ki an retour vin sa moter ki stimil krwasans ekonomik.

Travayer dan Sekter Prive i osi kontribye atraver *tax* ki ede finans Servis Piblik, tel ki swen lasante, ledikasyon, sekirite pou tou sitwayen. Lo lot kote travayer dan Sekter Piblik i responsab pou bann servis esansyel, enportan pou byennet sitwayen.

Sa i enkli ansennyan, zofisye lapolis, *firemen* bann travayer dan bann minister gouvènmàn e osi dokter e ners. Tou sa bann dimoun i travay sanses pou asire ki sitwayen i ganny akse avek bon kalite ledikasyon, sekirite, servis, e swen lasante.

Mr Speaker depi Eleksyon Prezidansyel 2020 i annan pa mal devlopman pozitiv ki'n arive dan sa pei. E pli signifikan se pou reisi lans program vaksinasyon *covid-19*, ki ti ede protez nou popilasyon kont sa viris.

E la nou ti vwar tout en lekip ners, dokter e bann lezot travayer Lasante ki ti travay tre dir pou lit kont sa viris e nou ti reisi. Sa ti permet reouvertir *Airport*

Enternasyonal Sesel e relans lekonomi pei. I enportan pou remersi e felisit tou travayer dan Sekter Prive e Piblik, pou zot kontribisyon anver pei.

Pou zot travay dir e devouman ki'n ede kree en meyer Sesel pandan sa dernyen 2an edmi pou tou sitwayen. Mr Speaker travayer prive e travayer Servis Piblik dan pei, dan Sesel, in definitivman zwen en rol enportan dan devlopman nou pei.

Alors i enportan nou remersye e felisit zot pou zot kontribisyon dan devlopman Sesel dan sa kourt dele letan. Parey Mosyon Onorab William i lir, "Lasanble i felisit tou travayer dan Sekter Piblik e Prive pou zot solidarite e travay dir e perseverans a kote Gouvernman pou sa sikse ki pei in fer dan sa kourt dele letan depi dernyen eleksyon".

Mr Speaker mwan mon pou siport sa Mosyon akoz i vre ki bann travayer i travay pou Sesel. Kot nou merit donn kredi annou donner. Mersi.

(APPLAUSE)

MR SPEAKER

Mersi Onorab. Mon a donn laparol Onorab Naddy Zialor.

HON NADDY ZIALOR

Mersi Mr Speaker. Bonn apre midi Mr Speaker, tou mon bann koleg Lepep Seselwa.

Mr Speaker tou le Mardi e Zedi bomaten dan Sesyon Ofisyel Lasanble Nasyonal, nou koman bann Manm letan nou komans nou sesyon – (*sorry* dan Mardi ek Merkredi) premye keksoz se ki nou lanmen i lo nou lestoman e nou premye parol se "Se Sesel ou menm nou sel patri".

Letan mon regard sa Mosyon, mon vir sa avek Lepep Seselwa. Wi, sa travayer ki dan Sekter Prive e dan Sekter Piblik, premye keksoz ki i fer dan bomaten, i remersi Senyer ki i ganny kouraz pou li leve, pou li travay. Ler i pe travay i pa travay pou lanmour pou son pei, lanmour pou son patri e an menm tan pou anmenn en lasyet manze lo latab dan lakour.

I neserer ki nou annan gratitud anver nou frer ek ser Seselwa. Wi, deza 2an, 2an depi ler nou ti avek bokou lekspektasyon avek en lafors imans pou nou tir en rezim e met en nouvo lespwar pou Sesel. E dan sa lespwar, sete non selman pou bann politisyen ki pe asize isi dan sa Lasanble ouswa pou sa group politisyen ki asize *State House*, me lespwar pou sakenn nou Seselwa, donn en lanmen travay, travay dir pou anmenn Sesel kot i ete ozordi.

Lespwar ki nou ti konnen ki sakenn nou Sesel e Seselwa, nou ti dan en moman difisil. En moman fernwar. Wi, sa nyaz nwar ti'n ale me ti reste bokou, bokou, pou nou fer Mr Speaker.

I annan ki ti dekrir Sesel koman en kales kase. I annan ki ti bezwen parske kales ti'n deza kase. E parske ti annan serten ki ti'n fini pran zot bout, pou anmenn kot zot e fer sa vin zot bann aki. Me ou avek mwan nou'n reste deryer pou nou travay pou Sesel Mr Speaker.

Alors mon vwar sa Mosyon koman adekwa pou nou dir avek Lepep Seselwa mersi! Mersi pou reste rezilyan, mersi pou kontinyen travay dir pou pei. Mersi pou bann letan difisil kot ler Sesel ti demann ou pou leve e travay, leve annou aranze, leve donn en koudmen ou'n vini, ou pa'n kale, ou pa'n saboule ou pa'n fer okenn konplo sabotaz.

Me ou leve bomaten ou'n travay pou ou pei. Me ozordi nou, nou dir avek zot mersi Mr Speaker.

(APPLAUSE)

HON NADDY ZIALOR

Sa ki enportan dan sa Mosyon apre midi, se pa pou nou tir bann keksoz negativ, parske tro souvan nou annan tro bokou negativite. I annan ki asiz dan en kwen e rod tou pti zwen, tou pti kwen kote ki mal, san ki i donn lanmen rod en solisyon.

Me letan *Air Seychelles* ti pe koule, ti annan en group dimoun ki li i ti atrap lanmen *Air Seychelles* e fer *Air Seychelles* vin kot i ete ozordi, fer li fleri Mr Speaker.

(APPLAUSE)

HON NADDY ZIALOR

Letan, letan Sesel e Seselwa ti pe ganny demande pou pran en vaksen, ti annan en group ners ek dokter ki ti travay lannwit, lizour pou fer Sesel ariv kot i ete ozordi Mr Speaker. Nou dir zot mersi!

Letan ti annan *lock down*, ti annan en group *teachers* ki ti pran en letan dan lakour pou prepar leson pou bann zanfana, akoz zot kontan zot pei Mr Speaker. Nou dir zot mersi!

Letan ki mwan avek ou ti pe dormi lo nou lili, ti annan en group zofisye lapolis, solda ki ti pe travay lannwit, lizour san ganny en *off*, pou fer sir ki Sesel i reste an sekirite Mr Speaker, nou dir zot mersi Mr Speaker.

Letan ki ou, ou ti pe al laboutik ti annan en zonn en fanm, en zenn ki ti fer sir ki sa komodite ler i ganny debarke lo *airport* oubyen lo por i ariv dan laboutik, pou ou kapab aste Mr Speaker nou dir zot mersi!

Wi, Mr Speaker. Malgre negativite, malgre i annan ki'n sey tou fason, tou mannyer pou ki Sesel i *fail*, pou ki Gouvernman i *fail* e zot ankor pe seye. Me ozordi mon krwar i en moman pou nou montre nou gratitud. Tre souvan nou bliye montre gratitud.

Nou krwar gratitud i merit ganny demontre, oubyen remersiman, i merit ganny donner dan en fason monneter, me parfwa en mersi i enportan. Alors pou sa Sekter Prive ki li i pe fer sir ki i leve bomaten, pou kontinyen zener larzan pou ki sa larzan i ganny mete dan Kof Leta.

Pou ki nou bann frer ek ser i kontinyen ganny servis apele servis piblik, nou dir mersi Mr Speaker. Mon fer mon lentervansyon dan sa fason, preske si nou onnet ek nou lekor e si nou koz ek nou leker, e nou met tou diferans a kote - si nou onnet nou bezwen dir ki Sesel ou sorti lwen, nou sorti tre lwen.

E la avan mon terminen, mon mesaz pou nou isi dan sa Lasanble pou sa zenn ki ozordi i ankor lo ban lekol, pou sa paran ki swa i pe elev son zanfana li tousel ouswa i ape travay wi, pou ou ki dan nou kominote - wi, Sesel i nou sel patri, napa ver, napa ble, napa zonn, napa rouz. Me i nou sel patri!

Letan ou travay regard ou paviyon. Travay avek ou leker, travay ek lanmor pa travay zis akoz en lopinyon, travay pou Sesel. Travay pou ki demen bomaten met antet ki ler Sesel i reisi ou osi ou reisi, me ler Sesel i tonbe, ou osi ou tonbe.

Si vreman nou anvi war sa Sesel vin sa bizou dan Losean Endyen, si demen bomaten nou anvi war nou ledikasyon, i vin en sikse. Si demen bomaten nou anvi war nou lasante nou viv pli byen e

pli meyer, fodre ki nou kontinyen travay.

Wi, mon'n deza dir e i annan ki'n dir avan mwan, ozordi mon pou repete travay ek nou leker, travay ek lanmour, travay pou Sesel Mr Speaker. Alors ou ki dan Sekter Prive, ou ki dan Sekter Piblik, ou ki konnen pou dir ou pei i pas avan tou, kontinyen mazin pozitiv. Kontinyen travay dir.

E wi o fir o mezir ki nou ganny rekonpans, larises pei ozordi in montre nou atraver logmantasyon. Atraver restriktirasyon ki dan sa transformasyon, pa zis mwan me nou tou nou bezwen form parti ladan.

Avek sa 2 mo mon pe apart mon sipor pou sa Mosyon Mr Speaker. Mersi.

MR SPEAKER

Mersi Onorab. Mon a donn laparol Onorab Georges Romain.

HON GEROGES ROMAIN

Mersi Mr Speaker. Bonn apre midi Mr Speaker, bonn apre midi pou tou dimoun ki a lekout.

Mr Speaker mon osi mon pou pran sa moman letan, parey loter Mosyon in fer resorti, pou felisit tou travayer Seselwa. La mon pe koz travayer prive ek travayer Gouvernman pou sa travay ki zot pe fer, depi ler ki sa nouvo ladministrasyon in vin o pouvwar, pou ede fer nou ariv kot nou ete ozordi.

Mr Speaker sa mon kapab dir ti annan en vre solidarite antre nou. Mr Speaker pou mwan komanse mon pou komans par dir lo kote Minister Lasante, ki mon santi ki Minister Lasante ler nou ti ganny COVID ki ti komanse an 2020, kot

nou zanmen nou'n deza eksperyans en keksoz koumsa dan nou pei.

Me ki nou ti vwar Mr Speaker? Nou ti vwar bann dokter profesyonnel ki ti'n vin devan nou, par atraver konferans lapres preski tou le semenn, ki ti vin ede pou sansibiliz nou pou nou konpran vreman ki savedir sa pandemik *covid*.

E byensir atraver son Minis, Minis Vidot, ki osi in zwe son rol pou mentenir ki tou dimoun dan pei i konpran egzakteman ki ti pe arive dan sa letan. E apre sa atraver nou Prezidan, nou tou nou konnen ti pe ede osi, pou nou kapab ganny akse ek sa ki nou apel vaksen.

E nou konnen i ti fer son rol kot i ti ale, kot nou ti ganny kargezon kado. Parey i ti dir Prezidan ti dir nou ti ganny sa vaksen. E li menm i ti donn en legzanp Mr Speaker, kot i ti parmi sa premye dimoun dan pei ki ti pran sa vaksen. E nou koman Manm Lasanble nou ti swiv sa zour.

E sa mon vreman fyer Mr Speaker, akoz i montre ki en pei ler pe devlope byensir, nou bezwen annan disiplin. Mr Speaker letan nou ti pe komans pran sa vaksen, nou tou nou konnen i annan plizyer doz vaksen ki nou ti bezwen pran.

E ler nou pe koz, felisit tou nou travayer Seselwa, byensir nou'n rankontre bann *nurse* ki ti pe donn sa vaksen. E la mwan, mon oule fer resorti enn mon zabitan ki toultan kot mon ti ale mon ti vwar li, ler mon ti pran vaksen, Ms Estico ki toultan li sak fwa ou aparet, ou vwar li ek sa sourir ki toultan i ti pe ankouraz ou ler ou ti pe vin pran sa vaksen.

E la dernyen fwa letan mon ti pe al pran mon pilil *malaria* lopital, mon ti rankontre li ankore. Par kont in ganny promote dan son karyer, e

la in vin koman en program manager kot *CDCU*, e sa mon felisit li. Mon vremen kontan pou li.

Mr Speaker, lot departman osi ankor ou kapab dir ki'n vremen fer nou fyer, depi ler Sesel sa nouvo ladministrasyon in vin o pouvwar, lo kote *tourism*. Nou'n vwar ki letan *airport* ti reouver, nou'n vwar ki touris in kontinyen vin Sesel menm si zot pei pa ti pe ganny sa kantite touris parey nou ti pe komans gannnen.

E nou vwar nou kapab dir nou ti en pei ki ou kapab dir ti'n vremen beni, akoz touris ti pe kontinyen antre Sesel lo lakantite. E nou menm nou konnen ki nou dir touris i nou premye pilye nou lekonomi. E alors sa ti pe ed nou pou nou kapab ganny plis larises, pou nou kapab kontinyen devlop nou pei.

Mr Speaker en lot ankor mon kapab dir, en antite dan nou pei ki mon koleg Onorab Naddy i fek fer resorti. Ler in nonm *Air Seychelles* i en landrwa ki mon'n deza travay laba kot mon konnen ase byen, anba son *Acting CEO* en zenn garson Mr Sandy Benoiton, mon krwar zot pe fer en bon travay laba.

Par kont si sa Gouvernman ozordi pa ti entervenir ozordi nou pa ti pou koz ankor lo *Air Seychelles*, e mon krwar sa in montre ki sa Gouvernman i serye parey nou abitye dir. E in anvi fer sir ki tou sa travayer *Air Seychelles* i kontinyen travay, e la ozordi mon'n tande ankor ki sikse ki *Air Seychelles* pe fer. La mon tande byento zot pe al *Sri Lanka*.

E sa i vremen fer ou fyer ki ler ou tande ki nou *National Airline* pe kontinyen anvole. E mon ti ava profite felisit tou sa bann travayer *Air Seychelles*, kontinyen ek sa bon travay. par kont Mr Speaker letan

nou ti dan *COVID*, ti napa avyon ki ti pe vin Sesel.

Me sel tapaz avyon ki nou ti pe tande dan nou lespas i ti *Air Seychelles*, e li sa letan i ti pe fer koman en louvraz i ti pe anmenn koman *cargo* dan plas anmenn pasaze. E i ti pe al sers bann marsandiz ki esansyel pou nou pei, e pou sa ankor mon ti a kontan felisit zot.

Pou tou sa bann *staff* ki'n met zot lavi an risk dan sa letan, kot nou pa ti ankor vremen konpran sa pandemik *COVID*. E sa Mr Speaker mon dir zot mersi bokou, tou *staff Air Seychelles* ki'n partisipe ladan.

Ankor en lot anba Minister kote lapolis Mr Speaker, nou'n vwar ki lapolis anba sa transformasyon ki pe arive kot Lapolis, i pe vremen anmenn en pozitiv laba.

Kot nou vwar ozordi bann zofisye pe vremen pli disiplinen ki avan, e menm parey bann koleg Onorab in deza fer resorti, kot nou pe vwar bann kominikasyon pe ganny sorti ase vit konmela lo *Facebook*.

Ki en senp pti keksoz ki'n arive an pei en aksidan, en dimoun perdi, ou vwar ki lapolis atraver zot *PR* pe fer konnen pep Seselwa ki pe arive. E sa ou vwar sa sanzman ki pe arive dan lapolis Mr Speaker. E pou sa mon dir zot felisitasyon, kontinyen ek sa bon travay nou dan en bon semen Mr Speaker.

En lot landrwa ankor kot mon pou touse Mr Speaker, se nou Lafors Defans Sesel, atraver zot *Coast Guard* nou konnen ki zot pe fer en bon travay. E nou konnen ki zot, zot pe vremen sofgard nou *EEZ*, kot nou konnen kot bokou sa ki nou koze, sa ki nou kontan dir drog sa fleo ki pe kontinyen antre dan nou pei.

E nou zis mazinen si zot pa ti pe fer sa travay ki ti pou arive avek nou pti pei. Deza nou ganny konsidere koman limero 1 dan lemond e alor nou bezwen kontinyen ankouraz zot Mr Speaker, pou zot kontinyen fer sa travay.

En lot landrwa ankor osi Mr Speaker ki ler nou gete anba *SFRSA*, kot lannen pase kot nou'n vwar en madanm pou la premyer fwa Ms Tally Domingue in vin sa *Chief Fire Officer*, ki pou mwan i en keksoz ki vreman gou pou gete, ti vreman byen ler nou ti vwar en zenn madanm pe resevwar pe ganny sa pozisyon atraver Minis Fonseka. E pou mwan sa i fer nou fyer Mr Speaker.

Nou vwar ki pa zis bann zonm ki kapab tenir sa bann pozisyon, ozordi i annan bann madanm osi ki kapab pe tenir bann pozisyon o dan sa pei. E sa madanm in travay 25an dan sa travay, e pou sa mon konnen nou'n deza felisit li plizyer fwa, e mon ankor enn fwa ozordi mon profite pou felisit li dan son karyer avek tou sa bann travayer ek tou sa bann ki ti ganny promosyon sa letan.

Kontinyen ek sa bon travay akoz mon konnen zot travay pa fasil Mr Speaker. Parey nou'n vwar dan sa bann lannen ki'n pase, bokou dife in kontinyen arive e zot in kontinyen fer sa travay menm si zot resours ti limite. E pou sa mon dir zot kontinyen sa bon travay e nou dir zot mersi bokou.

Mr Speaker ler nou get *STC*, kantmenm en bon pe nou bann koleg ozordi lot kote latab, i kontinyen koz en pe vreman negativ lo kote *STC*. Mon konnen avan i ti apel *SMB*, ozordi nou apel li *STC*. E ler nou regarde dan sa pandemik *COVID*, ki nou'n vwar Mr Speaker

STC in kontinyen zwe son rol pou fer sir ki bann *basic* komodite - ki parey nou dir - i annan dan nou pei.

E ler nou'n regarde nou pa'n zanmen mank komodite dan nou pei, kot menm nou'n vwar dan bann lezot pei kot parey nou'n tande kot delwil ti napa, kot nou, nou pei sa ti ranpli lo *shelf*. E menm dapre konpran ti annan touris ki ler ti vin dan nou pei, ti pe aste nou delwil pou zot al avek dan zot pei.

E sa Mr Speaker i montre ou ki sa nouvo ladministrasyon, sa travay ki i pe fer i lo en bon semen. E sa ankor enn fwa atraver *Management STC* ek tou son travayer mon pou dir zot mersi osi pou sa bon travay ki zot in fer. Mon dir zot kontinyen dan sa bon semen.

Mr Speaker mon pa pou kapab terminen san bliy nou bann *teachers*, nou bann ansennyen. Zot osi, zot in zwe en rol vreman enportan dan nou pei. Parey nou konnen letan ti annan *COVID*, ankor enn fwa nou bann *teachers* ti pe vreman met zot lekor a risk e pou sa zot ti bezwen menm pe ede fer lekol parey nou dir *online*.

Kot bann zanfan i reste se zot e zot, zot ti pe donn leson atraver sistenm *internet*. E sa ti premye fwa dan nou pei nou ti pe eksperyans en keksoz koumsa Mr Speaker. E sa pou mwan, mon bezwen felisit Minister Ledikasyon pou sa *challenge* ki zot ti pe pas ladan. E zot in kapab mon kapab dir zot in kapab delivre ek nou bann zanfan e menm dan letan *COVID*, ti annan bann bon rezilta ki ler zot ti fer zot legzanmen.

Ki nou ti vwar ki nou bann etidyan ti fer vreman byen, e pou sa ankor Mr Speaker mon pou dir avek nou bann ansennyen ek tou bann travayer Minister Ledikasyon

kontinyen lo sa bon semen. Akoz avek zot mon konnen nou bann zanfan pou fer pli byen a lavenir.

Mr Speaker pou terminen, mon pou dir mersi nou Gouvernman, pou sa bon travay ki nou pe fer. Si ozordi nou pe fer sa travayer piblik ganny ogmantasyon 10poursan dan Gouvernman, se gras a sa bon travay ki pe ganny fer, ki pe ganny fer dan pei. E sa Mr Speaker mon bezwen rekonnèt bann travayer prive osi tou, bann biznes prive.

Akoz se gras a zot osi tou ki pe ede pou travayer Gouvernman ganny sa 10poursan logmantasyon, me par kont Mr Speaker mon'n deza fer resorti ki travayer prive osi i annan en bon pe zot ki pe donn logmantasyon zot *staff* apartir lafen dimwan Avril.

Ankor enn fwa mon pe dir zot mersi bokou pou sa logmantasyon ki zot pe donn zot travayer, kontinyen osi lo sa bon semen. Mr Speaker nou'n sorti vreman lwen pou ariv kot nou ete ozordi, sa nou bezwen rekonnèt Mr Speaker. Mon a dir ou mersi Mr Speaker.

MR SPEAKER

Wi, mon a dir ou mersi Onorab Romain. Laparol prezan pou Onorab Samynadin.

HON KELLY SAMYNADIN

Mersi Mr Speaker. Mr Speaker mon pou komans mon lentervansyon par sit parol Prezidan Ramkalawan ki ganny trouve dan son lentrodiksyon dan manifesto *LDS* pou eleksyon Oktob 2020, e mon sit li " sa Gouvernman ki mon pou dirize, pou konsyan ki nou pa la pou nou lekor, me pou nou pei ek nou pep. Nou pou komans lo en nouvo paz avek respe pou *rule of law*, pou bann lenstitisyon

demokratik ki nou'n travay dir pou anmenn an konsepsyon avek en komitman pou lazistis ek enparsyalite. Nou pou gard sa ki bon e sofgard zot bann drwa ek benefis." Fen sitasyon.

Wi, Mr Speaker dan sa kourt dele letan parey Mosyon anmennen par Onorab William i dir, nou'n akonplir bokou. Travayer Seselwa in akonplir bokou. Nou Gouvernman in konsyan ki sa pei i bezwen rekonpans son bann sitwayen pou zot bann travay dir dan en fason ki soutenab.

Malgre ki i annan en kantite konplo ek sabotaz pou detourn Seselwa anver vre realite nou pei, ki letan nou ti erit li apenn si i ti pe kapab debout lo son 2 lipye. Seselwa in pas atraver en tranzisyon 13enm mwan saler kot zot in konpran ki nou bezwen travay dir, e ki a lafen sa ki nou'n senmen se sanmenm ki nou pou rekolte.

Zot in konpran ki pou sa pei re transformen, re ganny son souf i pou determin lo zefor sakenn de nou. Seselwa in kapab a lafen lannen 2022 fer en analiz personnel lo zot performans. Byensir anba gidans zot siperyer, e trouve ansanm dan ki fason ki zot pou amelyor lo zot bann febles.

Ensi lo rod fason ki mannyer zot pou travay davantaz an ekip pou ed bann ki pa pe perform alaoter, pou zot osi travay lo zot performans. Mr Speaker nou manifesto i osi dir ki lavenir i pa depan zis lo Gouvernman, me osi lo dimoun ki pe travay dan en klima ki ankouraz linisyativ ek lenzirnyozite.

Gouvernman i la pou servi e son bann lorganizasyon i devret reponn ponktyelman a bann dwa ek bezwen son pep. Se dan sa

perspektiv ki nou'n kapab apre 2an, obzerv en sanzman signifikan dan linisyativ bokou travayer, ki swa prive ou piblik.

Mon rekonnet Mr Speaker ki wi, i ankor annan bokou pou fer an term sanzman persepsyon ki parfwa i pou rezon politik, kot serten zot, zot moto se sabotaz e trenn lipye.

Mon pou profite ozordi pou lans en lapel avek tou travayer Seselwa, sa pei i pou nou tou, si nou les li tonbe (parey mon koleg Onorab Zialor fek dir), nou pe les nou lekor tonbe. Nou fanmir, nou zanfan e sa pep tonbe.

Pou bann anplwayer, zot bezwen asire ki zot lafors travayer i devlop en lespri lekip ki koesif ki touzour konsantre. Osi ki fer provizyon pou *mentoring ek training*, akoz sa i pou ede ogmant nivo performans ek *skills*. Zot bezwen osi asire ki rol ek responsabilite sak travayer i ganny byen alinyen, akoz sa i lakle pou asir prodiktivite dan travay.

Sak travayer i kapab travay dapre son bann konpetans, e perform zot bann fonksyon dan bann fason ki pli efektif e pli efikas. Bann anplwayer i bezwen asire ki zot bann travayer i travay dan en lanvironnman ki motivan, ensi ki rekonnet zot bann diferan bezwen. E i osi en nesesite pou konpran zot konportman e pou trouv bann mezir remedyasyon kolektivman byensir anliny avek Polisi zot lorganizasyon e an akord avek Lalwa Lanplwa.

Pou konklir Mr Speaker mon oule fer resorti ki lafors travayer en lorganizasyon ou lenstitisyon, i enn bann *asset* pli enportan ki anmenn ver son sikse. I enportan ki bann anplwayer i anploy en lafors ki apropiye an term lakantite e kalite.

E la mon pe koz lo konpetans e kalifikasyon, afen ki prodiktivite e profit abilite i ava ganny asire, mon ti a kontan primordyal man remersye, e felisit sak travayer Seselwa pou zot zefor e devouman kotidyen dan zot lanplwa, malgre bokou defi kot en mazorite zot pe demontre rezilyans e patriyotizm ki an retour anmenn rezilta.

E ankor dapre manifesto nou parti, ki sa gid dan ki vizyon nou Gouvernman i ganny trouve, e mon site "Sakter Servis Piblik i sa lebra enportan ki permet fonksyonnman Gouvernman. Se inikman avek en lorganizasyon ki efikas pou enplimant bann Polisi e administre bann program ki Egzekitiv, pou kapab delivre lo son bann promes. An sa ki konsern Sakter Prive nou manifesto i dir ki prosperite ekonomik pei i depan lo en Sakter Prive dinamik ki inovan e antreprenant, e ki profit o maksimonm lo sa ki nou pei i ofer.

Me ki osi eksplor o dela nou frontyer pou lezot loportinite. Gouvernman i rekonnet ki travay dir i anmenn rekonpans e tre byento, sak Seselwa dan Sakter Piblik pou resevwar en logmantasyon lo zot saler debaz e Sakter Prive pe ganny demande pou zot osi fer parey byensir tou depandan lo zot mwayen profit abilite.

Mon remersye nou Gouvernman pou kre plizyer louvertir pou loportinite pou tou Seselwa, sirtou bann zenn an term letid, karyer e biznes. Mon konstate ki sakenn pe pourswiv son lanbisyon dapre son kalifikasyon. E mon pe demann bann ki pa ankor vin devan pou fer li.

Rod led kan ki zot santi zot bezwen, akoz lavenir nou pei i depan lo zot bann zenn. Mon profit

sa lokazyon Mr Speaker pou swet tou travayer en bonn fet, e parey gran filozof Aristotle i dir, “*Le plaisir dans le travail met la perfection dans le travail.*” Mon remerci ou Mr Speaker e mon konfirm mon sipor pou sa Mosyon. Mersi.

MR SPEAKER

Mersi Onorab. Mon a donn laparol Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker, bonn apre midi tou Onorab, bonn apre midi tou dimoun a lekout.

Mr Speaker sa Mosyon in vin a en letan vreman merite aköz letan nou fer refleksyon lo bokou kritik, negativite ek bokou bann konpany sal ek dezespere ki pe pase dan nou pei, ozordi sa Mosyon pe senpleman anvoy sa mesaj kler, pou nou eksplik nou pep lo sikse nou Gouvernman pou sa 2an edmi apre ki in pran pei.

Mr Speaker bokou keksoz pozitiv in arive dan nou pei, atraver bann desizyon byen kalkile e responsab, kot a lafen rezilta in vin dan lentera nou pep e nou pei. Mr Speaker pou nou arive selebre lakonplisman bon travay nou Gouvernman pou sa dernyen 2an, nou pou bezwen osi rekonnèt travay tou bann dimoun dan Sekter Piblik e Prive, ki'n travay a kote nou Gouvernman parey Mosyon i site.

Mr Speaker nou pou osi rekonnèt ki malgre bokou lesey pou trenn lipye, donn fo lenformasyon, kraz bann desizyon pran par Gouvernman, travay malis, i enportan note ki bokou nou bann travayer dan Sekter Piblik osi dan Prive, in fer tou pou arive sirmont tou sa bann lobstak e ki zot pe

travay pou lanmour zot pei e osi pou zot fanmir.

Sesel in fer fas avek bokou defi, sityasyon enprevi tel ki pandemik *COVID-19* e apre tonm dan lenpak lager *Ukraine*. Mr Speaker sityasyon pa'n fasil, me Gouvernman ek sa tim dan Sekter Piblik e osi Prive in reste solid par met pei an premye.

Zot in realize ki sa pei i pou nou tou, si nou pa sipor li napa personn ki pou fer li pou nou. Mr Speaker malgre *curfew*, Prezidan pei pa ti ezite pou vwayaze dan lezot pei pou al tap laport pou anmenn soutyen pou son pep ek son pei.

Mr Speaker bann sikse nou Gouvernman premyerman ti anmenn vaksen, pou kapab arive kit nou pei ouver e kontinyen fonksyonnen.

Atraver sipor nou bann dokter ek bann ners ki ti pare pou travay *long hours*, pou fer sir ki tou sa ki raporte i resevwar son vaksen pou gard li an bonn sante pou li kontinyen travay. Gouvernman ti pare pou gard *airport* ouver pou ki touris i kontinyen antre, e la nou dir mersi bann travayer ki ti devoue pou anmenn sa bon servis. E akey bann etranze dan nou pei avek lanmour, avek lazwa e osi respe.

Nou por ti reste ouver pou ki manze i kontinyen ariv dan pei, ankor nou pou remersye tou bann travayer por, ek bann *stevedores* ki ti raporte byen granmaten pou donn zot kouraz, pou fer ki bann bato ti resevwar servis nesese e manze ti ariv dan bann laboutik.

Ti osi enportan ki Gouvernman ti war li nesese pou koup lo bann depans ekstravagan, pou fer ki laklas travayer i arive tous zot saler apre tou sa zefor ki zot in met dan zot travay e pou ki osi nou bann dimoun aze ti

kontinyen tous zot pansyon ek zot Sekirite Sosyal.

Mr Speaker sa Mosyon i koz lo solidarite ek travay dir dan Sekter Piblik ek Prive, ki nou tou nou konnen ki par zot perseverans, lonnekte ek senserite zot pe kontinyelman zwe en gran rol dan performans lekonomi nou pei.

Mr Speaker apre tou zefor posib byento pep Seselwa pou rezouir atraver en logmantasyon dan zot saler. Tou sa bann sikse se gras a zot devouman, senserite ek pozitivite.

Mr Speaker mon pou aport mon sipor pou sa Mosyon anmennen par Onorab William, par aport osi mon felisitasyon personnel, pou tou travayer dan Sekter Piblik e osi dan Prive ki pe kontinyen aport zot kontribisyon pou fer ki nou pei Sesel i kontinyen avans devan. Mersi.

MR SPEAKER

Mersi Onorab. Mon a pas laparol Onorab Audrey Vidot.

HON AUDREY VIDOT

Mersi Mr Speaker. Mr Speaker, tou Manm Onorab, zabitan Roche Caiman e tou manm piblik ki a lekout bonn apre midi.

Mr Speaker ozordi ler nou koz lo realite ki pe pase Sesel e annan en deba fran e onnet lo vre sityasyon e santiman travayer Seselwa, ou vwar kot ou ganny akize ou pe kre negativite.

Konpanya sal, sabotaz, tousala. Ozordi si en mal pratik oubyen ou lopinyon i diferan avek Administrasyon ozordi, larogans pouvwar i le dikte ki ou pe kre negativite. Mr Speaker, mon le met lo rikord sa Lasanble ki menm si desizyon pou pa aksepte mon notis pou anmenn en lamannman lo sa

Mosyon ki devan nou Lasanble ozordi, e ki tou lenformasyon piblik parey mon ti ekrir notis avek Speaker, mon pou donn ledikasyon piblik kwa ki mon'n demande.

“Lasanble i felisit tou travayer dan Sekter Piblik e Prive pou zot solidarite, travay dir e perseverans menm si zot in pas dan en difikilte e soufrans dan sa kourt dele letan depi dernyen eleksyon.” Fen mon sitasyon.

Nou dan *United Seychelles* mon bann frer ek ser Seselwa ki pe ekout nou, nou ankor enn fwa eksprim nou dezapwentan lo desizyon ki in pran pou pa aksepte sa notis. E mon oule met lo rikord pou vwar ki sa lanons ki *United Seychelles*, sak fwa letan nou anvoy en notis ki swa pou lamannman Mosyon, Lalwa, ki sorti kot nou *United Seychelles* zot war en fason e leskiz pou anpes li.

Zot pa war li pou aksepte e sa nou konpran tre byen sa nou, akoz nou rekonnet e nou konnen poudir byensir nou napa okenn sipor, si nou Speaker i Manm i reste Manm, Dirizan *LDS* e son mazorite definitivman pa pou siport nou dan okenn zot amannman.

Mr Speaker apre zot menm zot ki konplent e akiz nou *United Seychelles*, konmkwa nou pa oule anmenn okenn lamannman oubyen okenn notis, pou nou fer en sanzman ki swa dan en Mosyon oubyen dan en Lalwa.

Mr Speaker me avek tou lesey kot nou lo sa kote latab, sa pa pou anpes nou dan *United Seychelles* kontinyen egzers nou dwa koze pou sa group travayer Sekter Piblik e Prive, ki pa partaz menm santiman, avek bann Manm lo lot kote latab. E nou, nou pou felisit sa group travayer ki kontinyelman vin fran e onnet an piblik pou montre zot

lopinyon diverzans zisteman parey nou bann sityasyon lo deba ki'n komans leve dan nou Lasanble ozordi apre midi.

Mr Speaker pou serten 2an edmi i en kourt dele letan pou en mazorite nou pep, espesyalman travayer Seselwa ki pe leve debourye toulezour. Me i ankor annan en mazorite ki santi poudir sa presyon e kou lavi ki zot pe pas ladan ozordi, 2an edmi en kantite keksoz ti kapab ganny fer pou soulaz zot.

I annan travayer ki'n eksprim a piblik ki depi dernyen eleksyon zot sakrifis pa pe ganny valorize, e sa kantite keksoz ki Gouvernman ti kapab fer pli byen pou soulaz zot; sityasyon lavi e zot dezapwente e bokou regre ki sa pa pe ganny materyalize.

Mr Speaker nou dan *United Seychelles*, nou pa kont felisit travayer dan Sekter Piblik e Prive e soldier avek zot, pou zot travay e devouman anver pei, me i enportan note ki pou en tel zes annan valer i senpleman ler sa ki eksprim li i fer li fran e onnet e senser dan son parol.

E si napa lafransiz, lonnekte, e senserite dan rekonnnet travay dir e perseverans en travayer i kler ki i annan lipokrizi dan sa en tel zwe. I pa akseptab pou frenm lizye e pa koz lo fristrasyon travayer Servis Piblik e Prive, ki wi i pe solider me selman ou pa pe koz lo son soufrans e valoriz son sakrifis.

Zis parey zot in mal onnet sa Gouvernman avek 13enm mwan saler, *long service allowance*, larzan pansyon, laz pansyon ek Sekirite Sosyal, logmantasyon 10poursan e pa bliy sa bann nouvo Lalwa ki annan zot ki zot mazorite zot in fer pase, san konsiltasyon avek piblik.

Zis pran legzanp lo Lalwa *Home Care* e ozordi lespwar nou bann *career* i telman o, an krwayan zot pou ganny en logmantasyon dan 10poursan.

Si sa ki zot apel sikse sa bann keksoz zot ankor tre, tre, lwen avek realite sityasyon lavi ozordi. Mr Speaker nou Lasanble ti pou pli byen kapab felisit nou bann travayer Seselwa dan Sekter Piblik e Prive, pou zot solidarite, travay dir e perseverans pou pei.

Par kont rekonnnet sakrifis ki zot ankor pe fer pou konbat avek sa presyon e kou lavi ki pe kontinyelman ogmante ozordi. Me le moman ki sa Mosyon pe dir sa travayer Sekter Piblik e Prive ki nou Lasanble i felisit zot solidarite, travay dir ek perseverans a kote sa menm Gouvernman ki pe fer zot martir.

Pou demann zot ki zot pe debout a kote zot pou sikse zot pei dan sa dernyen eleksyon. Konsern ki travay Seselwa pe eksprimen, eski nou Lasanble pe boufonn travayer Seselwa? Akoz sel moman dan sa 2an edmi ki swadizan kourt letan pou serten lo lot kote, zot bann travayer Seselwa in vwar zot pe solider.

Pe bezwen solider fer sakrifis pa esper 2an edmi pou li kapab ganny en logmantasyon, kan zot koman zot ti antre dan gouvrenans zot ti pran tou sa ki pou zot e zot ti byen aranz zot.

Zot logmantasyon *allowance* ki swa palto, ki swa medikal, ki swa lakaz e lezot ankor. Zot ti aranz zot, zot. Seselwa ti dir zot espere fir an mezir. Mr Speaker i regretab ki priyorite *leadership* Ladministrasyon LDS ti aranz zot koman zot ti antre an Gouvernman, servi zot pouvwar mazorite gouvrenans pei par fer Seselwa

soufer e esper 2an zis pou zot montre *United Seychelles* ki zot ki pe *rule border*.

Akoz zot ta revanz, vanzans kot bann serten endividi e pa pran en sou konpasyon pou sa travayer Seselwa, ki li i pa konn naryen dan zot bann plan revanz e vanzans personnel.

Prezan sey dir nou ki manner travayer Seselwa pou seryezman krwar senserite dan nou travay Lasanble atraver sa Mosyon? Ki manner zot eksepte piblik pran nou koman en Lasanble serye?

Mr Speaker avek tou respe ki mon annan pou nou bann Manm Lasanble lo lot kote latab lafason ki sa Mosyon in ganny prezante dan nou Lasanble. E apre ekout serten lentervansyon lo lot kote latab, sa Mosyon pa pe fer zistis e montre senserite dan felisit travayer dan Sekter Prive e Piblik pou zot solidarite travay dir ek perseverans, pou pei dan sa dernyen 2an depi zot in ganny eleksyon.

Mr Speaker en Lasanble serye i bezwen fran e onnet, ler bann Manm pe eksprim solidarite anver bann travayer Sekter Servis Piblik e Prive, e montre ki nou pe vremen valoriz travay dir, travayer Seselwa par kont lafason ki sa Mosyon pe ganny prezante i mal onnet.

Pou nou Lasanble vin servi ledo travayer dan Sekter Piblik e Prive pou promet inefikasite *leadership* Gouvernman ozordi, nou konn tre byen ki *leadership* sa menm Gouvernman in senm en pake lagrenn bat latet avek zot dan zot dernyen eleksyon. E travay se travayer Seselwa pe soufer anba zot governans.

E ozordi zot pe sey vin netway sa pake lakizasyon ki zot in fer, ki pa ni menm fonde, atraver zot

Prezidan osi ki resaman in koze dan Leta Lanasyon. Zot menm zot bann Minis dan bann sesyon kestyon, a plizyer repriz zot in zis koz mansonz avek pep Seselwa.

Mr Speaker i enportan ki mon fer resers, refer sorti ki Gouvernman *LDS* zot in fer konpany pou fer sanzman e kritik Gouvernman *US*, pa ti bon zot pe vin fer pli byen.

Par kont ozordi nou pe tann bokou travayer Seselwa ki'n vwar zot dan en fason, zot in sanz zot fason panse e vwar zot ki sistenm *US* ti pli bon ki sa enn ki radikal ki'n ganny sanze depi dernyen Eleksyon. Si bann Manm *LDS* dan Lasanble Nasyonal ti vwar ki soufrans travayer Seselwa dan Servis Piblik e Prive i en sikse, e ki zot krwar sa bann travayer i apresye zot pe felisit bann fo profet, i kler ki zot dekonekte avek travayer Seselwa.

E mon sit legzanp aköz ki nou lo sa kote latab nou vwar manner zot in dekonekte avek realite e travayer Seselwa. E pe osi fer travayer Seselwa ki ti dir, ki dan sa swadizan dele letan, depi dernyen eleksyon espesyalman krwar ki zot in fer e ki zot pe pran laglwar lo sa ki travayer Seselwa pe fer ozordi, zot ti dir zot pou met larzan dan pos Seselwa, e travayer Seselwa in fer zot konfyans ek lespwar ki zot ti pou fer en pli meyer demen.

Ler zot pe promet sikse Gouvernman pa bliye ki parmi sa bann sikse, se fer pri bis monte. Kontribisyon pey Fon Pansyon monte, kou lavi kontinyelman ogmante, kontinite dan *long service allowance* ki dimoun ozordi bann travayer dan Servis Piblik pe dir so *long bye, bye farewell*.

Benefis ki ti sipoze pe soulaz sa bann ki ti pe travay e pe ganny

difikilte pou fer 2 bout zwenn, pe vin en kosmar pou rod en tel led anba Lazans Proteksyon Sosyal. Lentansyon Gouvernman pou logmantasyon egal, *tune in sanze*.

Travayer Sekter Piblik e Prive i konpran tre byen ki anba Ladministrasyon LDS, sa ki ti annan pou touzour annan, e sa ki napa pou reste touzour napa. Mr Speaker granmoun i dir ki konmisyon dimoun pa pake, alors mon pou bezwen fer pase mesaz ki plizyer travayer Servis Piblik e Prive dan bann distrik kot nou *United Seychelles* in pase. E ganny demande pou pas sa mesaz Lasanble Nasyonal.

Ki travayer Seselwa ki pe monte desann dan bann biro Gouvernman, pe vir an ron parey toup, pe senpleman esper zot bann LDS ki ti pase dan dernyen eleksyon pas kot zot ek pasyans. Akoz la zot in dir mwan ki zot pou dir avek zot kote zot pou al rod sa vot 2025.

Mr Speaker travayer Sekter Prive e Piblik pa bliye ki ler kandida Prezidansyel LDS ti fer resorti ki travayer Seselwa i merit ganny zot 13enm mwan saler, parey ki li i ti tous son gratwite lafen lannen apre ki zot in donn li pouvwar, Mr Prezidan in sanz *tune*.

Poudir ki zot tou travayer Seselwa zot pou ganny 13enm mwan baze lo performans. Menm parey ler ti dir ki LDS pou travay pou ki laz retret oubyen laz Sekirite Sosyal pou ganny bese, apre ki Seselwa in war, *still* ankor Prezidan in sanz *tune*.

E in pran in fer li pou asire ki laz sekirite ek son pansyon i monte. Ni pou donn zot ni en opsyon pou bann ki pe al retere, e zot larogans pouvwar sa Gouvernman, in servi zot mazorite dan Lasanble byensir

pou rod leskiz lo ledo Prezidan Faure.

Be si nou rapel tre byen, Seselwa Oktob 2020 dan son mazorite ti vot pou tir Prezidan Faure e vot pou LDS fer pli byen. Me kote, kote kot Prezidan Faure son bann desizyon i antre dan manifesto LDS?

Zot ti annan en swa pou revwar, me zot in fer li. Kote ki plan Prezidan Faure i dan zot manifesto. Zot aksyon i pirman mal onnet, e zot aksyon i pirman malonnet e sa latitid diktater anver travayer Seselwa ki mannyer zot ekspekte travayer pou krwar dan zot.

Mr Speaker inefikasite Ladministrasyon LDS pou govern pei, partaz larises avek travayer Seselwa pou travay dir ek sakrifis, eski sa ki a Gouvernman i apel sikse? Fer travayer dan Servis Sekter Piblik e Prive fer sakrifis e soufer pou fer fas avek kou lavi dan 2an.

Eski sa ki zot apel sikse? Pa konn priyorite ou ladministrasyon, neglizans pou siport travayer dan Servis Piblik eski sa ki zot apel sikse? Aras travayer sa ki apel pou li, e pou pran tou sa ki apel pou zot, eski sa i apel sikse?

Mr Speaker parey mon'n fer sorti pli boner dan mon lentervansyon, nou dan *United Seychelles* nou pa kont pou felisit travayer dan Sekter Piblik ek prive. Pou zot solidarite, travay dir e perseverans anver pei me par a kote Gouvernman ki li in fer zot soufer dan 2an edmi.

Si i annan en Gouvernman ki'n konsistan e valoriz travay dir pou pep Seselwa, se pa lot ki *United Seychelles*. Travayer Seselwa dan Sekter Prive e Piblik in benefisyer atraver kantite benefis ki swa finansyel ou logmantasyon e lezot

loportinite, atraver striktir e lankadremen legal ki ti ganny kree e ki'n egziste e i annan ki'n ganny zoure avek resaman par Gouvernman LDS e son mazorite dan Lasanble.

Gouvernman US ti partaz larises pei, i ti ganny partaze avek tou kous popilasyon.

(Interruption)

MR SPEAKER

Order silvouple. Bann Manm Gard en pe lord, mersi. Onorab kontinyen.

HON AUDREY VIDOT

Mersi Mr Speaker. Mon repete wi, Gouvernman *United Seychelles* ti partaz son larises pei avek tou kous son popilasyon, tou kous. Onorab Larue atraver ou Mr Speaker, taler nou pou dir lekel ki voler ant mwan *United Seychelles* avek li laba.

(Off-Mic)

MR SPEAKER

Bann Onorab zot kapab lev zot lanmen pou koze, silvouple aret fer komanter. Onorab, *yes* onorab ou kapab kontinyen.

HON AUDREY VIDOT

Mersi Mr Speaker. Ki sa manman tousel, ki sa papa tousel, ki sa fanmir solid, ki sa ki ti pe devlop son pti biznes ki swa ti stab dan son biznes. In benefisy e atraver larises pei par Gouvernman *United Seychelles*.

Ozordi la, al demann sa kous dimoun ki mon'n dir la anba sa Gouvernman dan sa 2an edmi, si zot ti byen pase kontrerman avek sa Gouvernman ki la ozordi!

Menm la anndan i annan plen zot ki'n byen benefisy e. Mr

Speaker nou dan *United Seychelles* nou pou kontinyen solider avek travayer, ki swa dan Servis Piblik, ki sa prive. Nou pe envit zot bann travayer Servis Piblik, Prive e tou zabitan ki lo Praslin, La Digue e Zil Pros pou zwenn nou *United Seychelles* Dimans le 30 Avril lo laplenn Ile Eve Baie Ste Anne Praslin.

Dan nou rankont rezyonal pou nou selebre nou zefor travay dir e sakrifis ki nou fer pou pei. E pou nou montre *leadership* Ladministrasyon LDS, ki nou'n fatige avek zot bann lagrenn bat latet.

(APPLAUSE)

HON AUDREY VIDOT

Ki nou'n fatige avek zot bann prometer pti donner.

(APPLAUSE)

HON AUDREY VIDOT

E ki nou'n fatige avek en Gouvernman inefikas ki pe zve sourd lo vre soufrans e realite sa pep, ki la deor ozordi. Mersi Mr Speaker.

MR SPEAKER

Onorab Henrie, ki ou *point of order*?

HON GERVAIS HENRIE

Mr Speaker anba *order* 59(7)(a) ki dir "*A Member shall not use offensive words or expression*" i annan en pe letan Onorab Loze i kontinyelman kriye *off-mic* mo "fol" avek en Manm dan Lasanble Nasyonal.

Semenn pase, mon pa konnen lekel Manm ki i pe refer. Semenn pase son *Chief Whip* ti ganny demande pou dir avek Onorab Loze, arete fer sa. Mon'n

tann li plizyer fwa mwan. In ariv en moman kot mon pou nepli kapab toler son bann kalite *bullying* la anndan kot i refer avek en Manm.

I ti ava byen i ti ava idantifye lekel ki i pe dir, sertennman i pe target en madanm ler i servi mo “fol”. I pa byen, i pa byen.

(Off-Mic)

HON GERVAIS HENRIE

Ou pe koz avek mwan? *But then* nou ava *deal* avek sa an deor. Mersi.

MR SPEAKER

Mersi. Fransman mon pa’n tann Onorab Loze servi sa term, mon konnen dan lepase ki souvan fwa in servi term atraver lasal. Mon ti pe mazine ki kek fwa in pran en desizyon pou arete, me mon pa konnen.

Mon pa’n tann li, mon pa pou pas komanter lo la.

(Interruption)

MR SPEAKER

En moman – *order!* Bon avan nou al pli lwen mon bezwen adres pwen ki Onorab Vidot in leve lo mon desizyon pou pa pran son amannman lo sa Mosyon.

Mon desizyon, i vre Onorab Vidot ti mete en amannman lo sa Mosyon i ti propoze. Mon desizyon pou pa aksepte sa, i baze lo *Standing Order* 44 paragaf 4 ki dir “*No amendments shall be permitted if in the opinion of the Speaker, it represents a direct negative of the question proposed*”.

Alor, amannman ki Onorab Vidot ti mete dan Mosyon onorab William, apre sa bann mo lo felisit travayer, i ti siprim - i ti dir sa bann mo “a kote Gouvernman pou sa

sikse ki nou pei in fer.” E dan plas sa i ti mete “menm si zot in pas dan bann sitan difikilte e soufrans.”

Dan mon lopinyon par tir sa referans avek Gouvernman e sikse ki lye avek travay, ki lie avek solidarite travayer dan mon lopinyon sa lamannman ti tourn Mosyon Onorab William dan en direksyon lekotrer, ki i ti anvi ale.

I pa mon swa, mon pa fer okenn preferans ant Onorab William felisit son Gouvernman e son sikse oubyen travayer, oubyen travayer in pas dan difikilte ek soufrans. I pa swa sa ki mon’n fer. Mon swa se ki tou senpleman sa Manm i annan drwa met son Mosyon dan direksyon ki i le ale.

E *Standing Order* pa permet ki Manm i sanz direksyon. So, se sa ki mon’n fer sa desizyon. Mersi.

Onorab Vidot, mon pa oule okenn argimant lo sa size. Sa i mon *ruling*, mon’n kominik mon *ruling* lo ou amannman avek ou e mon oule ki ou aksepte sa.

En klarifikasyon, wi?

HON AUDREY VIDOT

Mr Speaker, mwan mon pa pe kekyon ou *ruling* mwan. Mon’n tann ou dir poudir sa i ti ou lopinyon,

MR SPEAKER

Wi.

HON AUDREY VIDOT

Savedir sa ki mwan mon’n mete – mon’n site dan mon lentervansyon i korek, se tou.

MR SPEAKER

Tre byen. Mersi Onorab Vidot. Bon mon krwar mon pou fer poz la, nou mon pa pou pres okenn Manm pou fer son lentervansyon e fini par 3er

edmi pou nou a tan. Nou a pran poz la e nou a rebran travay 4er. Mersi.

(BREAK)

MR SPEAKER

Mon ava apel Onorab Doyace Porice.

HON DOYACE PORICE

Mersi Mr Speaker. Bonn apre midi a tous. Mon pou dir mersi Senyer pou sa kouraz e determinasyon ki in met avek mwan menm ek tou travayer Seselwa ek etranze ki dan Gouvènmàn e osi ek Sekter Prive.

Mr Speaker mon pou donn mon sipor sa Mosyon anmennen par Onorab William, akòz mon santi ki en Mosyon ki ti'n plis ki ler pou remersi nou bann travayer dan nou pti pei Sesel. Travayer Seselwa e serten travayer etranze vreman zot in donn zot kouraz.

E zot determinasyon pou anmenn sa diferans dan travay. E dan Gouvènmàn ki i dan Gouvènmàn ki i Sekter Prive. Alor pou sa nou bezwen dir zot mersi. Sirtou atraver sa sikse ki nou pei in fer dan sa kourt dele letan depi sa dernyen eleksyon.

Bann travayer zot in solider avek nou Gouvènmàn e zot in vreman konpran kwa ki pase dan sa pei. Mr Speaker sirtou bann travayer lo Praslin kot nou'n annan sa bon korperasyon ansanm.

Mon santi koman en Manm Lasanble ki mon'n an kontak ek plizyer sa bann travayer dan Gouvènmàn atraver zot lofis e osi bann Sekter Prive dan mon lofis.

Sa ki'n donner in donner menm. Petet en lapel avek bann ki ankor pe vini dousman, pou zot osi debourye pou montre sikse zot osi. Mr Speaker nou annan bokou ki'n arive pandan sa 2an edmi kot sa

bann travayer zot osi zot in benefisye dan sa sikse pei, tou bann desizyon ki Gouvènmàn in pran, travayer in debourye e nou'n kontinyen dir zot mersi.

Avek revwar logmantasyon lapey, elektrisite desann, 10poursan saler, 13enm mwan tousala in vin en mersi Mr Speaker. Nou pa dir tou i roz, me i annan pou aranze.

E la mon pou demann Gouvènmàn, pou kontinyen evalye travay bann travayer pou pran bann mezir kot nou travayer pou benefis plis. Bann *visit* dan distrik in montre mwan ki nou bezwen siport bann travayer, partaz bann nide ansanm pou anmenn sa pei pli devan.

Sa Gouvènmàn pe sey fer son mye, pou ede kontinyen dir mersi tou travayer dan Sesel. Pe kontinyen war plis pou dir mersi tou nou travayer. Alor mon osi mon pou kontinyen fer plis pou siport nou travayer akòz san mwan, san zot pa pou marse.

Pou nou kapab anmenn plis pou nou pei, mon pou dir mersi tou bann travayer Lasante, travayer Lapolis, *PUC*, *ASP*, *Social Affairs*, nou bann ansenyan, travayer *SBC* e tou lezot lo nou zil Praslin. Mersi.

Mon konnen ki zot pou kontinyen donner pou anmenn nou pei pli devan. Annou kontinyen koste ansanm, kontinyen travay dir ki a lafen nou tou nou a benefisye lo nou zil. Ozordi avek sa travay dir nou'n *achieve* bokou lo nou zil Praslin. E Gouvènmàn pe get nou de pre.

Mersi Prezidan ek son *Cabinet* pou zot travay ki zot pe fer pou nou zil e Sesel. Travayer Seselwa aret krwar rimer, aret ekout mansonz, par parti minoriter 43an zot pa'n zanmen war sa ki zot

pe war ozordi ek sa Gouvernman LDS, pe sey zot mye pou aranz zot.

Gouvernman LDS pa pe mazin zot pos parey Gouvernman i o paravan ti fer. E fer faid sa pei e ki'n toultan dir zot ser sang, kontinyen ser sang. Ozordi ler nou pe dir zot mersi parti minoriter US pa pe pare pou dir zot mersi.

United Seychelles zis pe akont zot mansonz akoz zot lafen pouvwar.

E la mon pou swet tou travayer Seselwa en bonn fet travayer espesyalman tou travayer Baie Ste Anne ek Grand Anne Praslin. Mersi ankor enn fwa pour tou sa ki zot in fer pou sa Gouvernman LDS ki o pouvwar.

Avek sa 2mo mon pou siport sa Mosyon. Mersi Mr Speaker.

MR SPEAKER

Mersi Onorab. Laparol pou Onorab Wallace Cosgrow.

HON WALLACE COSGROW

Mersi Mr Speaker. Bonn apre midi tou dimoun. Mr Speaker mon pou komans mon lentervansyon par dir mersi tou travayer Seselwa.

Mon dir mersi Mr Speaker akoz si Sesel in ariv kot i ete ozordi, se gras a en gran parti zefor travay dir tou travayer Seselwa. E la mon pa pe koz zis pou travayer Sekter Piblik mon pe koz pou tou travayer Seselwa.

Mr Speaker si nou fer en pti tourdorizon lo lepase lo listwar, bokou in ganny koze bokou in ganny dir. E ozordi menm dan Lasanble apre midi menm la nou'n koz lo 43an Mr Speaker. 43an in annan en kantite keksoz ki'n ganny fer Mr Speaker.

Ozordi si nou annan nou en lafors travayer Seselwa parey nou annan ozordi profesyonnel dan tou domenn, dan bokou donner, se

gras a program e plan ki nou Gouvernman 43an in met an plas e in kontinyen pourswiv e amelyore kot i nesaser.

Ozordi Mr Speaker si nou annan ners kalifye, dokter kalifye, ansennyen, enzenyer dimoun dan bann domenn lenformasyon, teknolozi, nenport ki domenn Mr Speaker travayer e ozordi nou pe koz lo travayer, remersiman travayer, set akoz in annan en program en lankadremman sirtou bann zenn Seselwa pour fer zot vin sa ki zot anvi vini sa ki zot ete ozordi Mr Speaker.

E mon pa krwar okenn dimoun ozordi malgre zot diferans politik, i kapab *deny* sa ki mon pe dir. Dimoun ki'n ganny son loportinite - ozordi i annan Seselwa ki menm ganny son loportinite ki'n menm kit Sesel pou al pourswiv bann karyer aletranze, kot zot pe travay dan bann gro, gro lakonpanyen.

So ler nou koz lo travayer Seselwa Mr Speaker, nou bezwen *être* onnet, *être* fran sa program 43an ki malgre parfwa zot kritike i en program ki'n donn en kantite loportinite, e ki ozordi pe permet nou felisit travayer. Set akoz sa program ki ou war ozordi nou annan travayer pou nou felisite!

Mr Speaker nou koz lo travayer STC, nou koz lo *teachers*, nou'n koz lo diferan kategori travayer Mr Speaker e nou pe felisit zot ozordi, nou pe dir zot mersi, nou pe dir zot in fer isi zot in fer laba, zot in akonpanyen nou pandan letan COVID, don vaksen, STC pe fer en bon travay. Malgre ki dan lepase nou ti ganny dir fodre ferm STC, fodre revwar, fodre isi, fodre laba.

Me ozordi nou pe felisit zot en, nou pe felisit zot. Savedir i montre ki zot rekonnèt poudir i

annan lafors travayer deor la, ki pe fer byen, ki'n travay dir e ki zot merit ganny rekonnet. *But at the same time* mon pa konpran ki mannyer zot vini zot dir zot ti zwenn en kales kase.

Solman zot pe felisit ozordi dimoun ki'n travay dan sa pei e ki'n fer sa pei marse ozordi. I en lensilt pou dimoun travayer Seselwa ler ou vini ou dir nou'n vin zwen kales kase. E zot kontinyen repet sa, repet sa Mr Speaker.

Mwan pou mwan i en lensilt, ou pa kapab ozordi felisite, solman yer ou dir koumsa kot i ti pe travay, kot i ti pe donn koudmen pou *build* sa pei, ti en kales kase.

Mr Speaker ler nou koz travayer, nou bezwen osi koz travayer Sekter Prive. Akoz zot osi zot rol dan sa pei, kantite travayer Sekter Prive in zwe zot rol dan sa pei pou devlopman sa pei fer sa pri ariv kot i ete ozordi? Souvandfwa Mr Speaker nou dir ki Sekter Prive i moter nou lekonomi.

Wi bann biznes i investir i met larzan i vin avek bann nide bann inovasyon, me san travayer sa bann biznes pa pou al okenn par; i pa pou al lwen. Akoz zot bezwen travayer pou kapab fer sa bann biznes marse.

Travayer Sekter Piblik li, i osi i travay dir e li i asire ki sa moter i kapab fonksyonnen i kapab marse atraver bann loperasyon ki zot fasilite loperasyon Sekter Prive. So ler nou koz felisit travayer pou mwan, nou devret pe koz lo felisit tou travayer.

Sirtou a sa moman la kot nou pe al antre dan Lazournen Mondyal pou Travayer le OI Me Lazournen Lafet Travayer, mon krwar i enportan i en loportinite pou nou koz lo tou travayer, tou

kontribisyon ki travayer i fer dan sa pei.

Mr Speaker sa Mosyon pou mwan, i kler i montre parey mon'n eksplike boner i montre defas Gouvernman LDS.

Zot vini zot dir kales in kase. Zot vini zot dir en pake zafer lo travayer sirtou Sekter Piblik, apre zot vini zot felisit travayer. Konmsi mon vini mon fwet ou apre mon vini mon pas en pti lanmen mon kares ou kot mon'n tap ou.

Sa Mosyon osi Mr Speaker dan mon pwennvi ler mon pe get li, pou mon ou a krwar i pe vin fer en pe *damage control* apre sa diskour SONA ki nou ti tande par Prezidan. E ki Prezidan ti dir dan diskour SONA Mr Speaker?

Kantite referans annefe preski lanmwaye diskour Prezidan Leta Lanasyon ti santre lo travayer Sekter Piblik. Ki ti ganny dir Mr Speaker?

Travayer Sekter Piblik trenn lipye, travayer Sekter Piblik i annan sabotaz, i annan ladan ki'n ganny fer avek travayer Sekter Piblik bann ki siport *United Seychelles* pe fer sabotaz *ok*, e zot in vini in ganny dir la dan *speech* Leta Lanasyon.

Me selman ozordi nou vini nou fek dir - e dan tou zot bann larepons SONA mazorite zot ti asiz lo sa topik travayer trenn lipye, travayer fer sabotaz. Apre zis bann Lasanble fermen, nou sey vini nou sey felisit sa bann travayer.

Be pran zot en desizyon, sa bann dimoun pe fer sabotaz, pe trenn lipye, zot pe travay byen? Dimoun i ekoute e dimoun i analize, zot bezwen pran zot en desizyon swazir ki pozisyon zot oule pran anver travayer Sekter Piblik, zot bezwen swazir ki pozisyon zot oule pran Mr Speaker.

I annan lenstans par egzantler nou ti pe koz lo sa zafer 5poursan *increase* an 2019 Mr Speaker ti dir fodre donn tou parey, pa kapab en bann i ganny plis, en bann i ganny mwens fodre donn tou parey. Sete sa largiman kardinal ki ti ganny fer sa bann letan Mr Speaker.

Aprè nou'n tann en lot *interview* kot i dir nou a sa letan ti koumsa, a sa letan akòz sityasyon.

Mr Speaker les mwan *remind* zot an 2019 Sesel ti'n war enn son bann pli bon performans ekonomik, ki letan nou pe koz lo la? Pandan sa dernyen 2an zot menm zot dan sa Lasanble zot in dir sityasyon ekonomik pa bon, nou bezwen pasyante, nou pe seye isi laba en bann zafer, selman la in bon?

Ler nou vini nou koz lo donn larzan bann diferan lorganizasyon Gouvernman pou get serten travay mon pe dir nou bezwen tenir nou bezwen gete priyorite, lo priyorite. Be solman la in bon, konmsi i kontradiktwar sa zafer Mr Speaker mon pa ganny en konpran ki laliny zot oule ale lot kote latab Mr Speaker.

E parey mon'n dir Mr Speaker boner wi nou bezwen remersye travayer Sekter Piblik, travayer Sekter Prive osi. Nou bezwen felisit zot pou zot travay ki zot fer akòz i pa fasil. Avek resours ki limite, avek kondisyon travay ozordi ki zot pe travay anba la, i pa fasil.

So sa travay ki zot pe fer pour kit Sesel marse, travayer Sekter Piblik pou kit sa moter lekonomi Sekter Prive marse, i pa fasil e i en travay ki zot bezwen ganny remersi e felisite.

Malgre Mr Speaker tou sa difikilte ki zot pe pas ladan, tou sa difikilte ki zot pe pas ladan - e boner

Onorab Vidot in sey fer antre serten bann pwen i ti menm demande pour ki nou amann sa Mosyon e fer li reflekte larealite. Mon pa konpran oli negativite ladan, la realite se la realite.

Me malerezman son amannman son Mosyon pa'n kapab pase Mr Speaker dapre ou lopinyon sa amannman pa ti kapab pase ou desizyon i ou desizyon Mr Speaker nou pa kapab lager kot ou desizyon, me solman larealite i larealite.

Mr Speaker ler mon koz bann difikilte ki travayer Sekter Piblik an partikilye in pas ladan;- enn bann keksoz ki vin dan lespri premye se *long service allowance*. Ozordi i annan bokou, bokou konfizyon ver sa zafer ou *long service allowance*. Mwan menm mon, mon'n ganny detrwa mesaz, detrwa *call* pou sey eksplik en pti pe.

Akòz i pa kler Mr Speaker. Bokou ladan mesaz ki'n ganny pase i pa kler. En keksoz ki serten selman ki kler i se ki sa Gouvernman ozordi malgre zot pe felisit travayer Sekter Prive- ler ou felisite savedir ou pe ankouraz li ou pe fer sa ki bon, me solman i ale avek en lanmen i felisit ou apre ek lot lanmen i koup ou *long service allowance*.

I dir ou koumsa *from now on* ou pa pou ganny *long service allowance*. E i ana en konfizyon total deor bann dimoun pe demande be eski mwan ki'n deza gannyen mon pou gannyen mon pe sey eksplik dan la mezir ki mon kapab me Polisi pa kler.

Sa en difikilte ki ozordi travayer Sekter Piblik pe pas ladan. Ler nou get bann logmantasyon ki'n ganny donner 10poursan, bann kalkil,

E mon ti dir dan mon lentervansyon lot fwa bann kalkil ki

pe ganny fer lendikasyon i montre ki travayer *middle management* ek bann teknisyen ki lo bann saler en pe eleve, zot pa pou resevwar 10poursan an realite.

E sa pa mwan ki'n fer se zot ki'n fer, zot realize poudir zot pa pou resevwar. Akoz serten *allowance* i reste an deor zot *main* saler. Sa i en difikilte ki zot pe pas ladan, nou pe felisit zot solman nou'n pas dan difikilte.

Mr Speaker travayer Seselwa an gran mazorite i pran servis bis piblik pou desann travay e pou troun se zot. Desizyon Gouvernman pou fer monte pri bis, i en difikilte travayer Seselwa ozordi. Dan zot saler zot bezwen trouv en *significant amount of* larzan pou zot kapab pey bis pou desann.

Sa i en difikilte e se sa ki nou ti oule fer resorti dan lamannman Mosyon.

Ozordi bokou travayer pe travay anba stres Mr Speaker. Ler Gouvernman i vin avek en Lalwa devan Lasanble Nasyonal i fer monte zot laz retret i fer monte zot laz pansyon, zot anba stres bann difikilte Mr Speaker.

Malgre ki avan 2020 zot ti ganny dir ki poudir nou pe travay pou fer desann sa laz retret, e zot war lekotrer apre 2020.

Mr Speaker ler bann travayer Seselwa bann ki travay, me ki zot saler pa sitan o e zot annan en fanmir pou antretenir. Zot vin rod en lasistans sosyal pou *top up* sa pti larzan ki zot gannyen, zot ganny refize. Nou felisit zot pou sa bon travay me nou pa ankouraz zot pou kapab antretenir zot fanmir.

So tousala Mr Speaker i bann keksoz ki travayer Sekter Piblik ek travayer an zeneral i note, pe note. E i difisil ozordi deor Mr Speaker pou bann travayer Seselwa. I annan

osi bann ki dir ou - e petet zot pa pou dakor avek mwan - me i annan osi bann ki dir ou ozordi, "*Chief* mon anvi vin partisipe, mon anvi montre mon sa, be mon pa kapab akoz mon per.

(laughter)

HON WALLACE COSGROW

Mon annan lafreyer pangar mon perdi mon travay dan Sekter Piblik." I en fe, i en realite. Ou konpran? I en fe i en realite e dimoun i koze i dir.

En lot lensertitid me Speaker ler nou pe koz travayer ler mon dir nou pa kapab izol travayer ouswa kategoriz travayer, ler nou koze nou bezwen koz pour tou nou bezwen felisit tou.

Se bann travayer dan donner parastatal Mr Speaker. Ozordi la, la koman nou pe koze i ankor annan konfizyon dan bann lorganizasyon parastatal lo ki mannyer, eski zot pou ganny zot 10poursan *or* en logmantasyon.

Mon fek pe lir en lartik dan *TODAY* la ki'n poste lo medya sosyal in annan *meeting* ki'n ganny fer par SS Payet avek bann CEOs bann HR e osi bann lezot zofisyse bann SOEs. E bann dimoun zot pa ankor konnen kote zot *stand*.

Zot ti ganny ankouraze be bann travayer zot menm, ki nou pe felisite la ozordi, zot pa konnen kot zot *stand*. Leo nou felisit zot annou donn zot en keksoz konkret, fer zot konnen kot zot *stand*.

Pa zis pas en Mosyon felisite fer konmsi i gou, demen apremidi nou pe al *adjourn* Lasanble nou pe al dan *recess* sa bann dimoun i reste dan lensertitid. So ler nou koze nou felisite nou bezwen fer sir nou pa kit travayer Seselwa dan lensertitid Mr speaker.

Ozordi Mr Speaker lavey Lazournen Travayer parey mon'n dir nou devret pe koz e sanksyon lakour tou travayer Seselwa;- ki swa atraver son saler, ki swa atraver son kondisyon, ki swa atraver son loportinite ki li i annan dan sa pei Sesel.

Nou devret pe koz lo la nou devret pe sanpyonn tousala. Nou pa kapab koz lo zis en bout e inyor la mazorite Mr Speaker.

Ozordi Mr Speaker, Sekter Prive osi oi dan lensertitid. Nou konnen, nou konpran ki poudir nou pa kapab presyon bann biznes sirtou bann pti biznes, akoz i difisil petet zot napa. Me Gouvernman ozordi in les la mazorite travayer Sekter Prive an deor. E la nou pe koz lo bann zil parey La Digue, Praslin, kot la mazorite zot *workforce* se bann travayer Sekter Prive.

Me malerezman Gouvernman LDS pa'n vin avek en solisyon, ouswa en propozisyon pou anmas zot, zot la mazorite travayer Sesel. Pri lavi pe afekte zot Mr Speaker, sirtou lo sa bann zil, pri lavi pe afekte zot e zot pe anvoy lavwa.

Be Gouvernman ou bezwen ekout ou pep, gete vin avek serten solisyon vin avek serten Polisi, mon pa'n dir ou al *burden* Sekter Prive be rod en fason ki mannyer nou organize pou sa bann dimoun osi benefisye.

Mr Speaker ler nou koz lo felisite, i enportan nou felisite sa kot i byen i enportan nou remerci kot i byen. Me parey mon'n dir nou pa kapab zis felisite remerci, me nou bezwen fer bann aksyon kot sa bann travayer osi i war kote zot pe benefisye, kote zot loportinite i vini e ki mannyer zot kapab avans devan.

E nou Mr Speaker dan *United Seychelles* nou pe dir, nou annan bann solisyon pou sa nou e nou bann solisyon nou pou koz lo la nou, pou koz lo la.

E la tre byento parey in ganny dir nou annan nou, nou gran manifestasyon politik Baie Ste Anne Praslin le 30 lo zil Eve, vini bann dimoun Praslin bann ki'n ganny kit ater bann travayer Praslin ki'n ganny kit ater.

Bann travayer La Digue ki'n ganny kit ater, vini vin ekout nou. Vin ekout nou bann parol, vin ekout nou bann mesaz vin ekout nou bann *Leaders*, vin ekout nou bann *rising stars* dan Parti *United Seychelles!* Vin ekout nou.

E nou, nou pou donn ou solisyon Mr Speaker. E nou (i pe *disturb* mwan la), Onorab fer *visit* la, i pe *disturb* mwan - fer *visit* ek Prezidan i pe *disturb* mwan. Be solman vin ekoute ou osi ou ganny anvoye pou vin ekout nou Baie Ste Anne, ou kapab park par la ekout nou, be solman vin ekout nou.

Mr Speaker an terminan, mwan osi personnelman mon ti a kontan remersye travayer dan Sekter Piblik mon'n fer 20an dan Sekter Piblik mon konnen i pa fasil. Bokou dimoun la in travay dan Sekter Piblik zot konnen ki difikilte i annan.

Me Mr Speaker mon ti a kontan remerci zot e swet zot vi ki nou pe al lo *recess* byento swet zot tou bann travayer Sekter Piblik, Sekter Prive, parastatal tou travayer Seselwa an zeneral swet zot en Bonn Fet Lafet Travayer e parey mon'n dir zot menm Mahe bann ki kapab pran Cat Cocos, pran avyon vin ekout nou. Mersi bokou.

MR SPEAKER

Mersi Onorab. Laparol prezan pou Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Bon Mr Speaker ler ou asize ou fer serten refleksyon lo en tel Mosyon ki'n vin devan nou Lasanble ozordi, ki fer ou mazin diferan keksoz.

Enn, mon santi parfwa wi travayer Seselwa i travay dir, akoz ler ou pe regarde ki pli gran *asset* en landrwa travay? Se son travayer. Alors mwan lo mon kote, mon pa war li mal pou nou felisit travayer me akoz en sa lenstan?

Oubyen mon kestyon se, akoz pandan sa dernyen 2an ki ler LDS in vin o pouvwar? Travayer Seselwa lontan pe travay dan sa pei. Zot pa fek komans travay ler LDS in vin o pouvwar zot.

Nou tou nou merite depi lontan, akoz nou pa ti servi en fason kot- akoz ler ou pe regarde sa Mosyon mannyer in anmennen - Mosyon in anmennen pou zot fer krwar ki - *or* dapre zot pei or Gouvernman LDS pe fer sikse dan zot kourt dele letan, e zot pe servi ledò travayer angiz zot pe felisit travayer pour tou sa bann keksoz.

Me eski vre pe annan sikse dan sa pei? Ou LDS wi ou pou dir wi ou. Me eski pep Seselwa an zeneral i war sa li? Petet ti a bon nou fer en bon refleksyon, akoz bokou lasasen la deor, bokou kritik. Bokou dimoun ki aktyelman la zot dir ou si mon ti konnen - mon ti krwar, mon'n donn en sans me prezan mon pe war. (Taler ou a koze si ou anvì koze).

So i fer ki mon santi ki parey i pe ganny dir nou'n vin ek en Mosyon angiz Lasanble pe fini, ou a fini ek en gro bat lanmen nou pei pe fer byen. Me an zeneral li menm sa

ki mwan mon pe war, i ankor annan en kantite travay pou zot travay.

Nou, nou'n travay pandan 43an e plis nou'n anmenn sa sorti kot i ete ozordi e zot le zot in vin o pouvwar zot in ganny en pei lo plato zot. Menm Mr Speaker mon pou dir ou - menm si zot poudir zot in vin zwenn en kales kase, kales kase ti zis pou serten!

Me si ou ti'n vin zwenn en kales kase ou a repar sa kales akoz ou'n donn lanmen kas sa kales ou, ou a repare. E ler ou'n repar sa kales, ou pou fer sir ki ou donn e ou a distribye tou sa ki dan sa kales pa zis avek ou *time* avek Lepep Seselwa an antye e tou sa travayer ki nou pe felisite ozordi.

Ou'n tann koz lo 10poursan konmsi i en gran zafer ki pe arive. 10poursan i en pti zafer sa, opred la fason ki zot, zot ti vin aranz zot o komansman. Me 10poursan i en pti git keksoz pou sa group travayer servis piblik ki nou pe felisite ozordi.

Mwan mon pou dir ek travayer servis piblik -

MR SPEAKER

Eskiz mwan en pti moman.

HON SYLVANNE LEMIEL

Wi Mr Speaker.

MR SPEAKER

Onorab Zialor avek Onorab Larue zot a gard en pe zot komanter.

HON SYLVANNE LEMIEL

Lontan zot pe *disturb*.

MR SPEAKER

Ou'n koz *off mic* en kantite fwa e mon tann zot tro bokou silvouple. Gard zot parol pou ler zot koze. Mersi.

HON SYLVANNE LEMIEL

Mersi Mr Speaker, lontan ti'n ler pou met en lord. Mwan mon pou dir avek travayer servis piblik, mwan mon pou felisit zot mwan. Mon pou felisit zot pou tou sa lannen ki zot pe travay, pa zis pandan sa dernyen 2an.

Mon pou felisit zot pou tou sa lannen. In annan dimoun ki'n annan 43an, 44an servis. Mon felisit zot akoz zot in ede anmenn sa pei e fer sa pei sa ki i ete ozordi. E zot ankor pe kontinyen fer li.

Mon pou dir avek travayer Seselwa, kontinyen donn tou dan zot travay, menm si zot pe ganny maltrete parfwa ki pe dir zot pe trenn lipye, zot pa pe delivre, parfwa i annan serten dimoun, nou o plase e nou vin dan sa Lasanble nou pe koze nou pe dekouraz serten travayer Seselwa.

Nou menas zot, nou dir zot ki si zot kontinyen trenn lipye, zot menm zot ava kapab vwar ki pou arive ek zot. Ki ou pe sey dir ler i koumsa?

Selman mwan ki mon pou dir avek travayer Seselwa, kontinyen travay, kontinyen devoue e travay pou zot pei, non pa pou sa Gouvernman ki la li, me ou travay pou ou pei, pou sikse ou pei.

Akoz ler ou pe travay, ou pe travay dir. Ou pou kapab pe ganny ou dipen pou ou anmenn kot ou e pou napa sans ki okenn dimoun dan Gouvernman pou vwar ki ou pe trenn lipye, ou pe sabotaz Gouvernman, ou pa pe fer byen ou louvraz, ou pa le Gouvernman *succeed*.

Mon pou dir ou debourye, travay dir. Pa donn en sans sa Gouvernman ek son bann dimoun dan lotorite pou zot met ou a laport.

Mr Speaker, ozordi letan nou regarde, mwan mon koz avek en

kantite dimoun, i travay bokou Sekter Piblik en. Ou pa vreman tro ganny sa dan Sekter Prive. Sekter Prive zot annan zot *goal*, zot in *set* zot le *achieve* e travayer i donner, i donn bokou.

Travayer servis piblik osi i annan ki donn bokou. Me konbyen landrwa travay ozordi *or* ki ti pe travay san petet annan en bon plan stratezik, annan en bon *goal* ki zot le *achieve*. E travayer i vini i fer sa louvraz ki ou donn li.

E ozordi, i dir ou nou met *performance-based system* kot bann dimoun pou bezwen ganny zize dapre zot performans travay. E an menm tan nou'n aprouv osi lo kote Lasanble ti aprouv en Lalwa, kot pe donn pouvwar Gouvernman osi pou zot fer dapre zot depolitiz saler servis piblik pou zot met li dan en Polisi.

E la osi ler ou pe gete avek tou sa bann sistenm, i pou kapab annan bann reorganizasyon dan bann landrwa travay. E se la ki travayer servis piblik i bezwen fer en bon refleksyon lo sa zafer ki ti vin ganny dir dan Lasanble, bann ki trenn lipye.

Sa i ganny drwa pe servi dan en fason osi kot ozordi zot pe ganny felisite wi, nou pe felisit zot. Nou, nou rekonnet sa bon travay ki zot pe fer. Me pa tou dimoun ki pe rekonnet sa bon travay ki zot pe fer. Letan ou pe war i annan dimoun pe krwar ou pe fer sabotaz, i pe dir ou, ou pe trenn lipye.

E se sanmenm petet sa group dimoun ki demen dan zot pe dir re aranzman *or* reorganizasyon, zot lorganizasyon ki ou pou war ou, ou'n ganny met deor.

So, travayer Seselwa i bezwen fer sir vin pli vizilan. E zot, zot bezwen fer sir ki zot donn tou. Ki kan sa bann re-aranzman ki

Gouvernman pe mazin re-aranze, angiz i pou vin fer en *leaner Government*. Me ler ou pe regarde bokou zot dan Sekter Piblik pou kapab pe perdi zot plas travay.

Felisitasyon travayer servis piblik, mon krwar i merit ganny fer akoz travayer zot in vreman rezilyan mon kapab dir pandan sa dernyen 2an *or* 2an edmi.

Travayer Seselwa in travay anba en kantite presyon. E ozordi ler ou regarde, mwan mon pou dir zot, zot in annan en kantite kouraz ek determinasyon pou zot kontinyen sa travay avek sa Gouvernman pandan sa dernyen 2an ki zot, zot pe bat lanmen pou dapre zot, zot sikse ki zot in fer.

E bokou sa sikse ki petet zot pe mazin zot in fer, i kontinyasyon travay ki Gouvernman avan in kit la, e zot, zot bezwen kontinyen fer li. E zot bezwen reklaan sikse lo travay ki'n ganny fer par en Gouvernman ki ti la avan. I normal sa.

Me Mr Speaker, ozordi letan nou pe get travayer dan servis piblik, zot pe travay avek bokou defi mon kapab dir - akoz ler ou asiz avek serten travayer oubyen serten travayer i telefonn ou, i dir ou problem ki zot, zot pe rankontre dan zot landrwa travay.

E ki parfwa i annan zot menm si nou pou dir nou felisit zot, sanmenm sa ki mon dir zot in rezilyan, zot in annan kouraz ek determinasyon. Me zot dir ou zot pa kapab war zot pe al pli devan pou zot kapab rezourd zot problem akoz kot zot ale i annan bann baryer.

E ou war ki sa i vin presyon lo travayer, sirtou mon pe koz ou dan Sekter Piblik. Ti ava bon petet tou bann lorganizasyon travay dan Sekter Piblik i revwar zot sistenm,

annan en *open door policy*. Mon konnen en bon pe i annan, me i ankor annan ki annan serten problem kot travayer ki annan problem pa pe kapab al apros zot bann dimoun pou zot kapab met zot problem devan e pou zot kapab war en solisyon.

E Mr Speaker mon santi ki ozordi travayer Seselwa, mwan letan mon'n koz ek zot, mon en dimoun ki fer en kantite teren, mon mars en kantite dan distrik, mon koz avek en kantite dimoun, mon zwenn en kantite dimoun.

Ou konnen petet bafwe i gou bafwe, letan nou pe koze nou pe met serten pwen devan. Me i fer ou santi ki en bon pe en, i pa tou. Me i bon pe *MNA's* dan *LDS* zot pa konekte.

Si ou vin la anndan ou pou vin bafwe en Manm letan pe koze pe met sor dimoun devan, i montre ki ou pa konekte avek dimoun. Mon asir ou mazorite zot, en kantite zot travayer Sekter Piblik i plenny ek zot en kantite. Me zot akoz zot ds sa Gouvernman ozordi zot in vin la zis pou felisite, me non pa vreman pou koz lo sor sa bann travayer pou nou fer sorti sor, sa bann travayer an menm tan ler nou lo sa Mosyon.

So, it is high time ki mon krwar nou dan sa Lasanble nou pran kanmarad en pti pe pli serye, akoz toultan mon dir sa. In ler pou nou aret bafwe kanmarad. In ler pou nou annan, kapab respe lopinyon kanmarad dan sa Lasanble, letan enn pe koze olye bafwe, asize ekoute.!

Nou bezwen montre ki nou en Lasanble ki serye ki nou en bann Manm ki'n ganny elekte nou konpran, nou serye, e ki nou'n vin fer en travay pou sa pep Seselwa ki'n met nou la.

En mesaz ki mon annan pou mon pas ozordi. Menm si i annan pou kriy "arya", mwan mon pe fer pase mon mesaz mwan. *I am so sorry.*

Travayer Seselwa mwan in dir ek mwan, dir sa bann dimoun dan LDS, nou nepli dormi boner parey zot ti dir lontan ler SPPF, US nou'n o pouvwar zot ti dir travayer dimoun nepli dormi boner.

Be la mesaz i vin ver zot, i dir zot poudir in nepli dormi boner. Kontinyen pas dimyel o bor ver i dir zot. Me selman, travayer Seselwa i dir zot, zot pou kontinyen travay dir pou zot pei, e an menm tan zot, zot pou kontinyen travay pou ki Sesel i ariv kot i merit arive. Anba nenport ki Gouvernman ki ava la, me zot pou travay pou Sesel ariv kot i merit arive.

Akoz sa bann travayer zot annan Sesel aker. Menm si nou pe vwar ki petet zot pa pe ase delivre, me zot annan Sesel aker.

Le 1er Me pe vini, nou konnen i lafet enternasyonal pou bann travayer. E i an menm tan i en lafet ki Distrik Anse Royale i selebre. Mon ti ava kontan profit sa lokazyon an tan ki nou pa pou la dan Lasanble pou mon swet tou travayer Seselwa e osi travayer etranze, ki pe donn lanmen pou travay e pou fer marse nou pei, mon le swet zot en bonn fet travayer.

Mon le dir zot kontinyen persevere, kontinyen travay dir e kontinyen met zefor pou ki zot fer ki Sesel i ariv kot i devret arive. Pe enport ki Gouvernman ki a la, annou travay pou fer sesel ariv kot i devret arive. Mersi Mr Speaker.

MR SPEAKER

Mersi Onorab. Mon donn laparol Onorab Rocky Uranie.

HON ROCKY URANIE

Mersi Mr Speaker. Bonn apre midi ankor enn fwa tou koleg Onorab avek tou zabitan Zil Pros ki a lekout.

Mr Speaker, sa Mosyon i enn ki enteresan. Mon pe dir enteresan dan lesans ki Onorab William atraver ou Mr Speaker, i le donn dimoun lenpresyon ki selman apre eleksyon 2020 ki dimoun in debout a kote Gouvernman pou travay dir dan Sekter Prive e Piblik.

Mr Speaker, be mwan byen lontan mon pe travay 23an mon'n travay dan Sekter piblik. Byen lontan mon pe travay dir dan sa Gouvernman e mon bann frer e ser Seselwa zot osi, zot byen lontan zot pe travay dir dan Gouvernman e Sekter Prive. Sanson progre pei pa ti pou kot i ete ozordi.

Mr Speaker, zonn ek fanm in met zefors, kouraz, lenerzi. Zot in persevere a kote Gouvernman byen lontan pou fer pei marse. Pou fer nou zoli Sesel devlope kantmenm zot ti boykot tou keksoz ki nou Gouvernman ti antreprann dan Sekter Piblik e prive.

Pa zwe bliye zot ti fer sa tre byen. Bokou Polisi, stratezi pou ouver laport pou tou Seselwa kapab fer biznes, si zot ti anvi ti'n ganny met an plas e an pratik.

Bann striktir kler e osi realistik byen etabli, ki ozordi zot oule zwe avek pou donn lavantaz zis serten group dimoun pli eze dan sosyete. Tousala ti'n ganny met ater.

Mr Speaker, la mon le koz ek piblik Seselwa, pou dir zot, zis fer en pri letour lo Mahe, Praslin, La Digue, Silhouette e plizyer lezot zil, tou i dir pou li menm avek sa kantite devlopman e servis ki annan. E sa i rezilta zot solidarite e travay dir anver Gouvernman anver

nou popilasyon e anver nou zoli pti pei Sesel.

Viziter i fyer nou pei e aköz de tanzantan ler zot vin isi zot vwar sa gran proze ki nou'n fer sirtou bann ki nou apel sa bann *repeaters*.

I annan ki pe vin Sesel plis ki 40an e zot dir ou zot kapab vwar travay dir ki Seselwa in fer pou nou ariv kot nou ete ozordi.

Alors Mr Speaker, nou'n toultan travay dir pou donn en bon zimaz nou pti pei Sesel. Nou zoli pti pei ki nou apel Sesel. Nou pa'n fer parey zot pou zis touy lisyen an bonnavini pou donn en move zimaz nou pei.

Bann zenn - bann zenn ki la deor ekout mon byen, mon'n travay ek bokou zenn. Pa les personn anbet zot, al get nou listwar, zot pou vwar kote nou sorti e kote nou'n arive.

Me malerezman nou pa vwar kote nou pe ale depi dernyen eleksyon. Nek bannla i vatevye ek nou, sanz Polisi, anmenn keksoz kot Lasanble pa ankor pare, retourn avek.

Mr Speaker, sanzman dan sa pei in vin transformasyon. Plan tro bokou, lenplimantasyon i lo letazer, kabinet malsoufran. E i dan staz formantasyon e sa byensir i kre bokou fristrasyon.

Mr Speaker, *Leader* i vini i vin fer *speech* isi anndan, blanm travayer Seselwa pou met lipye lo fren ler sistenm pa pe fonksyonnen, i donn lenpresyon ki travayer *US* ki pa pe travay e pe fer sabotaz. Kan saler zot pa konn *drive manual*. Zot ti krwar zot pou *run* en Gouvernman i zis en keksoz otomatik.

Mr Speaker, sabotaz i ler mon ti ganny bloke par ou lo mon kestyon ki mon ti demann *VP* an Novanm lannen pase. konsernan

long service allowance. Ou ti dir mwan sa kestyon pa pou ganny reponn par *PSB* aköz i pa tonm dan son manda.

Me la semenn pase nou war *PSB* pe eksplik *long service allowance*, ki fer plizyer dimoun ki ti'n kalifye perdi zot benefis. Se pourtan *Chief Secretary* Shella Mohideen ti dir, mon *quote-*

"Mr Speaker petet zis pou dir pa kestyon pa anvi reponn, dan ladres Minis Finans in eksplik tou bann *allowances* ki pou ganny *consolidate*. *E long service allowance* li i pa enn ki'n ganny dir pou ganny *consolidate*. So, it is not going to be consolidated.

Akoz? Aköz *long service allowance* i pou endividi. I depan kantite letan ou annan dan servis. So bann dimoun ki pe ganny *long service allowance will not be disadvantaged by the consolidations*. E i annan 4 *allowance* ki'n ganny mansyonn dan *Budget Speech to be consolidated*. E mon krwar zot in remarke ki *long service allowance was not one of them*".

Mr Speaker i ti fer kler ki bann ki ganny *long service allowance will not be disadvantaged*. Me semenn pase ki in vin dir lo televizyon? Sa bann dimoun pou ganny afekte, zot pou ganny dezavantaze.

E kantmenm in eksplik tou sa eksplike bann travayer i *still* pa ker pou kwa vreman ki zot pe vin avek. So Mr Speaker, nou vwar kot travayer kantmenm zot pe felisite, i enpotan pou felisite, me zot bezwen fer sir ki zot pe donn travayer en bon dil.

Mr Speaker, tou gro travay ki ti annan pou fer dan sa Sesel nou'n fer. Later in mou, nou'n fini pas gir pou zot. Ki i annan pou zot fer se zis

pou zot akselere, me zot pez fren menm. Zot pe *run* pei lo en baz *trial and error*.

Priyosite en Gouvernman se i bezwen anmenn pei byen. E latansyon primordyal se byennet son pep. Ki sipor zot in anmennen pou sa travayer Gouvernman e prive ki'n travay dir tou sa lannen e menm apre sa dernyen eleksyon? Ki zot in fer?

Ler i krwar i pe al pran son retret avek tou son douler, zot fer monte laz pansyon e laz Sekirite Sosyal e pe demann li pou vin rape lo son zenou ziska ler i mor dan son travay.

Mr Speaker, dir mersi i enportan. Dir mersi i enportan aköz mersi i en parol rekonesan e tre ankourazan. Me tou dimoun i konnen mersi pa pey *bill* elektrik, ni delo, ni aste konmisyon lo letazer dan laboutik.

Sa Mosyon ler mon'n lir li, i enn ki pe sey vin bat latet travayer Seselwa e sey vin donn en rekonfor apre sa maltrete ki zot in ganny maltrete la ater. Ganny dir zot pe trenn lipye e pe fer en ta sabotaz.

Zot oule donn nou lenpresyon ki zot annan konpasyon pou travayer Seselwa. Ki rekour pou bann travayer prive lo Zil Pros ki mon pran a ker. Kot keksoz i bokou pli ser ki partou.

Zot ankor pe *call* mwan aköz zot lo petet pa asire si zot pou ganny en logmantasyon aköz ziska la konversasyon pa ankor ganny fer avek zot.

En lapel pou bann biznesmenn lo Zil Pros. Gouvernman i bezwen rod ban fason pou anpar zot, e siport zot pou zot osi kapab soulaz zot travayer.

Gouvernman i devret kapab met bann mekanizm an plas ki

siport zot. Travayer Seselwa i vremen fristre, piblik Sesel i fristre. En fristrasyon ki'n vin apre eleksyon 2020. Kot ou pase Mr Speaker, mon pa konnen si ou pas parey mwan kot mon pase. Me ou tann sanmenm. Kot zis dimoun pe plenny zot sor.

En fristrasyon ki zot ki'n kree. Piblik in vin anmer avek lafason zot pe ganny trete. Benefis ki ti pe ed dimoun in ganny retire oubyen prosedir ki fer li tre difisil pou akse servis e ganny led ki zot bezwen.

En fristrasyon ki pe fer zonm ek fanm nepli annan tolerans anver son prosen e lotorite. E la krim i ogmante bokou, plis depi apre sa dernyen eleksyon. Statistk i la e i dir pou li menm.

En kiltir pil lo li, en mesaz ki zot in fer rezonnen dan laservel nou zanfan e nou bann zenn dan kanton. Ki ozordi zot pe rekolte sa ki zot in senmen.

Mr Speaker, lafet travayer pe vini le 1er Me e alors pou mwan Onorab in vin avek sa Mosyon pou sey pez tansyon e fristrasyon travayer.

Me mwan mon pe dir avek travayer, se nou dan *US* ki annan zot a ker. Zwenn nou Sanmdi le 30 Avril dan nou gran *rally* rezyon Zil Pros. Rally travayer Baie Ste Anne Praslin.

Vin anmiz avek nou, vin ekout nou bann *Leaders* ki pou remet lazwa e lev moral travayer.

Nou kontan tou nou travayer, nou demann zot tou pou kontinyen travay dir e persevere. Mon ava zwenn zot Sanmdi le 30 Avril lo Zil Eve Praslin. Eskize, Dimans le 30 Avril lo Zil Eve Praslin.

Vi ki nou pe al dan *recess*, mon profite pou swet bann travayer

davans, en bonn fet travayer tou Seselwa ki isi Sesel e ki aletranze. Alors nou ava vwar zot Dimans le 30 dan nou gran *rally*. Mersi.

MR SPEAKER

Mersi Onorab. Konmsi mon'n tann ou dir ki mon'n blok ou keston e sa ti sabotaz. Mon pa konpran akoz ou dir sa, en ler mon pe demande si vreman ou konpran ki savedir sabotaz.

Selman mon ava zis envit ou vey en pe pli byen ki mannyer ou adres mwan laprosenn fwa. Mersi.

Mon a pran Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon pou dakor avek en parol enportan ki Onorab Lemiel in dir, ler i ti pe fer son entervansyon.

Se ki nou bezwen en Lasanble serye. Wi nou bezwen en Lasanble ki serye, en Lasanble ki pe travay pou Lepep Seselwa, pa en Lasanble ki pe *walk out* tou le semenn, apre son *Leader* i kolekte son saler tou le mwan. I met son palto ki i refize met Sesel e i al tir petar Lasin avek Prezidan Xi Jinping. Mr Speaker,

(laughter - interruption)

MR SPEAKER

Wi ale, en enstan. Onorab Woodcock esper en kou. Lekel ki le fer *point of order* la? Onorab Loze ale. Mon ava ekoute kisasa. Yes.

HON JOHAN LOZE

Mr Speaker mon annan en *point of order about Order* 8 dan fason ki biznes Lasanble pe ganny *conducted*.

Onorab Sebastien Pillay i lo en misyon Lasanble Nasyonal An Sin. En pei zanmi ki'n fer bokou kontribisyon anver lekonomi Sesel e anver problem ki nou ti ladan dan COVID, zot in menm kontribye direktman dan Fon COVID.

Mon pa krwar i fonksyon sa Lasanble serye ki zot pe dir pou komans;- enn, ensilte en misyon Lasanble Nasyonal aletranze.

Dezyenm, pou ensilte en sef – (Mr Speaker, Onorab Larue...)

MR SPEAKER

Ale, ale terminen.

HON JOHAN LOZE

Ensilte en Sef Deta en pei zanmi ki'n kontribye direktman ver nou lekonomi. Mon santi ki Onorab i konpletman *out of order*, i pe ensilte *People Republic of China*, son dirizan, Onorab Pillay e sa 2Manm LDS ki'n akonpany Onorab Pillay lo sa misyon Lasanble Nasyonal aletranze. Mersi Mr Speaker.

MR SPEAKER

Ok. Mon krwar poudir napa lensilt pou Prezidan Xi Jinping. Napa ...

(Off-Mic)

MR SPEAKER

Order! Napa ...

(Off-Mic)

MR SPEAKER

Order! Napa okenn lensilt pou Prezidan Xi Jinping.

Par kont, par kont mon krwar poudir nou devret respekte ki nou bann Manm i lo en misyon Lasanble e dan sa sans mon krwar ou *out of order*.

Bon kontinyen.

HON WAVEL WOODCOCK

Ok Mr Speaker.

MR SPEAKER

Yes Onorab Georges.

HON BERNARD GEORGES

Eskiz mwan be kekfwa ou pa'n remarke, me Onorab Aglae in kriy avek ou Mr Speaker, for. E *he is out of order*. E mwan mon-

(Interruption)

HON BERNARD GEORGES

E i pe anmenn Lasanble dan en direksyon ki nou pa anvi. Olye asize ekout ou, in kriy avek ou Mr Speaker. E sa i pa posib dan sa Lasanble.

MR SPEAKER

Bon, wi mon'n remarke ki Onorab Aglae in kriy avek mwan, Onorab mon pou demann ou *apologies*. Onorab, *yes*.

HON EGBERT AGLAE

Mr Speaker, mon pou *apologies* si mon'n kriy avek ou. Me selman ou pa kapab kontinyen toler Onorab Woodcock pou sa bann komantr ki anba *Order 59* i dir klerman parey semenn pase. Ou pa kapab nonm koz lo en *Leader* Lopoziyon, en Prezidan, en Minis.

MR SPEAKER

Ou remarke ou pe kriye la?

HON EGBERT AGLAE

Mon bezwen eksplik ou Mr Speaker.

MR SPEAKER

Onorab mon pe demann ou en *apology* pou kriy avek mwan. Lo size Onorab Woodcock, mon'n dir li kote i ti *out of order* e nou'n terminen avek sa. Ou le *apologies*?

HON EGBERT AGLAE

Mr Speaker o komansman sa ki mon'n dir mon'n fini *apologies* mwan. Mersi.

MR SPEAKER

Mersi. Onorab terminen silvouple e...

HON WAVEL WOODCOCK

Mr Speaker mon fek komanse. Ok. Ok wi.

MR SPEAKER

Wi, prosede. Ankor enn fwa mon pou fer ou rapel e mon fer zot tou rapel, veye pou zot pa adres bann lezot Manm dan lasal. Akoz si ou fer sa dan en fason malapropo, deswit ou pou ganny en reaksyon. Silvouple prosede.

HON WAVEL WOODCOCK

Ok Mr Speaker. Mwan mon pa'n dir naryen mal, zis se ki *Leader* Lopoziyon - Mr Speaker *Leader* Lopoziyon ler i al fer bann misyon aletranze i pa dan kitenge Mr Speaker, i la dan palto, parey tou bann lezot Minis e zot Manm Lasanble!

(APPLAUSE)

HON WAVEL WOODCOCK

Mr Speaker, atraver ou.

MR SPEAKER

Annou montre en pe respe serye Lasanble silvouple. Tou dimoun i le en Lasanble serye, selman ler i ariv pou koze, napa personn ki pran Lasanble serye. Wi Onorab.

HON WAVEL WOODCOCK

Mr Speaker ler nou pe koz - atraver ou, Onorab Wallace Cosgrow in koz lo kales kase, e in dir ki ler nou koz

lo kales kase nou pe ensilte travayer.

Mr Speaker, les mwan akont en pti zistwar kales kase. Si travayer i fer en kales, *let's say* bann bon sarpantye i fer en zoli kales, apre en voler ek detrwa bandi i vini i vol tou larou ek sa kales, zot tir laport, zot vol, enkli seval tou zot vole Mr Speaker. E zot kit zis karkas Mr Speaker. Ki mannyer ou kapab blanm travayer? Ki mannyer ou kapab blanm sa bann sarpantye? Travayer in travay byen li Mr Speaker.

(APPLAUSE)

HON WAVEL WOODCOCK

Bandi ek voler ki'n kas sa kales Mr Speaker.

Mr Speaker, ou bezwen zis blanm voler avek bandi. Mon bafwe Mr Speaker avek sa bann kalite rezonnman. I annan en Manm ki'n dir ki travayer i travay anba stres, me Speaker i nou pou koz travayer travay anba stres, annou rekil en pti pe an aryer, pa bezwen bokou en 10an pase.

Kot si ou pa ti siport Gouvernman, si ou pa ti al *rally* serten apartir politik, ou ti pou ganny met deor Mr Speaker.

E si pli move ankor ti anna sa ki nou apel *security clearance* ki en bon pe nou lo sa kote latab, nou ganny anpese ganny louvraz, akoz *security clearance* ouswa nou ganny met deor akoz *security clearance*.

(APPLAUSE)

HON WAVEL WOODCOCK

Ki nepli egziste ozordi Mr Speaker ki lo baz politik.

Travayer i anba stres. Selman, sa ki enteresan Mr Speaker ozordi i annan bokou bann Manm

lo Komite Egzekitiv US ki ankor dan Gouvernman dan bann pozisyon kle.

E zisteman pa bokou letan pase i annan serten lapwentman ki Gouvernman in fer ki enkli apwentman Anbasader, kot sa bann Anbasader ki'n ganny apwente in admet klerman poudir wi nou ti form parti, nou ti siport sa parti *SPPF, United Seychelles* avan.

E sa pa'n anpes nou Gouvernman, nou Prezidan konsider zot pou vin Anbasader e ou Manm lo kote nou latab nou'n vot pou zot Mr Speaker!

(APPLAUSE)

HON WAVEL WOODCOCK

Lipokrizi dan tou son splander! Mr Speaker Onorab Lemiel in koz atraver ou, nou'n pran pei lo en plato Mr Speaker! Wi ti annan en bon pe keksoz lo sa plato Mr Speaker ki nou'n pran.

Air Seychelle ek sa det sepa konbyen milyon Dolar ki nou'n sove Mr Speaker. Sa osi nou ti pran lo sa plato Mr Speaker.

(APPLAUSE)

HON WAVEL WOODCOCK

FA4JR, SBFA, sa 42 bout later US osi nou'n pran lo en plato Mr Speaker.

Larzan *forgo* osi Mr Speaker, lo plato menm nou'n zwenn Mr Speaker. E pli move ankor Mr Speaker, disan sa bann ki zot i touye e fer disparet osi ti lo en plato. Ki nou Gouvernman ozordi i bezwen swiye Mr Speaker.

Mr Speaker, mon konpran poudir ennler i en pe difisil pou desifre lekritir ki dokter i ekrir. Akoz zot ekrir li dan en fason ki ou pa pou tro kapab konpran. Se

sanmenm sa rezon ki mon mazin atraver ou Mr Speaker ki Onorab Vidot, in ganny difikilte pou li *speech* son *Leader* Mr Herminie.

Akoz i pa'n tro, tro kapab konpran byen sa *speech*.

Mr Speaker Mosyon Onorab William.

MR SPEAKER

Sorry eskiz mwan. Mon pa konpran referans ki ou'n fer lo Onorab Vidot.

HON WAVEL WOODCOCK

Ok Mr Speaker mon ava kontinyen.

MR SPEAKER

Mon pou, mon pa konpran. Me dan lesans ki mon pa konpran, mon pou demann ou *retract* sa referans.

HON WAVEL WOODCOCK

Ok mon *retract* Mr Speaker. Ki mon dir ki Onorab Herminie ki'n ekrir sa *speech*.

Lasanble, i felisit tou travayer dan Sekter Piblik e Prive pou zot solidarite, travay dir e perseverans a kote Gouvernman, pou sa sikse Mr Speaker ki i annan en kantite. Mon pou vin lo sikse Mr Speaker.

Ki pei in fer dan sa kour dele letan depi dernyen 2an edmi Mr Speaker. Selman 2an edmi Mr Speaker.

En Mosyon pozitiv e nou'n war en Onorab ki'n vin avek en kwiyer sal pou pas dan en kastrol byen prop, en manze byen kwi parey ou'n dir Mr Speaker in propoz serten lamannman ki totalman negativ.

Mr Speaker, mon bezwen dir Lopozisyon i parti ki pri dan negativite. *Order 44 (4) i kler, "no amendment shall be permitted if in the opinion of a Speaker, it represents a direct negative of a question proposed."*

E sa ki zot pe anmenn i negativ konpare avek sa pozitivite ki Onorab William pe anmennen ozordi, pou felisit nou bann travayer dan Sekter piblik ek Sekter Prive.

Si li i ti annan en Mosyon pou li anmennen, pa vey par lao laboutik Pointe Conan Mr Speaker, pou *hijack* en Mosyon ki bon. Ki pe rekonnet nou bann frer ek ser la deor ki'n travay pou anmenn nou pei kot nou ete ozordi, apre i nou'n pas da bann traze, *challenge* difisil Mr Speaker. Apre ki nou pas dan en pandemik *COVID*, dan en kriz ekonomik ki ozordi nou pe re-debout lo nou lipye!

Mr Speaker, toultan sak fwa a bann Manm in vin dan Lasanble Nasyonal zot koz lo *allowance* palto. Parey mon'n dir boner - tou *leader* parti, tou bann *MNA*, nou ganny *allowance* pou lenz Mr Speaker.

E ler nou *travel* parey mon'n dir napa personn ki met kitenge, nou tou nou met nou palto! Selman isi nou re-fize. Zis parey portre ofisyel ki'n ganny tire yer, tou bann *MNA US* zot re-fize met palto, nou, nou'n met nou palto, nou portre ofisyel. Selman ler zot *travel* zot met zot palto apre zot le fer sa bann kalite ipokrizi dan nou Lasanble!

Mr Speaker, i enportan ki nou rekonnet ki nou travayer in kontribye dan nou pei. E i enportan pou nou mazine kwa ki nou'n erite e ki bann keksoz ki nou pe anpes arive dan nou pei ankor.

Anpes dimoun bour lanmen dan kof Leta. Anpes dimoun donn bal dan *loan* apre *loan write-off*, larzan disparet!

I enportan ki nou pa war bann trik parey kot en parti politik i *lease* en later avek Gouvernman apre i re lwe sa later avek, parey nou ti war ka *STC* 800mil. Apre

revann sa menm later pou R17milyon Mr Speaker! Sa osi ti lo plato ki nou'n erite Mr Speaker!

Mr Speaker, nou bezwen tir sa bann kalite negativite. E nou pa kapab zanmen bliye kot nou sorti. Kote nou ti ete ler nou Gouvernman ti pran pei. Zot bliye ouswa zot pe fer krwar ki zot pa mazinen.

Sekter Prive ti ater Mr Speaker. Praslin, La Digue ti napa louvraz. En kantite travayer ti ganny fer *redundant*. Praslin, La Digue nou ti soufer plis aköz nou depan tro bokou, nou depi preski antyerman, lo Sekter *Tourism* pou nou bann biznes bouze.

Ti napa touris, napa larzan Mr Speaker. E petet i enportan pou fer resorti Mr Speaker ki, pli gran sikse nou Gouvernman se refer nou lekonomi. Pli gran sikse nou Gouvernman se tir nou pei dan sa trou ki nou pei ti ladan.

E la en bann ozordi pe koz lo Sekter Prive, ankor mon'n tann zot Onorab Cosgrow ek detrwa zot. Takse biznes.

(Off-Mic)

HON WAVEL WOODCOCK

Ekoute, Onorab les mwan fini.

Zot pe koz lo enpoz lo Sekter Prive bann pti biznes. Ogmant saler. Bokou biznes ozordi dan nou pei Mr Speaker pe releve, pe re-debout lo zot lipye.

E sa bann menm biznes ki ozordi pe pey *tax*, saler tou Manm dan sa Lasanble Nasyonal i ganny peye atraver *taxpayers*. Larzan ki *taxpayers* in kontribye dan *Consolidated Fund*.

E ozordi ler ou pou tann largiman lot kote, i kler Mr Speaker ki zot anv i sa pei i desann pli fon dan sa trou ki zot ti'n met nou pei ladan!

Nou pe bous sa trou pti a pti, zot le kontinyen fouy sa trou Mr Speaker. Nou bezwen ed Sekter Prive pou re-debout lo zot lipye, aköz ler Sekter Prive i fer byen nou pei i benefisye. Tou Minister i benefisye, tou sekter i benefisye Mr Speaker.

Onorab Vidot in koz lo *US* pe partaz - atraver ou Mr Speaker, larises pei. Mr Speaker nou tou nou konnen ki'n arive dan lepase. Larises in ganny partaz antre zot. Tou larises ti ek zot Minis Mr Speaker 72 bout later Mr Speaker. Annou pa bliy le fame saga bann *insurance broker*, lekel ki ti *insurance broker* preske tou Minister Departman Gouvernman? Sete pa lot ki *ex-LGB* Mr Speaker!

Gouvernman dan zot letan, e *ex-Minis - Fidelity* avek mon krwar *Reliance* Mr Speaker. Zis zot ki ti *broker* pou tou Departman Minister Gouvernman, menm si zot ti pe travay dan Lasanble Nasyonal.

Aprè i ava dir nou ti pe partaze. Nou'n partaz ek tou dimoun Mr Speaker.

Bann pti, pti bout Mr Speaker ki zot ti gannyen sepa plis ki 10 kare laplenn ki zot ti partaz antre zot Mr Speaker. Zot in partaze Mr Speaker. Zot ti byen partaze Mr Speaker. Pa ek Lepep Seselwa, me zot ti partaz antre zot antre dalon.

Mon pa ni pou al lo sa \$50milyon Mr Speaker ki'n ariv \$100milyon. Sa mon poz lo lanmenm.

Mr Speaker, ou pa kapab azir parey korbo. Ou pa kapab zis koman ou war en pouritir ou vin patouy ladan, zwe dan pouritir. Ou pa kapab zis rod negativite.

Mr Speaker, zot rod karkas lisyen, selman napa enn antre zot ki'n koz lo karkas nou frer ek ser

ki'n disparet ki'n sorti dan rapor
TRNUC!

(APPLAUSE)

HON WAVEL WOODCOCK

Napa enn zot ki'n koz lo Rapor *TRNUC*. La ozordi dan rapor mon soke pou bann keksoz ki arive *behind closed doors* parey nou frer Hassan Ally - nou'n finalman konnen kin arive avek li. Sa bann azan Leta ti ganny servi anba lord ki zot ti gannye avek Prezidan pou touy li koup, koup li an pti morso, zet li dan kannal apre gard son *sunglass* koman souvenir Mr Speaker!

Mr Speaker, sa bann ipokrizi fodre arete. Ler nou adres keksoz annou adres tou laverite. Ler nou pe koz travayer nou bezwen adres letap ki nou pei i ladan ozordi, kot tou dimoun i annan son liberte pou eksprim son lekor.

Kot personn pa per ki i pou ganny met deor akoz son parti politik ki i siporte. E i enportan pou nou remersye tou travayer ki dela mon pe fer ozordi. Mon pou remersye tou travayer irelevan si zot siport *LDS* ouswa *United Seychelles*, ouswa okenn lezot parti. Mon dir zot mersi pou zot solidarite, pou lafason ki zot in travay dir pou ed nou pei re-debout lo son lipye ozordi Mr Speaker.

(APPLAUSE)

HON WAVEL WOODCOCK

E mon pou osi remersye bann travayer sirtou lo Praslin avek La Digue Mr Speaker. Akoz nou'n pas dan dir. Me ozordi nou tou pti a pti anmezir nou ale, lekonomi i refer, nou pe debout lo nou lipye e nou Gouvernman pe aranz keksoz parey

nou pe fer la, avek sa logmantasyon saler la dan Sekter Piblik.

Mr Speaker, pandan *COVID* en Manm in koz lo la ki mannyer ti *tough*, sirtou pou serten kad, serten sekter, ners, dokter, lapolis e lezot travayer dan Gouvernman.

Bann *teacher* ki ti pe bezwen fer lesou atraver bann diferan, atraver *online*, atraver lo bann *app* ki annan ki'n bezwen reaprann lafason, lapant ki zot montre ansennyen.

Tousala i bann *challenge* ki nou bann travayer in nobou kapab sirmonte, e donn bann servis ki pe ed nou pei refer Mr Speaker.

E ler ou get partou Mr Speaker parey Mosyon pe dir, ou war bokou keksoz ki pozitiv. Bomaten Minis in vin devan Lasanble Nasyonal in koz lo bann fasilite *sport* ki pe ganny refer.

Bann fasilite ki ti pe pouri. Parey Onorab Uranie in koz lo *Sport Complex* La Digue ki si ou mont anler dan plafon ou kapab pas anpasan tonm anba, tol ti'n sorti ti'n ariv lo *court tennis*.

Nou Gouvernman pe vini avek R3.7milyon pou fer en pe renovasyon lo sa pourtir ki zot ti'n kit deryer Mr Speaker. E en bon pe pourtir partou, nou pe retir pourtir partou Mr Speaker.

Lapes Mr Speaker, *meeting* parti *meeting*, Komite parti Komite enkli Praslin, naryen pa'n arive. Koman Gouvernman in vini sa kantite proze lapas ki'n ganny fer dan 2an edmi, i plis ki sa bann proze ki zot in fer dan sa deryen 10an Mr Speaker.

Baie Ste Anne, Grand Anse, La Digue, Anse Etoile partou dan Sesel Mr Speaker. Cascade.

Logmantasyon saler ki zot ti anvi don zis 5poursan lo *basic*, zis R250 dan pos sa ki ti lo *basic salary*

ozordi pe ganny li Mr Speaker R1000 *minimum* Mr Speaker.

Tousala i bann keksoz ki nou pe fer *despite* lefe ki nou pei in fer fas avek en *challenge*, en defi ekonomik.

Lekonomi in refer si menm apre nou ti rebran pei ti napa larzan pou pey saler. 2021 nou Gouvernman in travay pou fer sir ki tou Seselwa, tou travayer dan Sekter Piblik i ganny zot saler lafen dimwan Mr Speaker.

Lapolis i pli serye ozordi Mr Speaker. Plis aksyon. Sirtou kont drog e posesyon bann zouti parey nou war dan reportaz ki'n fek pase resaman kot nou war travay li Lapolis pe fer ozordi pou tir bann zouti dan semen.

Bann dav ki pe anmenn drog pe ganny sezi dan nou lanmer, lo *airport* partou. Lisyen in ganny anmennen pou kapab detekte drog Mr Speaker lo bann dimoun ki pe vin avek lo *airport* Mr Speaker.

E mon bezwen dir Mr Speaker, menm ozordi nou war bokou devlopman pe arive dan bann zil, dan bann distrik i annan ki ti tradisyonnelman siport *US*, zot pa'n ganny naryen zot in ganny neglize, ozordi nou war devlopman ki nou Gouvernman pe fer. Enkli La Digue Mr Speaker.

Louvertir Kordgard ozordi. Onorab Uranie boner atraver ou in koz zafer i pa kapab la al La Digue pou louvertir Kordgard aköz i annan kestyon dan Lasanble, me selman semenn pase i ti annan en kestyon, i ti *walk out* Mr Speaker!

(APPLAUSE)

HON WAVEL WOODCOCK

Mwan mon krwar sa i zis en leskiz, aköz petet mon krwar i en pti pe kanmi Mr Speaker. E mon pa

konnen si i pou la pou ler louvertir lopital i ganny fer, apre sa petisyon. Petet i pou la, mon pou ankouraz li pou li ale pou donn en soutyen zabitan La Digue.

Zot pe koz lo travayer, parey mon'n dir Mr Speaker eski zot bann bon travayer? En bon travayer i pa zanmen mank travay li, toultan i la li.

En bon travayer i pa *walk out* tou lasemenn li! En bon travayer i pa *walk out* apre al fer *shopping hypermarket!*

Fodre Seselwa pa zanmen bliye kot nou sorti. En pei, en pep ki'n ganny oprese, abize, martirize, viktimize dan lepase. En pei ki nou, ler nou ti erite ti lo son zenou. E zis 2an edmi pli tar Mr Speaker sa pei pe re-debout lo zot lipye.

Menm sa 2 Manm ki pe mont dan leo Cascade, mon pa konnen ki zot al fer dan leo Cascade, kekfwä Onorab Monthy i konnen, pou al sey rod en zafer pou zot ganny eleksyon 2025. Mon le dir zot nou'n war zot e pa tro kont lo la en.

Mr Speaker, nou ti'n fermen dan lakaz pou apepre 1an. Ozordi nou pe sirkile dan problem aköz bann bon desizyon Gouvernman. Ozordi i annan bokou bann aktivite sosyal, kiltirel sport, *fun raising* pe fer pou siport bann program Gouvernman.

E menm lo Praslin *Culinary and Art Festival* pe vini byento, Festival Kreol louvertir Praslin, Lefet Nasyonal pe fer Grand Anse dan mon distrik Mr Speaker e bann aktivite pou fer Baie Ste Anne avek Grand Anse. Bann fasilite enportan pe ganny met an plas partou pou ankouraz biznes e kre lanplwa.

Ero *Passenger Terminal*, sa building fek ganny fer e pe ankouraz biznes otour sa pon Mr

Speaker ki bokou nou bann frer ozordi pe benefisye.

Proze Zil Kato Nwar Mr Speaker ki pou donn loportinite plizyer biznessmenn lo Praslin. Ile Eve Mr Speaker apre tou sa dezord Mr Speaker. Tou sa bann bal ki zot in donnen, i annan en bann ki ti *MNA* kantmenm i ti annan en bout later ki i pa ti ankor pey *lease* Mr Speaker, i ti annan laplikasyon pou ganny en lot bout Ile Eve.

Apre in *drop* aplikasyon, apre mon krwar in bezwen rann lot bout Mr Speaker. Ozordi nou vin koz Ile Eve, ki nou Gouvernman in vin met en lord, in tir sa bann *encroachment*. Tou sa bann demagozi ki ti pe arive laba, *lease* later revann, nou vin met lord.

E ozordi i fek pase la Mr Speaker, en semenn de semenn pase, alokasyon later pe ganny fer Ile Eve pou anviron 50 pti bizness lo Praslin Mr Speaker. Grand Anse ek Baie Ste Anne i kapab ganny en bout later pou fer bizness.

Tousala se pa bann sikse sa Mr Speaker? 2an edmi parey mon'n dir dan en kriz lasante ek ekonomik. Nou fer plis ki *US*, Parti *US*, *SPPF* in fer pandan sa dernyen 10an ki zot in o pouvwar.

Nou'n fer plis avek mwens Mr Speaker, menm si nou dan kriz ekonomik. Ozordi nou pe war bon zesyon larzan Gouvernman. Nou war bann *civil servant* ozordi pe devoue pe travay pou ed nou pei.

Dan Sekter Prive dimoun pe travay akoz zot ankouraze. Akoz zot anvi war nou pei al bouz pli devan. Me ki nou war Mr Speaker? An konklizyon, nou vin dan Lasanble nou anmenn en Mosyon pou nou remersye tou travayer, Lopozisyon *comme d'habitude* i vin avek zot bann negativite. Kontinyen patouy

dan pouritir parey zot abitye fer, desann dan labou, kraze.

Olye, ansanm avek nou donn lanmen remersye nou bann travayer Mr Speaker, zot pa fer li Mr Speaker. Zot vin rod lipou dan tou keksoz Mr Speaker.

I sagrinan Mr Speaker, me selman lo nou kote latab nou rekonnèt zefor e travay ki tou travayer dan Sekter Prive e Sekter Piblik in fer. E mon osi mon pou profit sa lokazyon pou fet tou travayer lo later Sesel, Seselwa e etranze, Praslin, Mahe, La Digue sirtou dan mon distrik Grand Anse Praslin en bonn fet travayer.

Avek sa de mo mon dir ou mersi Mr Speaker.

(APPLAUSE)

MR SPEAKER

Mersi. *Point of order* Onorab Loze, wi.

HON JOHAN LOZE

Mersi Mr Speaker. Bonn apre midi, mon'n bliye dir ou taler. Mr Speaker *I will put it before your good self* ki i *en recurring theme* Onorab Wavel Woodcock pou li dir e repete disan dimoun ki zot in touye, dimoun. (Mr Speaker mon kapab ganny en lape avek sa madanm laba deryer silvouple!)

MR SPEAKER

Ale Onorab. Ki *point of order* ou pe al lo la?

HON JOHAN LOZE

Mon pe al lo *Order 8* lo fason ki ou *conduct* bizness Lasanble akoz mon le *besech your protection as the* Speaker.

(Mr Speaker-Mr Speaker mon kapab ganny en lape ek sa bann dimoun?)

MR SPEAKER

Onorab ale. Ki *point of order*? Ki *order*?

HON JOHAN LOZE

Mon'n fini dir ou anba *Order* 8. Lafason ki ou *conduct*, ou war zot pe disturb ou. Zot pe *disturb* ou, ou pa tandé.

Mr Speaker lafason ki ou *conduct business*, mon le *beseech* ou proteksyon koman en Manm Lasanble Nasyonal.

I annan 10 nou Manm lo sa kote. Napa personn ki'n touy personn. Les sa 28mil siporter ki'n vot pou parti *United Seychelles* ki pa'n touy personn.

Onorab Woodcock i pou bezwen komans kalifye son *statement* letan i koz lo dimoun ki'n touy dimoun. Mon war klerman ki zot pe sey fer, zot le *weaponize* rapor *TRNUC*, avan ki i menm vin en deba lo *Order Paper* Lasanble Nasyonal.

But that aside Mr Speaker, *the way you conduct business*, ou, ou pa le mon dir poudir ou Prezidan in touy dimoun ek *COVID*. Ou pa oule mon dir sa, ou'n deza anpes mwan.

MR SPEAKER

Absoliman non, absoliman non ou pa kapab dir sa Onorab.

HON JOHAN LOZE

Be ki mannyer ou les li aköz nou ki nou'n touy dimoun kan ou, ou Prezidan in touy dimoun ek *COVID*.

(Interruption)

MR SPEAKER

Bann Manm aret kriye silvouple. Aret kriye. Zot dan Lasanble donn legzanp, koze.

Onorab Loze mon pe dir ou absoliman ou pa kapab dir poudir Prezidan in touy dimoun ek *COVID*. E lo ou pwen ki ou'n fer, sa mo "zot" la tou lede kote i servi libreman e souvan malapropo – "zot, zot, zot" e Onorab Woodcock in servi li dan menm fason.

So si zot le fer Lasanble vin pli lo standar, arete zot tou servi sa bann lakizasyon, "zot."

Parske ler Onorab Woodcock ti pe dir sa, i pa ti pe dir neserman bann dimoun ki pe asize la li, i ti pe akiz en group dimoun zeneral.

So,

(Off-Mic)

MR SPEAKER

Onorab arete. Malerezman nou'n ariv a lafen, alor i pa fer okenn sans pou mwan met zot deur. Lasanble, nou ava aret la. Lasanble i ava *adjourn* e nou ava rebran demen bomaten 9er. E avek en pe pli bon kondwit silvouple. Mersi. *Adjourn*.

(ADJOURNMENT)

